

Mateo

Náhu uu Jesucristo ir poruwo wishí.

1 ¹Ana hutita tata uu Jesucristo ir poruwo wishí. Wichí tãra rey David lishí hn Abraham lishí.

²Abraham ir ijít iich otsii Isaac. Isaac ir ijít iich otsii Jacob. Jacob ir ijít iich otsii Judá. Judá hõr leshíbo wir israel oso õr poruwo wishí.

³Judá ir aabo õr iyo otsii Fares hn Zara. Õr data iich otsii Tamar. Fares ir ijít iich otsii Esrom. Esrom ir ijít iich otsii Aram. ⁴Aram ir ijít iich otsii Aminadab. Aminadab ir ijít iich otsii Naasón. Naasón ir ijít iich otsii Salmón. ⁵Salmón ir ijít iich otsii Booz hn Booz waa ir data iich otsii Rahab. Booz ir ijít iich otsii Obed hn Obed ir data iich otsii Rut. Obed ir ijít iich otsii Isaf. ⁶Isaf ir ijít iich otsii David. Wichí uje masaha par israel oso õr rey. Rey David ir ijít iich otsii Salomón hn Salomón ir data wate Urías lishí ir irãhto. ⁷Salomón ir ijít iich otsii Roboam. Roboam ir ijít iich otsii Abías. Abías ir ijít iich otsii Asa. ⁸Asa ir ijít iich otsii Josafat. Josafat ir ijít iich otsii Joram. Joram ir ijít iich otsii Uzías. ⁹Uzías ir ijít iich otsii Jotam. Jotam ir ijít iich otsii Acaz. Acaz ir ijít iich otsii Ezequías. ¹⁰Ezequías ir ijít iich otsii Manasés. Manasés ir ijít iich otsii Amón. Amón ir ijít iich otsii Josías. ¹¹Josías ir ijít iich otsii Jeconías. Erze Babilonia oso ohnoy Jeconías hn ir leshíbo hn erze israel oso yewo otseya õr dit Babilonia.

¹²Uje ode dit Babilonia ich Jeconías ir ijít de uje iich otsii Salatiel. Salatiel ir ijít iich otsii Zorobabel. ¹³Zorobabel ir ijít iich otsii Abiud. Abiud ir ijít iich otsii Eliaquim. Eliaquim ir ijít iich otsii Azor. ¹⁴Azor ir ijít iich otsii Sadoc. Sadoc ir ijít iich otsii Aquim. Aquim ir ijít iich otsii Eliud. ¹⁵Eliud ir ijít iich otsii Eleazar. Eleazar ir ijít iich otsii Matán. Matán ir ijít iich otsii Jacob. ¹⁶Jacob ir ijít iich otsii José. Wichí María ir abich. Wate Jesús ir data. Jesús wichí Cristo.

¹⁷Abraham nehech teríhi David õr katorse wir uu José ir poruwo wishí. Uje David de nehech ohnoy õr otseya õr dit Babilonia wir uu José ir poruwo wishí õr katorse. Uje ode Babilonia nehech Cristo shúrha wir uu José ir poruwo wishí õr katorse.

Jesucristo shūrha.

¹⁸Tiita uje Jesucristo shūrha. Ir data iich otsii María. Hōr José ochibite lahwookite par ōhiye ahir per uje ehn yahpaa onōyhiye ahir ich wate hmiker. Porrosht Ichibich ukurbo shuu wate hmiker. ¹⁹Wate José tyenij ūhi ahir par ir irāhto. José wichi ich ir iluu om. Ye nahmūrpe uje tatehe oso ōr ikich uje sehe noym wate hn shuu wate pook. Heke ehēt chiilehet par uje shi tatim ōr bahuwo. ²⁰Uje ehn shuu deyuwo tisir itsorz ich umo hn chikēra deerc. Irhich ir anjel tatim ire im: —José, owa āra uu owa porokkite rey David. Ye atila par uje ēyhi María ahir par erāhto pork Porrosht Ichibich ir ukurbo wichi uje shuu María hmiker. ²¹Uje María ijit shūrha ich ekēra iich on Jesús. Ekēra uhu itsorz pork wichi tyenij ishi nahnapso ōr hñitewihi Porrosht ahir.—

²²Tyenij tokole itsorz par uje eyok Irhich ahwoso yakaha uje shuu profetit chichewkite. Ese profetit tata im: ²³—Hmeychimlo, timcharrza pharrza tyenij hmiker hn ir ijit shūrha iteētak. Ekirlo ir iich on Emanuel.— Ese ahwošt tata uje Porrosht shish de eyok ahir.

²⁴Uje José nñhi ich shiyokōr erze uje Irhich ir anjel tatim ireke. Ūhi María ahir par ir erāhto ²⁵per ye umuhu wate ahirpe nehech ir ijit shūrha, hn José chikēra ir iich im Jesús.

Hnakirbo uje ōr eykdeyo ochukwi Jesús

2 ¹Eseekite uje Jesús shurēhe wahacha dit Belén uje dechi hñimich Judea hn Herodes shish reyihichis ich hnakirbo otirēt otāra deeych warich yit uje ōr dit de otir Jerusalén. Wir ōr eykdeyo, ochiraha porzeebe. Otata otsii: ²—¿Chihī iraāpo uu israel oso ōr rey uje shurhāni? Oyumo ese pikihñint ir porzeebcha wahacha deeych warich hn oyirēt par oyeeychāha ire.—

³Uje rey Herodes chunt uje itsorz ich chishlabe hn tola. Nos wir oso uje ode dit Jerusalén ochishlabe hn otola toy. ⁴Herodes shuu nos wir otakisho lawich erze saserdote ōr bahuwo hn erze uje oshiyokorāha oso waa ley waa je Moisés chichewkite. Tatim ōr im: —¿Iraāpo uje Cristo tyenij shurēhe?—

⁵Otatim otsii: —Tyenij shurēhe dit Belén uje de ese hñimich Judea pork profeta porokkite chichew shuu itsorz im: ⁶“Ese dit Belén uje de hñimich Judea wichi dit ijaap per ich bale pork erze israel oso ōr bahlut tyenij tāra ese dit par tibey ōr.”—

⁷Eseekite hn Herodes shuu otibii erze hnakirbo uje ōr eykdeyo per ye nahmūrpe uje shuu oso yewo ochiraha uje tibii ōr. Tatim ōr im: —¿Latikni hn ese rey ir porzeebcha tokole?— ⁸Uje otatim ire hn wichi tatim ōr im: —Bolilo etirlo wahacha dit Belén ekulo ese pikihñint. Uje eshilo ich erētlo atimlo yok par uje takaha tikeeychāha ire toy.—

⁹Uje ochunt uje rey Herodes tataka hn otokole ohno. Asa porrzeebcha waa je omoho wahachhna deeych warích dechi òr ikich iyebe hn oyehe nēr nehech asa porrzeebcha iyehechis owich uje ese pikihnint de. ¹⁰Uje erze hnakirbo omo asa porrzeebcha uje iyehechis ich òr ayla. ¹¹Omasaha pwert eheth hn omo ese pikihnint hn ir data María. Wir ocha dete hnimo hn oteeychāha ese pikihnint. Otsitsēr ese uje otōhwa hn ochiyuhu oro oshim ire. Oshim ire incienso hn mirra uje aat ehmuuj.

¹²Uje omo hn òr yet chikēra uje ye ompe ocheeshpo otīr Herodes heke ochikāha dehet yet uje tīr òr dīt.

José hnoy Jesús hn María seya òr Egipto.

¹³Eseekite uje erze hnakirbo ohnoko uje òr eykdeyo hn José umo. Chikēra deerc. Umo Irhīch ir anjel uje tatim im: —Alehet, boy ese pikihnint hn asa ir data etīrlo wahacha egipto oso òr hnīmich shichish. Shi akahachis nehech terihi uje titim owa nehe hn eeshpo, pork Herodes sehe duhu odukwi ese pikihnint par shuu oshuu oshuu toy.—

¹⁴José nīhi dīhlich pehet. Chishew ese pikihnint hn ir data. Ohno otīr egipto oso òr hnīmich. ¹⁵Otsakaha wahachni nehech terihi uje rey Herodes toy. Uje oshiyokōr oshuu itsorz ich oshuu eyok Irhīch ir ahwoso yakaha uje shuu profeta chichewkite uje tata im: —Porrosht sole: “Tikibii pijit par uje tokolihi egipto oso òr hnīmich.”—

Rey Herodes shuu ohyerptoso oshuu pikihnino.

¹⁶Eseekite uje rey Herodes kemihī uje erze hnakirbo uje òr eykdeyo otsehnēr ire ich chesdelpa. Shuu ohyerptoso ohno otīr dīt Belén hn nos wir duwo uje de ir wiro par oshuu erze pikihnino ijaabo oshuu otoy uje òr do āyo hn uje ehn oyehi pork erze hnakirbo uje òr eykdeyo otatim irhna uje do āyo uje asa porrzeebcha tokole. ¹⁷Uje oshuu erze pikihnino oshuu itsorz ich oshuu yakaha erze uje profeta Jeremías chichewkite im: ¹⁸—Ochunt òr iyaa wahacha dīt Ramá. Wir oyerh ich otsihnew. Wate Raquel uje yerh towīra deyjo. Ich ye nahmūrpe uje yeēk shuu ire eheth kiis pork ich nos wir ir aabo ijaabo iteēto otoy.—

¹⁹Eseekite uje rey Herodes tokite hn José umo hn chikēra deerc. Irhīch ir anjel tatim im: ²⁰—Alehet, asew ese pikihnint hn ir data. Bolīlo etīrlo israel oso òr hnīmichpo pork ich tohna ese uje sehe duhu ese pikihnintni.— ²¹José iyehet. Chishew ese pikihnint hn ir data. Ohno ocheeshpo otīr israel oso òr hnīmich.

²²Uje José chunt uje rey Herodes ir ijit Arquelao tībey erze israel oso uje ode hnīmich Judea ich tola par tīr wahacha. José umo hn chikēra deerc. Porrosht tatim uje ich ye ompe sakaha wahacha, heke hno tīr hnīmich Galilea. ²³Uje taachīhichis hn hno sakaha dīt Nazaret heke ich yakaha uje erze profeta poruwo wishī otata otsii: —Cristo wichi uu Nazaret osht.—

Juan tohirm oso.

3 ¹Eseekite hn Juan uu tohirm oso ichii hno t̄ir wahacha hñimich uje isa uje dechi hñimich Judea. Sanimirāha Porrosht ahwoso tatim őr im: ²—Uhu olak aho nuuna uje ahakōrlo mihñūwo. Moymlo hn ahakōrlo uje Porrosht sahmūr pork yej terihi uje Porrosht shuu oso omasaha par ir aabo.— ³Juan wichi uje profeta Isaías tatkite im: —Porrosht sole: “Ese pibich de wahacha hñimich uje isa nehe. Tatim oso ich sihnew im: Moymlo erze olak iluu mihñū. Enshii olak par anemlo ese řhīch. Uhu olak ilo dehet uje onishii oshuu deresho par ese řhīch.”—

⁴Juan ir ishuwo oshiyokōr ochīra kameylo wesho shi itso ponchuko. Ir ihirzosh̄t wōjo yuhur. Ir poso shi tew eru uje om hn t̄ibuhu reyne uje de hmonte. ⁵Oso uje ode Jerusalén hn erze uje ode lekitiyo hñimich Judea hn erze uje ode onoota Jordán wir ⁶ohno ot̄ir Juan. Otatim uje oshiyokōr mihñūwo hn oym hn Juan tohirm or̄ihi onoota Jordán.

⁷Juan umo erze oso uje otirēt ich okihniya uje őr iluuta iich otsii fariseo hn yewo őr iluuta iich otsii saduseo. Otirēt par uje Juan tohirm őr. Juan tatim őr im: —Olak shi olak itso echeēt ir aabo uje ich wosdeyo. ¿Yeēk tatim olak heke erētlo par uje ye ese kuchit mihnt t̄ir olak nehe?

⁸Ebitilo orhōta uje moymlo erze kuche mihñūwo hn ahakōrlo uje Porrosht sahmūr. ⁹Ye uhulo olak eyuwo tis̄ir uje ārlo olak porokkite Abraham heke olak owich de Porrosht ahir. Titim olak kirēhe Porrosht nahmūr ich ire pwele shuu erze kojano chisāha ire Abraham ir aabo. ¹⁰Ich yej terihi ese deeych uje Porrosht sepyēr oso shi itso uje ibijiita de pohir ahir par ihyo. Nos pohir uje ye ee ihirpe ich tyenij ohyo hn ochimchaha jwekita. ¹¹Erze uje otata uje oshiyokōr mihñūwo hn oym, wir uje tokohirm or̄ihi awit, per tyenij yet tirēt iyehe piyēr. Wichi ma dich je yok heke ye yok pwele tokōhwa ir erihyope. Wichi tyenij shiyokōr shi itso uje tohirm olak chīra Porrosht řhibich hn jwekita. ¹²Wichi tōhwa palt. De ir hme par chishit erze trigo hn chihmer ese trigo chimchaha ir owich, per erze ir yuhur ich chimchaha asa jwekita waa je yelij nihna ire.—

Juan tohirm Jesús.

¹³Eseekite hn Jesús tokoliñichis ese hñimich Galilea hno t̄ir onoota Jordán par shuu Juan tohirm irehechis. ¹⁴Juan ye nahmūr tohirm Jesuspe. Tatim Jesús im: —Tyenij ohirm yok per erētiķe par tokohirm owa.—

¹⁵Jesús tatim ire im: —Ma om uje ohirm yok par Porrosht ahwoso yakaha.— Hn Juan tatim ire im: —Yehe wichi.—

¹⁶Uje tohirm Jesusike hn tokoliñi awit ichii poōrc sitsēr ire. Umo Porrosht řhibich uje ihñimich t̄ara poōrc itso palomit iyehe Jesús eeych.

17Chunt òr ahwoso uje tãra poõrc tata im: —Wichi yok pijit uje tahmũr hn tahmũr erze uje shiyokõr.—

Dyablo sehe duhu Jesús niyokõr uje mĩhnik.

4 1Eseekite hn Porrosht Ichibich shuu Jesús hno tĩr ese owich uje isa par uje dyablo prowa sehe duhu Jesús niyokõr uje mĩhnik.

2Uje Jesús dechi ich ye taakpe daalo kwarenta hn dihle kwarenta. Ichii chuuna uje sewit sēhi. 3Dyablo uje sehnýēr oso sitĩr ire Jesús. Tatim im: —Kimiji owa Porrosht Ijo ich atim erze kojano po par uje chisãha ire pan.—

4Jesús tatim im: —Porrosht ahwoso tata uje ye shi panpe uje shuu òr ikirít de per tyenij nos oshiyokõr uje Porrosht tata.—

5Dyablo hnoy Jesús seya wahacha Jerusalén uje Porrosht ir templo de. Chibite ire templo eeych uje ich ma porít. 6Tatim im: —Kimiji owa Porrosht Ijo ich ãr owaha lika pork Porrosht ahwoso tata uje shuu ir anjele otibey owa. Wir ochishew owa ochĩra nahme par uje ye kojano duhu er.—

7Jesús tatim im: —Porrosht ahwoso tata shuu itsorz toy im: “Ye epi owa Irhĩch Porrosht.”—

8Dyablo hnoy Jesuspo seya kojach eeych uje ich ma porít. Nos sowa erze duwo uje de írmo lekityo hn nos wir kuche ihĩrtso uje de aho.

9Dyablo tatim im: —Kimiji atsa ete hnimoho pikich eeychãha yok ich nos tokosim owa.—

10Jesús tatim im: —Satanás, atokolihi lika, bo pork Porrosht ahwoso tata im: “Eeychãha owa Irhĩch Porrosht hn ahakõr shi uje ire sahmũr.”—

11Heke dyablo tokolihi Jesús ahir hn anjele otaachĩhi Jesús ahir par otakashim.

Jesús sanimĩrãha Porrosht ahwoso hnimich Galilea.

12Eseekite uje Jesús chunt uje ochimchaha Juan karsel eheth hn tokolihi hnimich Judea hno tĩr Galilea. 13Tokolihi Nazaret hnaas hno tĩr Capernaum uje de lagunta wir. Ese dit dechi erze israel oso òr hnimich uhurc uje òr porokkrite iich otsii Zabolón hn erze israel oso yewo òr hnimich uhurc uje òr porokkrite iich otsii Neftalí. 14Uje Jesús debuhu ese dit Capernaum ich shuu Porrosht ahwoso yakaha uje profeta Isaías chichewkrite shuu itsorz im:

15 —Erze israel oso uje odebuhu ese hnimich uje otãra ir porokkrite Zabolón hn erze israel oso uje odebuhu ese hnimich uje otãra ir porokkrite Neftalí ode Jordán pit uje deeych warĩch. Ese hnimich iich otsii Galilea. Dihipo kinãho odebuhu wahacha toy.

16 Erze oso uje odebuhu wahacha ye odĩraha Porroshtpe. Wir shi òr itso uje ode dihlelta. Wir omo luuta waa je ich data. Erze uje

odebuhu ese hnimich wir shi itso uje tyenij otoy hn otir urhuta bahluta eheth per ese uje itso luu chihit or par shuu ochiraha ire.—

¹⁷Eseekite uje Jesús taachihí Capernaum ichii sanimirāha Porrosht ahwoso tatim or im: —Moymlo erze olak iluu mihnū hn ahakorlo uje Porrosht sahmūr pork ich yej terihi uje Porrosht shuu oso omasaha par ir aabo.—

Jesús tibii leshirtso par oya ire.

¹⁸Eseekite uje Jesús dirkihi lagunta Galilea wirc hn umo hnakirbo or osiyer uje otāra ir rethi lagunta eheth. Or leshibye. Uu yet iich otsii Simón. Ir iich yet otsii Pedro, hn ir leshibich iich otsii Andrés. Wir shi leshirtso. ¹⁹Jesús tatim or im: —Erētlo meylo yok hn tuu uhulo oso omasaha par Porrosht aabo itso uje eshērlo loshiyō ērlo ret.— ²⁰Ichii oym ir ret hn oya Jesús.

²¹Uje Jesús dirkihichis hn umo yewo toy, or osiyer. Wir or leshibye. Yet iich otsii Santiago hn ir leshibich iich otsii Juan. Or deych iich otsii Zebedeo. Odechi deych ahir pohorrza eheth ochii ret obilo. Jesús tibii or. ²²Ichii oym ir deychihí pohorrza eheth hn oyhnmich ohno oya Jesús.

Jesús shiyokorāha oso hnimich Galilea.

²³Eseekite hn Jesús hno tīr lekītiyo hnimich Galilea shiyokorāha oso sinagoga aho. Tatim or erze ahwoso omo uje ich yej terihi uje Porrosht tibey oso. Ich oso okihniya uje or permo kināho kināho hn nos chukuta or. ²⁴Otatehe Jesús lekītiyo ese hnimich Siria. Nos otōhwa wir oso uje or permo kināho kināho. Ode uje or doso hn yewo demonyo de or aho hn ode uje or atake hn ode uje pilich worbit yakaha or. Jesús nos chukuta or. ²⁵Ich oso okihniya uje oya ire. Otāra hnimich Galilea hn otāra erze duwo uje iiyo otsii Decápolis hn otāra Jerusalén hn otāra hnimich Judea hn otāra onoota Jordán pit hn oya Jesús.

Jesús sakaha wirit eeych hn sakit dakile.

5 ¹Eseekite uje Jesús umo erze oso okihniya uje otirēt otir ire hn dohir wirit eeych. Uje sakahachis hn ir akile hn erze yewo uje shish oya ire otir ire. ²Ichii shiyokorāha or tatim or im:

³—Ich om par erze uje ochiraha uje or nesita Porrosht pork tyenij omasaha par ir aabo.

⁴Ich om par erze uje or dosdarak pork ye onahmūr erze mihnūwo uje oshiyokōr. Porrosht wichi uje tyenij shuu or aho kiis.

⁵Ich om par erze uje ye or ehnitope pork Porrosht tyenij ishīm or ese irmo.

⁶Ich om par erze uje sehe oniyokōr uje om shi itso uje yesh sewit sēhi or hn or iilo sēhi or. Porrosht wichi uje tyenij takashīm or shi itso uje otaak nehech otsatso.

- 7 Ich om par erze uje ochuuna uje yewo òr losuhlaabo heke Porrosht tyenij chuuna toy uje wir òr losuhlaabo.
- 8 Ich om par erze uje shi oshuu deyuwo tisir̄hi Porrosht hn ye oduhu deyuwo tisir̄hi kuche kināhope pork tyenij omo Porrosht nehe.
- 9 Ich om par erze uje oshuu yewo òr aho kiisihye. Yewo tyenij otata uje wir òr Porrosht aabo.
- 10 Ich om par erze uje oso oshiyokōr minhuwōho òr pork ye olotiis yokpe. Wir òr owich de Porrosht ahir.
- 11 Ich om par olak uje ye otiislo yokpe heke oso oloter olak hn oshiyokōr mihnuwōho olak hn otata uje ahakōrlo uje ich mihnūwo per ye ahakōrlope.
- 12 Uhu olak ayla hn uhu olak aho kiis pork wahacha poōrc olak premyo de ich dich. Antkite oso oloter erze profeta poruwo wishi itso ele ahle ich oloter olak.—

Porrosht aabo shi òr itso sal hn luu.

13 Hn Jesús tatim òr im: —Titim olak uje olak itso sal uje olak de nāhu ĩrmo pork ontilo erze kuche mihnūwo uje oso sehe oniyokōr shi itso uje sal sontew par uje ěro ye mihnēpe. Per kimiji erze sal sihna ire uje ich ye chiyokpe ¿ich uhu inaāpo par uje uhu chiyokpo? Ich ye jukur par latik heke otāra ochibite dehet hn oso otarāha hnīmich.

14 Olak shi olak itso luu uje olak de nāhu ĩrmo pork omo olak. Shi olak itso dit uje de wirit eeych. Ye oso òr pwele uje otsakis ese ditpe.— 15 Hn Jesús tatim òr im: —Ye onēru nampyontpe hn olakis ochibite kejunt uut. Shi ochibite owich uje de porit par chihit pwert ehēt. 16 Shi olak itso luu. Ye akislo erze uje om uje ahakōrlo par uje erze oso oteychim ich oshuu olak Deych ich dich uje de wahacha poōrc.

Jesús tata uje ye tirēt par sihna asa ley.

17 Titim olak uje ye ompe uhu olak eyuwo tisir̄ uje Tikirētni par tihna erze ahwoso uje Moisés chichewkite hn erze ahwoso uje profeta poruwo wishi ochichewkite. Ye tikirēt petikni par tihna, shi tuu nos yakaha.

18 Titim olak ich tuu ūrpa. Uje ehn poōrc hn hnīmich de ich nīhyok yeēk pwele sihna erze ley hnii pikaap hnii erze ahwoso uje profeta ochichewkite. Nos tyenij yakaha. 19 Kimiji yeēk dibite erze ley uje yērij bale heke iyuwe hn shiyokorāha yewo par uje shuu oyuwe toy, uje t̄r poōrc nehe ich otata uje wichi yērij bale. Per yeēk uje ye sowe erze ley hn shiyokorāha yewo itsorz, uje t̄r poōrc nehe ich tyenij otata uje wichi ich dich.

Jesús tata uje ye ompe otsitakye.

20 Titim olak uje erze hnakirbo uje oshiyokorāha oso erze ley uje Moisés chichewkite hn erze uje òr iluu iich otsii fariseo ochibite uje òr iluu om.

Tyenij ahakōrlo uje ich ma om je ōr ire. Kimiji ye ahakōrlo uje ich ma om ich ye etīrlo Porrosht ahirpe. ²¹ Olak entloni uje olak poruwo wishī otata otsii: “Ye tuk yeēk uhu toy pork yeēk uje shuu yet shuu toy ich tyenij otsepyēr ire.” ²² Per titim olak kinaha. Kimiji yeēk ditak deshībich ich shi itso uje chībīte ire par uje otsepyēr ire, hn yeēk uje chiyuhu lahwošo mihnuwōho leshībich ich shi itso uje chībīte ire par olak bahluwo otsepyēr ire. Per yeēk uje chiyuhu lahwošo mihnuwōho leshībich uje ich ma mihnuwō ich shi itso uje chībīte ire par uje tīr urhuta bahluta ehēt. ²³ Heke kimiji ōhwa kuchīt par uje asimīhi Porrosht per uje owa dechi hn owa eyucha uje eshībich yesh sitak owa ²⁴ ich moymīhichis erze uje ōhwa hn bo etīr ese eshībich wap par uje uhu olak aho kīisīhiye. Uje nos enshii hn eeshpo etīr ese owich hn asim Porrosht erze uje ōhwaka. ²⁵ Uje yeēk hno tīr jwe par uje denunsya olak yeēk ich tyenij sahn ijich. Uje ehñ yahpaa taachīhi jwe ikich ich tyenij nishii par uje shuu ehēt kīisīhi ire. Heke ye dībīte ire jwe hme hn ese jwe chībīte ohyerptosht hme hn wichi chīmchaha karsel ehēt. ²⁶ Titim olak ich tuu ūrpa. Ye tokolīhichis nehech nos ishī ir hñitew.

Jesús tata uje ye ompe otorāhaye.

²⁷ Titim olak kuchīt yet. Olak entloni uje otata uje ye ompe otorāhaye, ²⁸ per yok titim olak kinaha. Kimiji olak yeēk teychīm timcharrza hn shuu deyuwo mihnuwōho wate heke ir eyuwo ich shiyokōr uje mīhnikīhi wate torāha. ²⁹ Kimiji olak yeēk ir onta waāchta duhu teychīm kuche mihnuwō hn sehe duhu niyokōr, ich ma om uje iim ye teychīm shi itso uje chiyuhu nonta hn tāra pork ich ma om shi itso uje onta nohmīra je uje nos ikiyo de hn otāra ire ochībīte urhuta bahluta ehēt nehe. ³⁰ Kimiji shiyokōr uje mihnuwō shi itso uje hmata waāchta sehe duhu niyokōr erze kuche mihnuwō ich tyenij iim uje shiyokōr shi itso uje chekshehe nahmikīt hn tāra. Ma om uje shi itso uje hmata nohmīra pyerte je uje nos ikiyo de hn otāra ire ochībīte urhuta bahluta ehēt nehe.

Jesús tata uje ye ompe hñakīrbich hōr nerāhta oymye.

³¹ Titim olak kuchīt yetpo. Antkīte otata uje kimiji sehe yeēk noym nerāhta ich tyenij shiyokōr hutīta par ishīm wate hn iim. ³² Per yok titim olak kinaha. Yeēk uje iim nerāhta ich shuu wate torāha ire uje chiilabepo. Per kimiji wate torāha dabich wap hn wichi iim ire ich ye duhu wate niyokōr uje mīhnikpe pork torāha ire wap. Yeēk uje chishew asa timcharrza waa je ir abich iim hn īhi wate ahīr ich torāha wichi.

³³ Olak entlo toy uje olak poruwo wishī otata otsii: “Uje olak eyucha yeēk o kuchīt ir iich uje ebitlo olak ahwošo par uje ahakōrlo kuche ich ye alehi olak ahwošo. Tyenij ahakōrlo uhulo yakaha erze uje athīlo par ahakōrlo par eyok Irhīch.” ³⁴ Per titim olak kinaha. Uje sehe ebitlo orhōta

uje olak ahwoso ich ũru ich ye olak eyucha santo o yeëk o kuchit. Ye olak eyucha poõrc pork wichi Porrosht ir ibi, ³⁵hn ye olak eyucha nãhu ĩrmo pork wichi uje Porrosht chibite der eeych hn ye eyucha ese dit Jerusalén pork wichi uu rey pisht ir dit, ³⁶hn ye olak eyucha olak hu par uje ebitlo orhõta uje tyenij ahakõrlo nehe erze uje athiloko pork ye olak ukũrbirsh hnii par uhulo olak akirt nohmira tokole poro hnii uhulo tokole wis. ³⁷Kimiji sehe ata on: “ẽhe” ich shi on: “ẽhe.” Kimiji sehe ata uje nĩhyok ich shi ata uje nĩhyok. Uje ata uhu kihniya ich shi tãra eyuwo uje mihñũwo.

Jesús tata uje ye ompe ochiyuhu labahat.

³⁸Titim olak kuchit yet. Olak entloni uje otata otsii: “Uje yeëk shuu olak onta ich tyenij oshuu wichi onta toy, hn uje yeëk shuu olak potëre ich oshuu wichi potëre toy.” ³⁹Per titim olak tuu kinaha. Kimiji yeëk niyokõr mihnikĩhi olak ich ye ontilo ire. Kimiji yeëk duhu eerza ich amtis par duhu pit yet. ⁴⁰Uje yeëk denunsya olak yeëk hn sehe doy nerpta ich ishĩm asa nanerpta yata toy waa je chĩra hmamo. ⁴¹Kimiji yeëk tatim olak yeëk par uje ihyõk ir kuchit seya un kilometro ich shuu iyuwe un kilometro ma. ⁴²Uje yeëk dapur olak yeëk kuchit ich ishĩm ire. Kimiji sehe yeëk dahla olak yeëk kuchit ich ye narhak.

Jesús tata uje otsahmũr namãho.

⁴³Olak entloni uje otata otsii: “Ahmũrlo erze uje ode olak ahir hn etaklo olak imãho.” ⁴⁴Per titim olak kinaha. Ahmũrlo erze olak imãho hn olak orar par erze uje shish oshiyokos olak ⁴⁵heke ich imeheeych uje olak Porrosht aabo. Wichi uu olak Deych uje de poõrc. Ahakõrlo uhulo itsorz pork wichi uje shuu deeych tokole chihit erze uje oshiyokõr mihñũwo hn erze uje oshiyokõr om. Wichi uje shuu ibik par erze uje õr iluu om hn par erze uje õr iluu mihñũ. ⁴⁶Per kimiji shi ahmũrlo erze uje otsahmũr olak ich nihyok olak premyo. Kimiji ahakõrlo uje itsorz ich shi olak itso erze uje õr kobra hnote par gobierno. Wir shi otsahmũr erze uje otsahmũr õr toy. ⁴⁷Kimiji shi etilo olak leshibo uje erahalo õr ich ye ahakõrlope uje ma om je erze uje ye onahmũr Porroshtpe. Wir oshiyokõr oshuu itsorz toy. ⁴⁸Uhu olak iluu om itso olak Deych uje de poõrc pork wichi ir iluu om.

Jesús tata uje otakashim yewo per ye onarim ire.

6 ¹Titim olak. Abeylship olak. Ich om ahakõrlo uje om per ich ye ompe ahakõrlo uje om shi par uje uhulo oso oteychim olak. Kimiji ahakõrlo shi par uje oteychim olak ich olak Deych uje de poõrc ye dosim olak premyope.

²Heke uje asimlo oso õr kuche ich ye atimlo yewo uhulo itso uje abitilo trompeta par yewo oteychim olak ilo erze uje õr aho yũhirsh. Wir

oshiyokōr oshuu itsorz sinagoga aho hn erze daho uje de duwo aho toy par uje oso oteychim ōr hn onarim ōr. Titim olak ich tuu ūrpa. Wichī uu ōr premit uje oso oteychim ōr. ³Per uje olak yeēk dosim yeēk kuchit uje ir nesita ich ye ompe tatim yewo uje shiyokōr shuu itsorz shi itso uje ye duhu nahmita waachjārrza diraha uje hmata waächta shiyokōr. ⁴Heke ye duhu latik diraha. Shi ir Deych uje de poōrc wichī teychim uje shiyokōr hn ye dibite orhōta heke wichī chibite orhōta uje ishim ir premit.

Jesús shiyokorāha dakile par ōr orar.

⁵Titim olak. Uje olak orar ich ye uhu olak ilo erze oso yewo uje ōr aho yūhirsh. Wir otsahmūr uje oyehetihi sinagoga aho hn ōr orar, hn oyehetihi dehet uje oso okihniya ochikāha hn ōr orar shi par uje oso oteychim ōr. Titim olak ich tuu ūrpa. Uu ōr premit uje otserz wichī uje oso oteychim ōr. ⁶Uje sehe olak yeēk orar ich masaha pwert ehēt hn shiyeru uhurza hn orar sapur ir Deych Porrosht. Wichī teychim uje shiyokōr hn teychim uje ye dibite orhōtape heke Porrosht chibite orhōta uje ishim ire premit.

⁷Uje olak yeēk orar ich ye duhu lahwošo deeshi deeshi. Ye jukur pork uje shiyokōr shuu itsorz ich shiyokōr itso erze uje ye odīraha Porroshtpe. Wir ōr eyuwo tišir uje ese uje ochii ōr porroshtihi chunt ōr uje otata lahwošo oduhu deeshi deeshi. ⁸Ye uhu olak ilo ōr pork olak Deych chiraha uje olak nesita uje ehn yahpaa apurlo irpe. ⁹Uje olak orar ich uhulo ilorz:

“Dii Porrosht uje owa de poōrc, oyahmūr uje nos otola eeych.

¹⁰Oyahmūr uje erēt par nos abey oso. Sehe oyuhu oniyokōr uje ahmūr ele hnimich eeych shi itso uje oshiyokōrīhi wahacha poōrc.

¹¹Kal deeych asim ōryok poso uje ōryok nesita

¹²hn owa perdonar ōryok erze kuche mihnuwo uje oyiyokōr pork ōryok perdonar erze uje oshiyokōr mihnuwōho ōryok.

¹³Ye uhu oyitir ese owich nok yeēk duhu oyiyokōr uje mīhnik.

Akashim ōryok par uje ye oyiyokōr uje mīhnik pork shish owa Rey. Shish akirbo de, hn owa dich. Shi erze uje oyapur owa.”

¹⁴Uje olak perdonar erze yewo uje oshiyokōr mihnikīhi olak ich olak Deych uje de poōrc perdonar olak toy.

¹⁵Per kimiji ye olak perdonar yewo uje oshiyokōr mihnuwōho olak ich olak Deych ye perdonar olakpe erze kuche mihnuwo uje ahakōrlo.

Jesús tata uje oshiyokōr uje oym dabiso par ōr orar.

¹⁶Titim olak. Uje moymlō olak poso par uje olak orar ich ye uhu olak ile yerh hn olak dosdarak itso uje wir oshiyokōr erze oso uje ōr aho yūhirsh. Wir oshuu dele yerh hn ōr dosdarak uje oym labiso par uje oso oteychim ōr. Titim olak ich tuu ūrpa. Uu ōr premyo uje otserz wichī uje

oso oteychim òr. ¹⁷Uje moymlò olak poso par uje olak orar ich erhũlo olak ile hn arzlo olak hu ¹⁸par uje erze oso ye odiraha uje moymlò olak poso per olak Deych uje de poòrc uje nĩhyok yeẽk pwele teychim ire, wichi umo uje ahakòrlo hn ye ebitlo orhòta uhulo itsorz heke wichi chibite orhòta uje ishim olak premyo.

Ich om ochihmer ir kushjaròho wahacha poòrc.

¹⁹Titim olak. Ye etiyèrlo olak kushjaròho nãhu ãrmo pork tyenij ihñero tew hn erze olak kuche yewo ichesh taata hn sihna ire. Echiko otirèt hn otorha. ²⁰Ma om uje etiyèrlo olak kushjaròho wahacha poòrc. Wahacha ye ihñero tepe hn erze olak kuche yewo ye icheshpe taata hn sihna ire hnii echiko ye omasaha wahachpe hn otorha. ²¹Nos oso shish oshuu deyuwo tisĩr ese owich uje òr kushjãro de. Kimiji olak kuche shi de lika ãrmo ich shi olak eyuwo tisĩr ahnũwo ãrmo per kimiji chihi poòrc ich olak eyuwo tisĩr wahacha poòrc.

Porrosht aabo òr iluu shi itso lampirra.

²²Titim olak. Olak ile shi itso nampirra uje chihit lekitiyo pork olak pwele eychĩmlo lekitiyo. Kimiji olak ile teychim lekitiyo ich erahalo uje ich ùru heke olak ile ich om, ²³per kimiji ye erahalo uje ich ùru ich shi itso uje ye olak pwele eychĩmlo lekitiyope. Ich shi itso uje erkĩhilo dihlelta pork olak iluu mihñũ. Asa dihlelta ich dihlel data.

Ye ompe uje òr yĩnsiro òr osiyer.

²⁴Titim olak uje ich ye ompe uje yeẽk shuu nensiro òr osiyer. Tyenij tokole uje sitak yet hn sahmũr yet, o kimiji shuu yet ma dich hn shuu yet ye jukur. Heke uje enahalo olak par erzlo hnote ich ye olak pwele uje enahalo olak par ahakòrlo Porrosht ir ibiyo.

Porrosht chiraha tibey daabo.

²⁵Heke titim olak. Ye olak prekuparihi erze kuche uje olak nesita par olak ikirĩt. Ye olak prekuparihi olak poso hnii uje ehelo hn ye olak prekupar olak ishuwo par uje anãhalo. Olak ikirĩt ma bale je olak poso hn olak ikirĩt ma bale je olak ishuwo. ²⁶Hmeychĩmlo erze chipirme uje iyohochis poòrc pehet. Wir ye dukwèr jòrope hn ye dekushpe hn ye nihmerpe erze jòro uje chekushu hn chĩmchaha ir owich par tibey. Shi olak Deych uje de poòrc wichi uje ishim poso par uje tew. Olak ma bale je erze chipirme. ²⁷¿Yeẽkpo olak ehete uje prekupar ire hn pwele shuu dekirĩt ma berzak?

²⁸Ye ompe uje olak prekupar olak ishuwo. Hmeychĩmlo erze floro uje de hmonte. Wir shi krese. Ye dishew obiyo hn ye niyokòr òr ishuwope. ²⁹Titim olak uje rey Salomón ir ishuwo wir ich ihĩrts pisho, per erze

floro ich ma ihĩrtso. ³⁰Porrosht shuu erze floro tokole ich ihĩrts pisho shi itso uje shuu iyāha lasuwo uje ich ihĩrtso. Ele deeych ich wir ihĩrtso per deychole hn ĩya erze ihnemyo hn ochimchaha kipuut par uje otsēru. Porrosht shiyokōr erze floro ihĩrtso shuu itsorz heke wichi ishim olak ishuwo toy per otiislo uje ire ishim olak itsorz.

³¹Heke ye olak prekuper uje olak nesita. Ye atimloye on: “¿Keshi oyuhu tāra irāāpo par uje oyahu hn uje oyoho?” Hn ye athilo uje ¿keshi uhulo olak ishuwo tāra irāāpo par uje anāhalo? ³²Nos wir erze uje ye odiraha Porroshtpe ōr prekuper irehe erze kuche. Olak Deych uje de poōrc chiraha uje olak nesita erze kuche. ³³Ma om tyenij enahalo olak uhulo ma okihniya omasaha par Porrosht aabo par uje wichi tibey ōr hn enahalo olak par uhulo Porrosht aabo ōr iluu ma ilo Porrosht iluu hn nos ishim olak erze kuche uje olak nesita. ³⁴Heke ye olak prekuper uje olak nesita par deychole. Moymlo par deychole. Porrosht tyenij tibey olak deychole toy.—

Ye ompe uje yeēk shuu ire itso jwe.

7 ¹Eseekite hn Jesús tatim dakile im: —Ye eychimlo olak leshibo hn olak nanime uhulo olak ilo jwe. Kimiji uhulo olak ilo jwe uhulo itsorz ich yet de uje shuu ire itso jwe par teychim olak. ²Porrosht wichi jwe uje tyenij teychim olak shuu itsship uje ahakorihilo ōr. Itso uje epiyerlo ōr ich Porrosht shuu seētship uje shiyokōrhi olak. ³¿Inaapo heke olak yeēk teychim deshībich uje shiyokōr kuche mihñūwo pikaap itso uje phich ukult de ir onta per ye duhu deyuwo tisirihī irpe ese uje itso kutich uje de ir onta? ⁴¿Inaapo heke tatim deshībich im: “Erēt sham, par tiyuhu ese uje itso phich ukult uje de onta?” Per ese uje tatim ire ich itso uje kutich de ir onta. ⁵Wichi ehēt yūhurash. Wap tyenij chiyuhu ese uje itso kutich uje de ir onta par uje pwele teychim ese uje itso phich ukult uje de leshībich onta. Heke wichi pwele chiyuhu.

⁶Erze oso uje ye onahmūr otēr Porrosht ahwoso wir shi ōr itso poyto hn poohle. Ye atimlo ōr erze uje ich om uje Jesús shiyokōr par olak. Uje atimlo ōr ich shi itso uje ārlo kojano uje ich ihĩrtso hn debich hn erze poohle tarāha hnimo hn somtis ire par ches olak.

Ich om uje shish otsapur kuche.

⁷Titim olak. Shish apurlo hn de uje ishim olak. Shish ekwilo ich eshilo. Shish tuklo asa pwert uhurrza ich sitsēr ire par olak. ⁸Pork ese uje shish sapur ich yet ishim ire, hn ese uje shish chukwi ich chish, hn ese uje shish shuu asa pwert uhurrza ich yet sitsēr par ire. ⁹¿Je olak yeēk chīhi uje ir ijit sapur pan hn ishim kojach? ¹⁰O kimiji lapur loshit ¿je doshim echeēt? Nīhyok. ¹¹Olak iluu mihñū per shish asimlo olak aabo erze kuche uje om. Olak Deych uje de poōrc ma sahmūr ishim yeēk kuche uje om uje sapur ire.

¹²Uje ahmūrlo oso oshiyokorīhi om par olak ich tyenij ahakōrlo uje om par ōr ire. Uje ahakōrlo itsorz ich ahakōrlo uje Porrosht ir ley tata hn ahakōrlo erze uje ir profeta poruwo wishi ochichewkite.

Jesús itso uhurrza waa je ijaap.

¹³Titim olak par ekāhalo asa uhurrza waa je ehēt ijaap pork asa uhurrza waa je data hn ese dehet uje dich wichi uje seya ōr urhuta bahluta ehēt. Ich oso okihniya uje yesh ochikāha. ¹⁴Per asa uhurrza waa je ehēt ijaap hn ese dehet uje ijaap wichi uje seya ōr ese owich uje ikirīt de uje yelij nihna ire. Ich kwespa par oso ochikāha ese dehet hn ōr arhaabo uje ochish asa uhurrza.

Porrosht aabo otibey ire par uje oso ye onehnyēr ōr.

¹⁵Titim olak. Abeylship olak par uje ye wir onehnyēr olak erze uje ochii ire profetaha. Wir otirēt otir olak shi itso uje ōr om itso obeje per ōr aho ich shi itso ilpiyo uje ehñito. ¹⁶Erze uje ōr ire oshiyokōr shuu imeheeych uje ye ōr profetape. ¿Je eeshilo onakatuwo hn ir ee uva? Nihyok. ¿Je eeshilo yiliche hn ir ee naranje? Nihyok. Kuche uje om ye tāra ōrpe. ¹⁷Nos wir pohir uje om ich ir ee om, per erze pohir uje mihñū ich ir ee ye ompe. Erze profeta wir shi ōr itso pohir uje ir ee mihñū. ¹⁸Erze pohir uje om yelij ir ee mihñū hñii erze pohir uje mihñū yelij ir ee om. ¹⁹Nos wir pohir uje ir ee ye ompe ich ohyo hn ochimchaha jwekita ehēt, ²⁰heke uje eychimlo erze uje ochii ire profetaha oshiyokōr ich erahalo wir ōr iluu kimiji om o kimiji mihñū.

Ye nos ōr Porrosht aabo pe erze uje otsii: “Irhiche.”

²¹Titim olak uje ich okihniya uje otatim yok otsii: “Irhiche, Irhiche” per ye nos otir Porrosht ahirpe. Shi erze uje oshiyokōr uje Papa sahmūr, wir uje otir irehe wahacha poōrc nehe. ²²Uje terihi ese deeych nehe ich okihniya uje otatim yok otsii: “Irhiche, Irhiche, shish oyanimirāha ahwoso oyāra eeych, hn oyiyuhu demonyo oso ōr aho oyāra eeych, hn oyiyokōr kuche ich kihniya uje ye latik pwele shiyokōr oyāra eeych.” ²³Uje otatim yok itsorz ich tyenij titim ōr too: “Ye tikiraha olak otiyo. Olak uje ahakōrlo uje mihñūwo atokolihilo pikich.”

Oso ode uje ōr eykdeyo hn yewo ye ōr eyuwīrsh.

²⁴Titim olak. Yeēk uje chunt pahwoso hn shiyokōr uje tiita, wichi shi itso hñakirbich uje eykdeyo uje shiyokōr lahuch. Wap chihñtsa jotse nehech chish kojach hn shiyokōr lahuchihñi eeych. Ese kojach shi titeēta yok. ²⁵Uje ibik hn kresyent tīr poōrc hn myent tibichu ese pwertit per ye nehñimichpe pork wichi shiyokorīhi kojach eeych.

²⁶Per yeēk uje chunt pahwoso hn ye niyokōrpe ich wichi shi itso hñakirbich uje ye eyuwīrsh uje shiyokōr lahuchihñi erent eeych. ²⁷Uje

ibik hn kresyent tĩr poõrc hn myent tibichu ese pwertit hn sehnimich ich sihna ire.—

²⁸Uje Jesús sihna lahwošo uje shiyokorāha erze osoko ich ochishlabe uje shiyokorāha õr ²⁹pork shiyokorāha õr shi itšo yeẽk uje ir ukurbo de pork ir ukurbosh. Erze uje oshiyokorāha oso waa ley waa je Moisés chichewkite yelij oniyokorāha oso oduhu ilorz.

Hnakirbich uje lepra tew.

8 ¹Eseekite uje Jesús ihnimichihichis wĩrit eeych ich oso okihniya uje õya ire. ²Hnakirbich sitĩr ire uje lepra tew. Wichĩ icha dete hnimoho Jesús ikich hn tatim im: —Irhĩche, kimijĩ ahmũr ich sehe tuu ekuta yok pork owa akirbo de par ahakõr.—

³Jesús chĩbite nahmita eeych hn tatim im: —Tahmũr heke tuu owa owich om.— Ichii ese lepra nihyokõho ir yũhurrza. ⁴Jesús tatim im: —Hmeychĩm, ye atim latik uje tiyokorĩhi owaka. Shi etĩr saserdote hn owa ire eyũhurrza hn asim ire obejit itšo uje Moisés tatakite par ena Porrosht par uje nos oso odiraha uje lepra nihyokõho eyũhurrza.—

Jesús chukuta erze ohyerptoso õr bahlut ir ibich.

⁵Eseekite uje ehn Jesús masaha dit Capernaum hn ohyerptoso õr bahlut tirẽt tĩr ire. Sapur ire ⁶im: —Irhĩche, pibich de wahacha pihyuch ich permpa. Pilich worbit yakaha ire. Yesh de darpich eeych ich dospa.—

⁷Jesús tatim im: —Takaha hn tukuta ire.—

⁸Per ese ohyerptoso õr bahlut tatim im: —Irhĩche, owa dichpa. Ye yok dichpe par tuu amsaha pihyuch ehẽt. Shi eyuhu ahwoso ich wichĩ owich om ⁹pork yok bahuwo ode uje ma õr deyo je yok. Uje otatim yok kuche ich tiyokõr. Hn ohyerptoso ode pihme par tikibey õr. Uje titim sohmet too: “bo” ich hno. Uje titim yet too: “erẽt” ich tirẽt. Uje tuu pibich shiyokõr kuche ich shiyokõr.—

¹⁰Uje Jesús chunt uje wichĩ tata ich chishlabe. Tatim erze oso uje õya ire im: —Titim olak ich tuu ũrpa. Ye tish israel oso yeẽkpe uje itšo ele hnakirbich uje ye lotiis yokpe. ¹¹Titim olak uje okihniya otirẽt nehe otāra deeych warĩch yit hn otāra uje deeych yakaha yit par uje wir otaakihĩ nemest wirc wahacha poõrc Abraham lishi ahĩr hn Isaac lishi hn Jacob lishi. ¹²Tikirẽtni hn titim oso ich okihniya par otĩr Porrosht ahĩr nehe per ye onahmũrpe. Wir uje tyenij otāra õr ochibĩte õr ejwert dihlelta ehẽt nehe. Tyenij oyerh hn oches labĩterẽhe wahacha pork ich dospa.— ¹³Jesús tatim erze ohyerptoso õr bahlut im: —Bo eyhi. Ye otiis yokpe heke tiyokõr uje atim yokike.—

Shi yehe wate orta uje tatim ichii ese ir ibik owich om.

Jesús chukuta Pedro ir ohota.

¹⁴Eseekite hn Jesús masaha Pedro ihyuch hn umo Pedro ohota. De darpich eeych permo, aat duhlu. ¹⁵Jesús sahahir wate hmata hn chukuta. Ich ye aat duhlpe. Iyehet hn sar ör poso.

Jesús chukuta oso ich okihniya.

¹⁶Eseekite uje ich deeych yaka hn otōhwa oso ich okihniya uje demonyo de ör aho otseya ör Jesús. Jesús tatim erze demonyo uje de ör aho hn shuu tokole. Nos chukuta erze uje ör permo toy. ¹⁷Uje Jesús shiyokōr shuu itsorz ich shuu yakaha uje profeta Isaías tatakite pork tata im: —Wichi uje chiyuhu eyok dosīryo hn chukuta eyok uje eyok permo.—

Jesús keytkēr erze uje sehe onōya ire.

¹⁸Eseekite uje Jesús umo erze oso uje okihniya ochipeēsa ire hn tatim dakile im: —Yukulo yitirlo lagunta pit yet.— ¹⁹Hn hnakirbich uje shiyokorāha oso waa ley waa je Moisés chichewkite sitir ire Jesús hn tatim im: —Maestro, tokōya owa titir uje etir.—

²⁰Jesús tatim im: —Watsitse uuwo de hn chipirme uje iyoho poōrc pehet ir uuwo de toy per yok uje tokōra poōrznī nīhyok owich uje tokotsa pārz hñimichihi.—

²¹Jesús ir akilt yet tatim im: —Irhiche, wap sehe titir pihyuch. Uje papa toy nehe tihitsim hn tokōya owa.—

²²Per Jesús tatim im: —Mēya yok. Erze uje ye odiraha Porroshtpe wir shi ör itso topo. Moym par uje wir odihitsim ör.—

Jesús shuu myentita hn owit wokor iyehe.

²³Eseekite hn Jesús dohir pohorrza ehēt hōr erze dakile hn ohno. ²⁴Wisik wisik hn myent data tibichu. Shuu erze owit wokor deyo masaha asa pohorrza ehēt. Ich sehe duhu yaka, per Jesús shi umo. ²⁵Ir akile otir ire otsiniyēr. Otatim otsii: —Irhiche, akashim ōryok. Yej eyok yaka.—

²⁶Jesús tatim ör im: —¿Inaāpo heke atililo? Yesh olak koswāha yok.— Uje tatim ör shuu itsorz hn iyehet tatim asa myentita hn erze owit wokor par shuu iyehe. Ich asa myentita iyeheship hn asa onoota wokor iyehepo.

²⁷Ör ire ich ochishlabe. Otatimye otsii: —¿Latik ukurbo uje de ire heke asa myentita hn owit wokor chunt ire?—

Jesús chiyuhu demonyo gadara oso ör aho.

²⁸Eseekite uje Jesús taachihni lagunta pit yet gadara oso ör hñimich hn hnakirbo ör osiyer uje demonyo de ör aho otokolihni dukuta otir Jesús. Wir ich ör ehñito pisho heke nīhyok uje yeēk chikāha ese dehet. ²⁹Wir otatim Jesús ich otsihñew lahwošo otsii: —Owa uu Porrosht Ijit. ¿Inaāpo

heke erēt etīr ele owich uje ōryok de? ¿Je erēt par epiyer ōryok? Yahpaa terihi ishirīte.—

³⁰Ich poohle kihniya taakihichis meytii dukulehe ōr. ³¹Erze demonyo otatim Jesús otsii: —Kimiji eyuhu ōryok ich uhu oyomsaha erze poohle aho.—

³²Jesús tatim erze demonyo im: —Bolilo.— Heke erze demonyo otokolihi erze hnakirbo ōr aho hn ohno otīr erze poohle. Ichii erze poohle uushi. Ese wīrit uje wir de ich ilyaka. Nos uushi masaha awit hn yaka.

³³Erze hnakirbo uje otibey poohle ooshi otīr dit ehēt hn otatim erze oso nos wir kuche uje tokolihi erze poohle hn uje tokolihi erze hnakirbo toy uje demonyo de ōr aho. ³⁴Nos wir oso uje odechi dit ehēt otokole hn ohno otīr ese owich uje Jesús de. Uje omo ire hn otatim otsii: —Atokolihi lika.—

Jesús chukuta hnakirbich uje pīlich worbīt yakaha.

9 ¹Eseekite hn Jesús dohir asa pohorrza ehēt cheeshpo tīr lagunta pīt yet uje dit dechi uje ire debuhu. ²Ich oso otōhwa hnakirbich uje pīlich worbīt yakaha ire otseya Jesús. Shi de darpich eeych. Uje Jesús teychim uje ye olotiis irpe hn tatim ese uje pīlich worbīt yakaha im: —Pijite, uhu ehēt kiis pork yok perdonar nos erze kuche mihnūwo uje ahakōr.—

³Erze hnakirbo uje oshiyokorāha oso waa ley waa je Moisés chichewkite ōr aho chiilehet otsii: —Jesús shi chiinehnm Porrosht.—

⁴Per Jesús nos chiraha erze uje oshuu deyuwo tisīr. Tatim ōr im: —¿Inaāpo heke uhu olak eyuwo tisīr uje mihnūwo? ⁵Uje titim ire uje yok perdonar erze kuche mihnūwo uje shish shiyokōr ich ye imeheeychpe kimiji pukurbo chīhi o kimiji nīhyok. Per uje titim ire too: “Alehet, erk” ich imeheeych uje pukurbo de pork tyenij iyeheh hn dirk. ⁶Yok tokōra poōrznī. Tokowa olak uje pukurbo de uje yok de lika ĩrmo par uje yok perdonar yeēk uje shiyokōr mihnūwo.— Hn Jesús tatim ese uje pīlich worbīt yakaha im: —Alehet. Asew ese eteno hn bo eyhi.—

⁷Ese uje pīlich worbīt yakaha iyeheh hn hno seyhi. ⁸Uje erze oso omo uje itsorz ich ochishlabe hn oteeychāha Porrosht pork wichi uje ishīm Jesús ir ukurbo par uje ire perdonar oso.

Jesús tibii Mateo par uje ĩya ire.

⁹Eseekite uje ehn Jesús hno ich umo hnakirbich uje iich otsii Mateo uje sakaha owich hn kobra nahnapsō ōr hnote par gobierno. Jesús tatim im: —Mēya yok.— Iyeheh hn hno ĩya ire.

¹⁰Eseekite uje ehn Jesús hōr dakile otaakīhi pwert ehēt hn hnakirbo okīhniya uje ōr kobra hnote par gobierno otaakīhi ōr ahir toy hn yewo

otaakihi toy uje òr iluu mihnũ. ¹¹Erze uje òr iluuta iich otsii fariseo omo Jesús uje taakihi wir òr ahir hn otatim erze ir akile otsii: —¿Inaãpo heke olak maestro taakihi wir òr ahir erze uje òr kobra hnote par gobierno hn erze oso yewo uje oshiyokõr mihnũwo?—

¹²Uje Jesús chunt uje wir otata hn tatim òr im: —Erze uje ye òr permope ye òr nesita lotorpe. Shi erze uje òr permo wir uje òr nesita. Erze oso uje otaakihi pahir wir shi itso uje òr permo heke òr nesita lotor. ¹³Bolilo ahakorãha olak uje Porrosht ahwoso tata shuu itsorz im: “Porrosht im: Eenilo uje yeëk losuhlaab hn akashimlo ire. Wichì uje ma om je uje tukulo loshipit par eeychãhalo yok.”— Hn Jesús tatim òr im: —Tikirẽtni ye par tokosir erze uje oshiyokõr uje om shi par tokosir erze uje oshiyokõr mihnũwo.—

Jesús akile ye noym dabiso par oteeychãha Porrosht.

¹⁴Eseekite hn Juan uu tohirm oso ir akile otsiir ire Jesús hn otatim otsii: —Õryok hn erze fariseo shish oyukwim õryok poso par õryok orar. ¿Inaãpo heke akile ye onoym labisope par uje òr orar?—

¹⁵Jesús tatim òr im: —Uje yeëk chiileku hn shiyokõr òr ahamich ich oso otir ese ir ahamich. Uje ehn wichì de òr ahir ich ye òr dosdarakpe hn ye onoym labisope. Deeych yet nehe hn yewo ohnoy ese hnakirbich uje chiileku heke erze uje ode ir ahamich oym labiso pork ich òr dosdarak.—

¹⁶Hn Jesús tatim òr uje ir ahwoso ich ahlo hn ye ompe ìya erze òr iluu iler. Tatim òr im: —Nìhyok yeëk uje chichew lasuwo obilo chira bortisht uje ichirãha pork ese bortisht uje ahle shuu wir tiryè hn shuu ese bortisht ilaro kara hn shuu obilo ma deyo. ¹⁷Nìhyok ye latik chihi uje sanuwãha wint ahlt kwer iler ehèt uje itso boteyle pork ese wint ahlt tyenij shuu potita nehech shuu kara hn ese wint noshihi lekitiyo. Heke ese wint ahlt tyenij otsanuwãha erze kwer ahle ehèt pork ye karape.—

Jesús chukuta timcharrza hn Jairo ijita.

¹⁸Eseekite uje ehn Jesús chiilehet hn israel oso òr bahlut taãcha. Icha dete hnimoho Jesús ikich hn tatim im: —Pijita toki per kimiji erèt hn ebite ahme wate eeych ich ikpo.—

¹⁹Jesús iyehet hn hno ìya ire. Ir akile òya ire toy.

²⁰Ich oso okìhniya oyehe nër hn timcharrza dechi òr ahir. Ich dose ãyo uje wate permo, ir armitsi ihnimich. Sitir ire Jesús tãra nër. Sakahir nerpta irhi ²¹pork ehèt chiilehet im: —Uje shi takahir ir nerpta ich yok owich ome.—

²²Jesús somtis ire hn teychim asa timcharrza. Tatim im: —Pijita, uhu ehèt kiis. Shi pork ye otiis yokpe heke tuu owa owich om.— Ichii asa timcharrza owich om.

²³Uje Jesús taachìhi ese òr bahlut ihyuch hn umo erze uje otsobita flawta hn erze uje oyerh ohye asa waa je toki. ²⁴Tatim erze oso im: —

Atokolihĩ likilo pork asa pikihninta ye tope, shi umo.— Erze oso shi oyana Jesús. ²⁵Uje ochiyuhu erze oso òr ejwertike hn Jesús masaha pwert eheth hn chishew asa pikihninta hmata hn wate iyehet. ²⁶Ese uje Jesús shiyokòr ich chũr lekityo ese hnimich.

Jesús chukuta hnakirbo uje òr olibo.

²⁷Eseekite uje Jesús tokolihichis hn olibo òr osiyer oyehe ner. Otatim Jesús ich otsihnew lahwo so otsii: —Jesús, owa uje āra owa porokkite rey David. Sehe oyuhu osir òryok.—

²⁸Uje Jesús masaha pwert eheth ich erze hnakirbo uje òr osiyer uje òr olibo otsitĩr ire. Jesús tatim òr im: —¿Je ye otiislo yok uje yok pwele tuu olak owich om?— Otsii: —Ēhe, ĩrhiche.— ²⁹Jesús sakahir òr ile hn tatim òr im: —Kimiji ye otiislo yok ich tuu olak owich om.—

³⁰Ichii wir omo lekityo. Jesús tatim òr ich sihnew lahwo so im: —Ye atimlo latik uje tukuta olak.— ³¹Per uje otokolihichis ich otatim oso oshuu chũr lekityo ese hnimich uje Jesús chukuta òrke.

Jesús shuu hnakirbich chiilehet uje ĩrpik.

³²Eseekite uje ehn Jesús hōr dakile otokolihĩ pwert eheth ich oso otōhwa hnakirbich uje ĩrpik, demonyo de ire eheth. ³³Uje Jesús chiyuhu ese demonitike ese hnakirbich eheth uje ĩrpik ich wichĩ chiilehetpo. Erze oso okihniya uje odechĩ ich ochishlabe uje wichĩ chiilehetpo. Otata otsii: —Yelij oyumo uje itsorz ele israel oso òr hnimich.—

³⁴Per erze uje òr iluu iich otsii fariseo otata otsii: —Uu demonyo òr bahlut wichĩ uje ishĩm Jesús ukurbo par chiyuhu demonyo.—

Jesús chuuna uje oso òr losuhlaabo.

³⁵Eseekite hn Jesús hno tĩr nos wir duwo uje deyo hn ijaabo hn shiyokorāha oso òr sinagoga aho. Tatim òr ahwo so omo uje ich yej terihĩ uje Porrosht tibey oso hn nos chukuta erze uje òr permo kināho kināho. ³⁶Uje Jesús umo erze oso uje ich okihniya ich chuuna uje òr losuhlaabo. Wir shi òr itso obeje uje obilosh pork nĩhyok yeēk uje tibey. ³⁷Heke siteēta tatim erze dakile im: —Erze oso ich okihnipa shi òr itso jōro uje kihniya uje ta par ochekushu hn olak shi olak itso erze uje ochekushu. Porrosht wichĩ shi itso ese jōro yĩnsirc. Erze uje tyenij ochekushu shi òr arhaabo. ³⁸Apurlo ese jōro yĩnsirc par uje shuu ma okihniya par otĩr ochekushu erze jōro.—

Jesús shuu dakile ohno otsanimirāha lahwo so.

10 ¹Eseekite hn Jesús tibii dakile uje òr dose par otĩr ire. Ishĩm òr ukurbo par shuu ochiyuhu erze ichĩbiyo mĩhnũwo oso òr aho hn ishĩm òr ukurbo par ochukuta erze uje òr permo kināho kināho. ²Erze

apóstole uje òr dose wir erze. Uu webich osht iich otsii Simón. Ir iich yet otsii Pedro. Ese apostol yet iich otsii Andrés. Wichì Pedro leshap. Erze apóstole yewo òr iiyo otsii Santiago hn ir leshibich uje iich otsii Juan. Wir Zebedeo aabo. ³Erze apóstole yewo òr iiyo otsii Felipe hn Bartolomé hn Tomás hn Mateo. Wichì uje kobra nahnapsò òr hnote par ishim gobierno. Apostol yet iich otsii Santiago. Ir deych iich otsii Alfeo. Apóstole yewo òr iiyo otsii Tadeo ⁴hn Simón. Wichì politikya. Hn ese apostol uhurc osht iich otsii Judas Iscariote. Wichì uje tyenij chiwāha Jesús.

⁵Wir erze dose uje Jesús shuu ohno otír lekitiyo. Tatim òr im: —Ye ekahalo erze dihipo kināho òr laho, hn ye etírlo erze samaria oso òr duwo. ⁶Shi etírlo erze israel oso. Wir shi òr itso obeje uje pyerte. ⁷Uje etírlo lekitiyo ich shish atimlo oso uje ich yej terihi uje Porrosht shuu oso omasaha par ir aabo. ⁸Ekutulo erze uje òr permo, hn erze uje otoy ich uhulo òr ikpo. Ekutulo erze uje lepra yakaha òr hn eyuhulo demonyo uje de oso òr aho. Erze ukurbo uje tokosim olak ye bahatikish heke uje ekutulo oso ich ye ebitilo bahat. ⁹Ye bolilo olak hnote uje oro, plata hn kobre. Ye emchahalo olak ihiroso iljer ehèt. ¹⁰Ye bolilo kotsirbo hn ye bolilo olak ishewo yewo. Ye bolilo olak erihyo yewo hn olak itile pork yeék uje chishew obiyo tyenij oshim ire uje tew.

¹¹Uje aachihilo dit dich o kimiji dit jjaap ich ekulo yeék uje iluu om hn akahalo ir ihyuch nehech atokolihilo ese dit. ¹²Uje aachihilo ir ihyuch ich etilo òr par uje uhulo òr aho kiis. ¹³Kimiji ese pwert yinsirc om ich erze olak ahwoso shuu òr aho kiis per kimiji ye òr iluu om ich ese uje ehèt kiis cheeshpo tír olak. ¹⁴Kimiji ye onahmūr uje akahalo òr ihyuch hn ye onahmūr otēr olak ahwoso ich atokolihilo òr ihyuch o kimiji ese dit hn eshitlo ese hnimich ukult uje de olak hnite par yara par òr. ¹⁵Titim olak ich tuu ūrpa. Uje terihi ese deeych nehe uje erze dit oso otír Porrosht ile ikich ich ma sepyēr òr je uje tyenij sepyēr erze duwo Sodoma hn Gomorra oso.

Oso tyenij oloter Porrosht aabo nehe.

¹⁶Titim olak uje tuu etírlo erze oso òr ehèt shi itso uje tuu obeje tír ilpiyo ehèt. Uhu olak eykdeyo ilo echire hn uhu olak ilo paloma uje masaabo. ¹⁷Abeylship olak pork hnakirbo uje òr ehñito tyenij oshim olak erze òr bahluwo hn yewo otsepyēr olakihì sinagoga aho, ¹⁸hn yewo tyenij ohnoy olak otseya olak gobernador òr ikich hn erze reye òr ikich toy shi pork ye otiislo yokpe. Atimlo erze òr bahluwo uje tiyokōr par olak hn atimlo erze dihipo kināho toy. ¹⁹Uje ohnoy olak otseya olak òr bahluwo ikich ich ye olak prekupar uje keshi uhulo inaāpo par ekitkērlo òr pork uje terihi orta par ekitkērlo òr ich Porrosht shuu erahalo uje atimlo òr ²⁰pork ye tāra olakpe uje ey olak uhut. Shi olak Deych Porrosht ir Ichibich uje chiilehetihì olak aho.

²¹Deeych yet nehe hn hnakirbich tyenij denunsya deshībich par shuu oshuu oshuu toy shi pork deshībich Porrosht aap, hn hnakirbich tyenij denunsya daabo par shuu oshuu ōr oshuu otoy, hn ode uje tyenij ōr denunsya deych hn data par shuu oshuu ōr oshuu otoy. ²²Nos wir oso tyenij otsitak olak shi pork ye otiislo yokpe, per yeēk uje ewenta hn shish ye lotiis yok nehech terihi uhurc nehe ich wichi ir owich de Porrosht ahir. ²³Uje oshiyokorīhi olak kuche mihñūwo dit ehēt ich olak yuhwo etārlō dit yet. Titim olak ich tuu ūrpa. Uje ehn yahpaa nos etārlō erze israel oso ōr duwo ich yok uje tokōra poōrzni tyenij takaashpo titīr hnimich.

²⁴Nīhyok yeēk uje ma chiraha je ir maestro hn nīhyok yeēk uje ōr ibik uje ire ma dich je ir nensirc. ²⁵Shi pwele shiyokorāha ire nehech itso ir maestro, hn ese uje ōr ibik ye pwele sowe nensirzpe per ire pwele shuu ire itso nensirc.— Hn Jesús tatim ōr im: —Yok itso hnakirbich uje ir aabo ode. Oso otata uje yok Beelzebú uu demonyo ōr bahlut heke ma ochinehnm olak toy uje ye otiislo yokpe.

²⁶Titim olakike par uje erahalo heke ye atililo ōr pork nīhyok uje otsakis je deeych yet nehe ich ochībite orhōta. Hn erze kuche uje ye onahmūr yewo ochiraha je deeych yet nehe ich nos ochiraha. ²⁷Ahnūwo kuche uje titim olak uje dihlahk ich tyenij atimlo ōr uje deeych par uje nos ochiraha. Ese uje titim olak taraashi ich tyenij atimlo osoho lekitiyo shi itso uje alehelo pwert eeych hn ebichlo atimlo ōr. ²⁸Ye atililo erze uje sehe oduhu olak oduhu atilo per wir ye ōr pwelpe uje oshuu olak ichībiyo oshuu toy. Shi tyenij atililo Porrosht uje pwele sihna olak hn sihna olak ichībiyo toy wahacha urhuta bahluta ehēt. ²⁹Erahalo uje ochiwāha chipirme ijeebe otiyer par pechporrza nohmira per hnii chipirmicha nohmira ye kayihi hnimichpe hn toy kimiji ye olak Deych Porrosht nahmūr uje toy. ³⁰Porrosht ma sahmūr olak je erze chipirme nehech nos chiraha olak akīre uje de olak hu keshi terihi latikpo. ³¹Heke ye atililo latik pork olak ma bale je chipirme uje kihniya.

Jesús shuu dakile otatim oso uje ye olotiis ire.

³²Titim olak uje yeēk ye lotiis yok hn tatim oso ich titim Papa uje de poōrc uje wichi ye lotiis yokpe. ³³Per uje yeēk tatim yewo uje sotiis yok ich yok itspo tyenij titim Papa uje de poōrc uje wichi sotiis yok.

Jesús shuu oso otsehek ire.

³⁴Titim olak. ¿Je uhu olak eyuwo tisīr uje Tikirētni par tuu oso ōr aho kiisihi nāhu ĩrmo? Ye Tikirētni par tiyokōr tuu itsorz. Shi Tikirētni par tuu otsehek ire shi itso uje tuu oteye. ³⁵Tikirētni par tuu oso omasaha par Porrosht aabo, heke hnakirbich uje ye Porrosht aap ich sitak deych, hn timcharrza sitak data, hn ir lakaharza sitak dohota. ³⁶Heke ese uje ye lotiis yok ich ir iiso otsitak ire shi itso uje ir imāho.

³⁷Uje yeëk sahmūr yok per ma sahmūr deych hn data ich ye ompe masaha par pibik. Ese uje sahmūr yok per ma sahmūr deyjo ich ye ompe masaha par pibik. ³⁸Shish tyenij yeëk ewenta uje oshiyokōr mihnikīhi ire shi pork ye lotiis yok itso uje ihyo krus hn iya yok. Kimiji ye ewenta ich ye pwele masaha par pakilakpe. ³⁹Ese uje ye ewentpe per shi tibey ir ikiritīhi nāhu ĩrmo, uje uhurc ich nos pyerte. Per ese uje ewenta pork sahmūr yok ich ye tibey dekirītīhi nāhu ĩrmōpe hn shiyokōr uje Porrosht sahmūr ich ir ikirīt de Porrosht ahir.

⁴⁰Yeëk uje sahmūr olak ahwoso ich sahmūr yok toy, hn uje sahmūr yok ich sahmūr Porrosht toy. Wichī uje shuu Tikirētni. ⁴¹Uje yeëk tēr ese profetīt shi pork wichī profeta ich ir premit de itso ese profetīt. Uje yeëk tēr Porrosht aabo ich ir premit de itso ōr premit. ⁴²Titīm olak. Yeëk uje takashim Porrosht aabo yeëk kimiji shi dosim awit uje kiis hn wichī hniī ye Porrosht aabo ōr bahluwape wichī ir premit de.—

11 ¹Uje Jesús sihna lahwoso uje tatīm erze dakile uje ōr dose par oshiyokōr ir ĩbiyo ich shuu ohno otsanimirāha ir ahwoso hn ire hno tīr kal duwo sanimirāha Porrosht ahwoso.

Juan uu tohirm oso shuu dakile otīr Jesús.

²Eseekite hn Juan uu tohirm oso de karsel ehēt. Uje chunt uje Cristo shiyokōr hn shuu dakile yewo ohno otīr ire. ³Otatīm Jesús otsiī: —Juan sole: “¿Je owa uje yesh oiyiyem o je oiyiyem kinehēt?”—

⁴Jesús tatīm ōr im: —Bolilo atimlo Juan uje entloko hn uje amlo. ⁵Atimlo uje olibo ich omo lekītiyo, hn erze uje pilich worbit yakaha ōr ich odirk, hn erze uje lepra yakaha ōr ich ōr owich om, hn erze uje ōr armo ich ochunt lekītiyo, hn erze uje otoy ich ōr ikpo. Titīm losuhlaabo erze ahwoso oomo par omasaha par Porrosht aabo. ⁶Ich om par yeëk uje ye nowāha yok.—

⁷Uje Jesús tatīm Juan akile shuu itsorz hn ohno ocheeshpo ich Jesús eyucha Juan tatīm erze oso im: —Sehe tuu atimlo yok. ¿Inaāpo heke etīrlo wahachni owich uje isa? ¿Je etīr par eychimlo ese uje itso tyermit uje myent tibichu? ⁸Kimiji ye etīrlo ese owich uje isa par eychimlo ese tyermit atimlo yok inaāpo heke etīrlo wahachni. ¿Je etīrlo par eychimlo hnakīrbich uje ishuwo ihīrtso? Nīhyok pork erze uje ōr ishuwo ihīrtso odebuhu reye ōr ihyuwo. ⁹¿Je etīrlo wahachni par eychimlo latīkpo? ¿Je etīrlo par eychimlo profetīt yet? Ēhe, etīrlo wahacha par eychimlo profetīt. Titīm olak uje wichī ma dich je profeta yewo. ¹⁰Juan wichī uje Porrosht ahwoso tata uje Porrosht tatīm Cristo im: “Hmeychim, tuu pibich hno wap par nishii oso ōr iluu shi itso uje nishii dehet par uje ochimīt ire hn otaachīhi owa ahir nehe.” ¹¹Titīm olak ich tuu ūrpa. Nīhyok hnakīrbich uje ma dich je Juan uu tohirm oso. Juan ich dich per Porrosht aap uje ye dichpe ich ma dich je Juan. ¹²Uje ehn Juan tohirm

oso nehech ele ahle ich oso oshiyokōr shi itso uje ochukusyē par omasaha par Porrosht aabo hn oso ochiyuhu ire par omasaha toy. ¹³Erze Porrosht ahwoso uje nos wir profeta ochichewkite hn erze uje Moisés chichewkite tata uje Cristo tyenij tirēt nehe per Juan uu tohirm oso tata uje yej taācha. ¹⁴Oso otata uje Elías tyenij tirēt nehe per titim olak kimiji sehe ērlo ich Juan wichi Elías. ¹⁵Olak ār de par uje entlo. Uhulo olak eyuwo tišir erze uje titim olak.

¹⁶¿Titeēta latikpo par tuu erahalo erze oso uje yesh ōr ika ōr iluu? Ōr iluu ich shi itso pikihnino uje otsakaha dit ehēt hn otatim nahire ich otsihnew otsii: ¹⁷“Oyobita flawta per ye ahakōrlo weylape. Oyeeychi oyeēt musika uje dosdarak par topo per ye ahmūrlope uje eyerhlo.” ¹⁸Titim olak itsorz pork uje Juan uu tohirm oso tirētni ich ye tepe erze uje oso yewo otew, hn ye dohope uje oso yewo oho per otata uje demonit de ire ehēt. ¹⁹Yok tokōra poōrznī. Ich takaak itso oso yewo hn tokooho per wir otata otsii: “Hmeychīmlo, wichi ich jar hn yikēhik. Ir ihyēro wir uje ōr kobra nahnapsō ōr hnote par gobierno hn erze uje ōr iluu mihnū.” Porrosht ich eykdeyo hn shiyokōr uje sahmūr. Deeych yet nehe ich imeheeych uje ire ich eykdeyo pork erze uje shiyokōr ich tokole om.—

Duwo tre de uje Porrosht tyenij sepyērpa nehe.

²⁰Eseekite ichii Jesús tata uje mihnūwo tyenij tīr erze oso uje odebuhu erze duwo uje wichi shiyokōr kuche ich kihniyani uje ye latik pwele niyokōr. Oteychīm per shish otsotiis hn ye onoympē uje oshiyokōr mihnūwo. ²¹Jesús tata im: —Ich yarhakpa uje tyenij tīr erze dit Corazín oso hn erze dit Betsaida oso pork tiyokōr kuche ich kihniya wahacha erze duwo aho per shish otsotiis yok. Kimiji tiyokōrīhi wahachni ese duwo Tiro hn Sidón ich osdeyo uje erze oso oym uje oshiyokōr mihnūwo hn oshiyokōr ōr ishuwo ochīra ponchuko hn oyāha hn ochukshāha piitsit ōr hu eyo par uje ochībīte orhōta uje onoym deluu mihnū. ²²Tiita uje terihi ese deeych nehe uje otīr Porrosht ile ikich ich ma sepyēr erze dit Corazín oso hn erze dit Betsaida oso je uje sepyēr erze dit Tiro oso hn dit Sidón oso.— ²³Hn Jesús tata im: —Erze dit Capernaum oso ich onarim ire shi itso uje yej otaachīhi poōrc per tyenij ochīrmas ōr hn ochimchaha ōr urhuta bahluta ehēt. Erze kuche uje tiyokōrīhi ōr ahir uje ye latik pwele niyokōr kimiji tiyokōrīhi dit Sodomakite ich ese dit shish de nehech ele ahle. ²⁴Tiita uje terihi ese deeych uje otīr Porrosht ile ikich nehe ich ma sepyēr erze dit Capernaum oso je uje sepyēr ese dit Sodoma oso.—

Uje oso otīr Jesús ich shuu ōr tonkiya.

²⁵Eseekite hn Jesús tatim Porrosht im: —Papa, owa uu poōrc yīnsirc hn hnimich yīnsirc. Tikīna owa pork akis erze kuche uje ahakōr par uje erze oso uje ōr eykdeyo ye odirehepe hn erze uje ōr dītuwo ye odirehepe.

Owa aabo wir òr itso pikihnino ijaabo. Wir uje uhu ochiraha erze kuche uje ahakòr. ²⁶Papa, shi ahakòr uhu itsorz pork ahmùr uhu itsorz.—

²⁷Jesús nos tatim oso im: —Papa nos chibite kuche pìhme. Nìhyok yeèk uje chiraha yok uje yok uu Porrosht Ijit pisht, shi Papa wichi uje chiraha. Nìhyok yeèk uje chiraha Papa, shi yok tikiraha hn erze uje tuu ochiraha ire.

²⁸Erètlo etìrlo yok nos wir olak uje ahakòrlo obiyo ich kihniya hn uje ich ihne pork sehe eshi olak hnitewihi Porrosht ahir. Etìrlo yok hn tuu olak tonkiya. ²⁹Shi itso uje ochibite hyuwo wey etibich par uje shiyokoràha ese yet ich tyenij etìrlo yok par tiyokoràha olak pork ye yok ehnitakpe hn ye yok narim yokpe. Heke tuu olak tonkiya pork ye olak nesita ahakòrlo kuche par eshilo olak hnitewihi Porrosht ahir. ³⁰Erze pahwoso uje titim olakike wir ich hiroj shi itso hyuwo uje ochibite wey etibich hn hnoy nerhüwo uje hiroj.—

Ochekushu trigo ee par uje otew.

12 ¹Eseekite uje terihi sabta hn Jesús hno chikàha shakìrrza eheth. Ir akile ohno òya ire hn ochuuna uje sewit sèhi òr heke ochekushu trigo ee hn otew. ²Erze uje òr iluuta iich otsii fariseo uje omo Jesús akile uje oshiyokòr hn otatim Jesús otsii: —Hmeychim erze akile, ich oyuwe erze ley. Ley tata uje ich ye ompe oshiyokòr obiyo sabta pork wichi ese deeych uje otsakir.—

³Jesús tatim òr im: —Erahalo uje Porrosht ahwoso tata uje iyuwo sèhi rey David hn ir ihyèro. ⁴Omasaha ese patikit eheth uje Porrosht ihyuch de hn saserdote ishim òr erze pan uje oshimihì Porrosht par uje otew. Erze pan wir uje ochibite shi par uje saserdote otew, ye par yewope per David ye niyokòr mihnikpe pork iyuwo sèhi hn sapur. ⁵Olak erahalo uje Porrosht ahwoso uje Moisés chichewkìte tata uje erze saserdote uje ochish obiyohochis Porrosht ir templo eheth ese deeych uje otsakir ich ye otsowe erze leype. ⁶Titim olak uje nohmet de olak ahir uje ich ma dich je asa templo. ⁷Porrosht ahwoso tata uje Porrosht im: “Eenilo uje oso òr losuhlaabo hn akashimlo òr. Wichi ich ma om par ahakòrlo je uje tukulo loshipit par eeychàhalo yok.”— Hn Jesús tatim erze fariseo im: —Kìmjìjì eenilo uje oso òr losuhlaabo hn akashimlo òr ich ye athilope uje pakile oshiyokòr mihñüwo pork ye oniyokòr mihñüwope. ⁸Yok tokòra poòrznì. Yok ese deeych uje otsakir ir yinsirc.—

Jesús chukuta hnakirbich uje ir hmata ye jukur.

⁹Eseekite uje Jesús tokolihì shakìrrza eheth hn hno masaha òr sinagoga eheth. ¹⁰Hnakirbich dechi uje hmata ye jukur. Yewo odechi toy uje sehe òr denunsya Jesús heke ochukwi iluu, otatim Jesús otsii: —Kìmjìjì yeèk dukuta yet ese deeych uje otsakir ¿je wichi sowe asa ley?—

¹¹ Jesús tatim òr im: —Kimiji olak yeëk obeje chíhi uje kayíhi jotsit ese deeych uje otsakir ¿je ye dope par diyuhu? ¹² Hnakirbich ma bale je obejit heke uje yeëk shiyokòr om ese deeych uje otsakir ich ye sowe leype.— ¹³ Jesús tatim ese hnakirbich im: —Èr ahmikit.—

Wichi chîr, ichii hmata sano itso asa hmata yata. ¹⁴ Erze uje òr iluuta iich otsii fariseo otokolihí sinagoga ehét hn ohno par okeytkêrye ochukwi Jesús iluu pork sehe oduhu oduhu toy.

¹⁵ Jesús chiraha uje sehe oduhu ire heke tokolihi wahacha hn hno. Ich oso okihniya uje oyehe nêr hn nos chukuta òr. ¹⁶ Tatim òr par uje ye odibite ire orhòta. ¹⁷ Uje tatim òr shuu itsorz ich shuu yakaha erze Porrosht ahwoso uje profeta Isaías chichewkite. Wichi eyucha Cristo uje tata uje Porrosht im:

¹⁸ —Hmeychimlo pibich uje tiihla. Wichi ich tahmûr hn tahmûr uje shiyokòr. Tyenij tibite Pichibich ire ehét par sanimirâha pahwoso tatim erze dihipo kinâho par shuu omasaha par paabo. ¹⁹ Wichi ye dihyokos yewo hn ye tibich nihnew lahwaspe heke nihyok yeëk tyenij chunt uje sihnew lahwoso uje wichi chikâha daho. ²⁰ Hn ye nontew erze oso uje hnii omasaha par Porrosht aabo. Wir shî òr itso tyermit uje sehe purho per wichi ye duhu purhope hn wir shî òr itso nampyon uje ir meshit sehe toy per wichi ye duhu tope nehech uhurc hn erze uje ich om serz erze mihnuwo ²¹ hn erze dihipo kinâho tyenij ye olotiis irpe.— Wir uje Isaías chichewkite.

²² Eseekite hn ohnoy hnakirbich otseya Jesús uje olîbik hn irpik. Demonyo de ire ehét. Jesús shuu wichi owich om heke pwele chiilehet hn teychim lekítiyo. ²³ Nos wir oso ich ochishlabe. Otatimye otsii: —¿Je wichi uu Cristo uje târa ir porokkite rey David?—

²⁴ Uje erze fariseo ochunt hn otata otsii: —Beelzebú uu demonyo òr bahlut, wichi uje ishim Jesús ukurbo par chiyuhu demonyo.—

²⁵ Jesús nos chiraha òr eyuwo heke tatim òr im: —Kimiji nos wir oso uje otakisho ir hnimich otsitakye heke otsehek ire hn nihyok òr ukurbo, hn nos wir duwo hn nos wir uje òr iisoye ich otsitakye heke otsehek ire hn nihyok òr ukurbo. ²⁶ Shi itspo kimiji Satanás diyuhu demonyo ich shî òr ire uje otsehek ire heke nihyok ir ukurbo per ye niyokòr duhu ilorzpe. ²⁷ Kimiji tiyuhu demonyo târa Beelzebú ukurbo, hn ¿erze olak akile òr ukurbo târa iraâpo par uje ochiyuhu demonyo? Ebitilo uje òr ukurbo târa Porrosht heke olak akile ochibite orhòta uje shî eymehilo. ²⁸ Per kimiji tiyuhu demonyo târa Porrosht Ichibich ich imeheeych uje terihi ishirît par amsahalo par olak Porrosht aabo.

²⁹ Kimiji hnakirbich chíhi uje ir ukurbo de hn yet sehe masaha ir ihyuch par torha ir kushjâro ich ye pwelpe. Tyenij shiyeru wap chîra lukwerc hnii pwele hnoy ir kushjâro.

³⁰ Erze uje otsahmûr ôya yok wir pakilo hn erze yewo wir uje sehe onontew yok. Wir uje ye otakashim yok odish wir oso ôrye wir uje oshuu oso ochûr lekítiyo.

Oso ochiraha uje pohir ich om kimiji ir ee ich om.

³¹Heke titim olak. Porrosht pwele perdonar oso nos wir kuche mihñuwo uje oshiyokör hn nos wir mihñuwo uje otata per ye perdonarpe erze uje ochiyuhu lahwoso mihnuwöho Porrosht Ichibich. ³²Porrosht pwele perdonar erze uje ochiyuhu lahwoso mihnuwöho yok uje toköra poörzni per erze uje ochiyuhu lahwoso mihnuwöho Porrosht Ichibich wir uje ye perdonar örpe hnii ele deeych hnii deeych yet nehe.

³³Olak athilo uje piluu mihñu per ebitilo uje pibiyo ich om. Kimiji asa pohorrza om ich shish ir ee om, per kimiji asa pohorrza mihñu ich ir ee ye ompe. Ir ee chibite orhöta kimiji om o kimiji mihñu. Tiyokör uje ich om shi itso pohorrza uje ee om. ³⁴Shi olak itso echeēt aabo uje wosdeyo. Ye olak pwelpe uje athilo ahwoso uje ich om pork olak iluu mihñu. Erze uje de oso ör aho wir uje otata kimiji om o kimiji mihñuwo. ³⁵Hnakirbich uje ir iluuta om ich tata uje om, hn hnakirbich uje iluuta mihñu ich tata uje mihñuwo.— ³⁶Hn Jesús tatim erze fariseo im: —Sehe tuu erahalo uje terihi ese deeych nehe uje Porrosht sepyër oso, ich shuu nos oso otatim ire uje keshi inaäpo heke otata erze ör ahwoso uje ye jukur. ³⁷Shi erze olak ahwoso om uje athilo wir uje shuu imeheeych uje ye ahakörlo uje mihñuwope hn erze olak ahwoso uje athilo uje ye ompe ich tyenij shuu Porrosht sepyër olak.—

Erze fariseo sehe oduhu Jesús niyokör kuche uje ye latik pwele niyokör.

³⁸Eseekite hn erze uje oshiyoköräha oso waa ley waa je Moisés chichewkite hn erze yewo uje ör iluuta iich otsii fariseo otatim Jesús otsii: —Maestro, sehe oyuhu ahakör kuche uje ye latik pwele niyokör par oyeychim.—

³⁹Per Jesús nos tatim oso im: —Oso uje shish oym Porrosht wir shi ör itso timcharrza waa je toräha dabich. Sehe oduhu tiyokör yarta par ochiraha uje toköra poörzni per ye tiyokörpe. Shi tiyokör yarta uje itso uje tokolihi profeta Jonaskite. ⁴⁰Wichi de doshit bahlut etet daalo tre hn dihle trekite. Yok uje toköra poörzni. Tyenij yok de hñimich uut daalo tre hn dihle tre. ⁴¹Uje terihi ese deeych uje Porrosht sepyër oso nehe hn olak hn erze oso yewo uje amlo yok tyenij alehelo Porrosht ikich. Erze dit Nínive oso tyenij oyehet toy hn ör denunsya olak pork uje wir ochunt Porrosht ahwoso uje Jonás tatim örkite ich wir oym erze mihñuwo uje oshiyokör. Yok de olak ahir hn yok ma dich je Jonás per ye ahmürlo érlo pahwosope. ⁴²Uje terihi ese deeych uje Porrosht sepyër nähu írmo oso nehe ich erze oso uje oteychim yok tyenij oyehe Porrosht ikich. Asa reyna waa je tära hñimich sur yit tyenij iyehe Porrosht ikich toy hn denunsya ör. Wate tära hñimich uje dukuhla par tär uje rey Salomón tata pork wichi ich eykdeyo per yok de olak ahir. Yok ma dich je Salomón per olak ye ahmürlo érlo pahwosope.—

Demonyo pwele cheeshi tîr ese uje sakahani.

⁴³Eseekite hn Jesús tatim òr im: —Uje ichibich mihnt tokolihi hnakirbich eheth hn hno tîr lekityo ese owich uje kako par chukwi owich yet par sakaha per ye dishpe. ⁴⁴Heke eheth chilehet im: “Ma om takaashpo tîfîr ese hnakirbich eheth uje tikitolihihna.” Uje cheeshpo ich chish ese hnakirbich eheth uje sakahahna shi itso uje nîhyok ye latik chîhi eheth hn ich otsarz hn onishii hn oshuu om ⁴⁵heke hno chish ichibiyo mihnuwo yewo uje òr syete. Ich ma òr mihnuwo pisho je ire. Nos omasaha ese hnakirbich eheth hn otsakaha toy. Uje uhurc ese hnakirbich ich ma ir ikirît mihnikpa je waphna. Erze kuche mihnuwo shi siteeta uje tyenij tîr erze oso nehe uje òr iluu mihnu.—

Jesús ir data hn ir leshibo otekirihi ire.

⁴⁶Eseekite uje ehn Jesús shiyokoraha erze oso hn ir data taacha hn deshibo, shi oyehe ejwert. Sehe okeytker ire. ⁴⁷Yeek tatim Jesús im: —Ata hn eshibo odechi ejwert. Sehe okeytker owa.—

⁴⁸Per Jesús tatim ese hnakirbich uje tatim ireke im: —¿Je sehe eraha yeniipo uje òr itso mama hn yeniipo uje òr itso pishibo?— ⁴⁹Jesús chishîr dakile tatim erze oso im: —Wir shi òr itso mama hn pishibo. ⁵⁰Yeek uje shiyokor uje Papa sahmur uje de poorc ich wichi pishap hn wate pinap hn wate mama.—

Jesús ich itso hnakirbich uje sitser joro eyhi.

13 ¹Eseekite uje shiyehe wichi deeych hn Jesús tokolihi pwert eheth, hno tîr lagunta wirc hn sakaha. ²Ich oso okihniya uje otakisho lawichîhi ir ahir heke dohir pohorrza eheth hn sakaha. Shi erze oso oyehe onoota wirc. ³Jesús tatim òr siteeta kuche ich kihniya im:

—Hnakirbich dekite uje hno par sitser joro eyhi. ⁴Uje sitser hn eyhi kayihi dehet. Chipirme taacha hn tew. ⁵Uje sitser erze eyhi hn yer kayihi uje kojano po de, shi hnimich pikaap. Erze eyhi tokole shichish pork hnimich pikaap. ⁶Uje deeych tokole tew. Ich shuu kako pork nîhyok ir uro. ⁷Erze eyhi yer uje sitser kayihi uje wonti de. Erze wonti kresa hn sajuwe ⁸per erze eyhi yer uje sitser ich kayihi hnimich uje om, kresa hn ir ee de. Yer ee syen hn yer ee sesenta hn yer ee treynta. ⁹Olak ar de par erlo. Uhuolak eyuwo tisir erze uje titim olakike.—

Jesús shish siteeta or kuche.

¹⁰Eseekite hn Jesús akile otirer otir ire hn otatim otsii: —¿Inaapo heke shish eteeta kuche uje atim oso?—

¹¹Jesús tatim òr im: —Porrosht sehe duhu erahalo erze kuche uje shiyokor par tibey daabo per ye nahmurpe uje erze oso yewo ochiraha.

12 Erze uje ochiraha ich Porrosht tyenij shuu ma ochiraha nehech uhurc ich kihniya uje wir ochiraha, per erze uje ye odirehepe Porrosht chiyuhu òr eyuwo erze arhaabo uje ochiraha. 13 Uje titim òr kuche shi titeēta heke uje oteychim per ye onomope. Uje otēr ich ye odirehepe. 14 Heke ich oshuu erze ahwoso yakaha uje profeta Isaías chichewkite uje Porrosht tata im: “Olak tyenij entilo ir ahwoso per ye erahalope uje tata, hn tyenij eychimlo uje shiyokōr per ye erahalope inaāpo heke shiyokōr shuu itsorz. 15 Erze oso ich shi òr itso uje ye òr eyuwīrsh hn ich shi òr itso uje òr ār kututa hn ich shi itso uje òr ile kututa pork kimiji oteychim uje tiyokōr hn ochunt uje tiita hn ochiraha heke ich otēr yok hn tuu òr owich om.” Wir uje Isaías chichewkite.—

16 Hn Jesús tatim dakile im: —Ich om parolak uje amlo uje tiyokōr hn erahalo hn uje ērlo uje tiita ich imeheeych. 17 Titim olak ich tuu ūrpa. Ich okihniya erze profeta poruwo wishi hn erze uje òr iluu om sehe oteychimkite erze uje yesh eychimlo per ye oteychimpe, hn sehe otēr erze uje yesh ērlo per ye otērpe.

18 Ese uje titim òr shi titeēta ese hnakīrbich uje sitsēr jōro eyhi ich tata shuu itsorz. 19 Uje yeēk tēr erze Porrosht ahwoso uje yet tatim uje Porrosht shiyokor par tibey laabo hn ye diraha uje tata ich dyablo tār ire hn chiyuhu erze Porrosht ahwoso ire ehēt heke chíkey. Wichi shi itso ese dehet uje jōro eyhi kayihī. 20 Erze eyhi yēr uje kayihī kojano po eeych ich shi itso yeēk uje chunt Porrosht ahwoso ich sahmūrpa hn òr ayala 21 per wichi ich shi itso jōro uje ye ūrīrsh Wap ich ewenta per uje kuche mīhnūwo tār Porrosht aabo pork ye olotiis pahwosope ich wichi iim Porrosht shichish. 22 Erze eyhi yēr uje kayihī hnimich uje wonti de wir shi itso yeēk uje chunt Porrosht ahwoso. Ich sahmūr per shi shuu deyuwo tisir labiso hn dasuwo. Ma sahmūr hnote, heke erze kuche sehnēr ire shi itso erze wonti uje sajuwe jōro hn ye duhu eerīrsh. 23 Erze eyhi yēr uje kayihī hnimich uje om wir shi itso yeēk uje chunt Porrosht ahwoso ich chiraha. Wichi shi itso erze jōro uje ee de. Yēr ee syen hn yēr ee sesenta hn yēr ee treynta.—

Jōro mīhnūwo hn jōro uje om.

24 Eseekite hn Jesús siteēta kuchit yetpo tatim òr im: —Uje Porrosht shiyokōr par tibey daabo wichi shi itso hnakīrbich uje shuu ochukwēr ir jōro eyhi uje om ir shakīrrza ehēt. 25 Uje dīhlak ich nos omoko hn ese hnakīrbich ir imehēt taācha. Sitsēr eyhi uje mīhnū asa shakīrrza ehēt hn tokole hno. 26 Uje erze jōro tokole kresa hn ee de ich imeheeych uje wir jōro uje mīhnūwo ūya erze uje ich om. 27 Erze uje ochish obiyohochis shakīrrza ehēt ohno otatim nensirc otsii: “Erze jōro eyhi uje oyitserīhi shakīrrza ehēt ni ich om. ¿Inaāpo erze jōro mīhnūwo tokolihi asa shakīrrza ehēt?” 28 Ese òr yīnsirc tatim òr im: “Shi ese eyok imehēt

shiyokōr shuu itsorz.” Ir ibiyo otatim otsii: “¿Je ahmūr uje oyuko oyiyuhu erze jōro uje ich mihñūwo hn oyitiyer?” ²⁹Tatim ōr im: “Ye eyuhulo nok eyuhulo erze trigo uje ich om. ³⁰Ma om shi kresa nōyye nehech terihi uje ochekushu nehe. Tuu wir ohno wap par ochekushu erze jōro uje mihñūwo hn oshuu takisho lawich wee wee par otsēru. Per erze trigo ich ochekushu hn ochihmer ochimchaha ir owich.”—

Jesús siteēta kuchit itso asa mostasa eyhi.

³¹Eseekite hn Jesús tatim ōr kuchit yet shi siteēta im: —Uje Porrosht shiyokōr par tibey daabo ich shi itso asa pohorrza eyhi waa je iich otsii mostasa uje hnakirbich chukwerīhi ir shakirra ehēt. ³²Asa pohorrza eyhi ich ma ijaap je erze jōro yewo per uje kresa ich ma data je erze jōro yēr. Wate kresa nehech itso erze pohir yēr uje deyo. Chipirme tīr hn shiyokorīhi dewo ir uke.—

Jesús siteēta kuchit itso pan eyhita.

³³Eseekite hn Jesús siteēta kuchit yetpo tatim ōr im: —Uje Porrosht shiyokōr par tibey daabo ich shi itso asa pan eyhita uje timcharrza shuu iya ese erint par shiyokōr pan uje ich kihniya. Shi iyem nehech asa pan eyhita chūr lekītiyo ese erint ehēt.—

³⁴Nos wir kuche uje Jesús tatim erze osoko ich shi siteēta. Yelij shi tatim ōr kuche duhu imeheeych per shish siteēta. ³⁵Uje siteēta shuu itsorz ich shuu yakaha erze uje profetit tatkite pork tata uje Cristo tata im: —Shi titeēta kuche uje ye oso odirehepe. Uje Porrosht shiyokōr irmōkite nehech takaachīhi ĩrmo ich ye Porrosht duhu odirehepe.—

Jesús tatim dakile erze uje siteētaka.

³⁶Eseekite hn Jesús tokolihi erze oso ōr ikich uje ich okihniya hn masaha pwert ehēt. Ir akile otār ire hn otatim otsii: —Atim ōryok erze uje eteētaka. ¿Tata latikpo erze jōro mihñūwo uje tokolihi asa shakirra ehēt?—

³⁷Jesús tatim ōr im: —Yok uje tokōra poōrznī ich yok itso ese uje sītsēr erze jōro eyhi uje om. ³⁸Asa shakirra wate itso ĩrmo, hn erze eyhi uje om wir shi itso Porrosht aabo. Erze eyhi uje mihñū wir itso dyablo aabo, ³⁹hn ese eyok imehēt uje sītsēr erze eyhi uje mihñū wichi dyablo. Uje terihi ishirīt nehe hn ochekushu erze jōro, hn erze uje ochekushu erze jōro wir anjele. ⁴⁰Erze jōro uje mihñū ich otsitiyēr hn ochimchaha jwekita ehēt hn otsēru wir shi itso uje erze anjele oshiyokorīhi erze oso uje ōr iluu mihñū nehe uje terihi ishirīt. ⁴¹Yok tokōra poōrznī. Tyenij tuu yok anjele ohno otār ĩrmo lekītiyo par ochish wir ōrye erze oso uje otakisho lawichīhi Porrosht aabo ōr ehēt par oshuu oshiyokōr uje ich mihñūwo hn erze uje oshiyokōr mihñūwo ⁴²hn otāra ōr ochimchaha

ōr ese kipuut eheth uje jwekita de. Wir tyenij oyerh hn oches labitēre wahacha pork ich dospa. ⁴³Per erze yewo uje ōr Porrosht aabo tyenij ode ire ahir hn ōr hūre shi itso deeych uje chihit. Wir uje ōr Deych tibey ōr. Olak ār de par ērlo. Uhu olak eyuwo tisīr ahnūwo uje titim olak.—

Jesús ich itso kuchit uje debich uje hnakirbich chish.

⁴⁴Eseekite hn Jesús siteēta kuchit yetpo tatim ōr im: —Ese uje Porrosht shiyokōr par tibey daabo ich shi itso uje yeēk sakis kuchit uje ich debichpa ir hnimich eheth. Hnakirbich yet chish ese kuchit uje ich om hn sajuwepo. Wichī ich aylpa. Hno chiwāha nos wir ir kushjāro uje de ire ahir hn tiya ese hnimich.

⁴⁵Ese uje Porrosht shiyokōr par tibey daabo wichī shi itso yeēk uje chukwi kojach uje ich debichpa. ⁴⁶Chish nohmet uje ich ma ihīrtpa heke hno chiwāha nos wir ir kushjāro uje de ire ahir hn tiya ese nohmet.—

Jesús siteēta kuchit yet uje itso ret.

⁴⁷Eseekite hn Jesús siteēta kuchit yetpo tatim ōr im: —Ese uje Porrosht shiyokōr par tibey daabo wichī shi itso ret uje otāra ochibite onoota hn chishew doshiyo kināho kināho. ⁴⁸Uje doshiyo kihniya de ese ret eheth hn odalii ese ret hn ochiyuhuchis onoota wir. Otsakahachis hn ochiyuhu erze doshiyo. Ochihmer erze uje om ochimchaha kanasta eheth per otāra erze yewo uje mihnūwo. ⁴⁹Uje terihī ese ishirīt nehe ich oshiyokōr shi itso uje erze leshīrtso oshiyokōr. Anjele otirēt hn otīr lekītiyo hn otsehek erze oso uje ōr iluu mihnū hn erze Porrosht aabo. ⁵⁰Erze oso uje ōr iluu mihnū tyenij anjele otāra ōr ochimchaha ōr ese kipuut eheth uje jwekita de. Wir ich oyerh oches labitēre pork ich dospa.—

⁵¹Jesús tatim ōr im: —¿Je imeheeych ahnūwo uje titim olakike?— Otatim otsii: —Ēhe.—

⁵²Jesús tatim ōr im: —Kimiji wir yeēk uje shiyokorāha oso waa ley waa je Moisés chichewkite uje ye lotiis yok hn chiraha uje Porrosht shiyokōr par tibey laabo, wichī chiraha uje shiyokorāha oso erze ahwoso ilaro uje ley tata hn erze pahwoso ahlo. Wichī shi itso yeēk uje ir ihyuch de hn chiyuhu erze kuche uje ilaro hn uje ahlo par uje shiyokorāha yewo.—

Jesús hno tīr dit Nazaret.

⁵³Eseekite uje Jesús sihna erze kuche uje tatim ōrke uje shi siteēta hn tokolihichis hno. ⁵⁴Uje taachihī wahacha ese hnimich uje ire neēhe hn shiyokorāha orihī sinagoga eheth. Erze oso ich ochishlabe. Otatimye otsii: —¿Latik niyokorāha ire erze kuche uje ire chiraha? ¿Inaāpo heke chiraha shiyokōr erze kuche uje ye latik pwele shiyokōr? ⁵⁵Wichī deyeh karpinterya hn data María. Ir leshibo ōr iiyo otsii Santiago, José, Simón

hn Judas. ⁵⁶Nos wir ir nanime ode lika eyok ahir toy. ¿Inaãpo heke Jesús nos chiraha erze kuche?— ⁵⁷Wir otsitak ire. Jesús tatim òr im: —Nos wir oso uje ode lekityo otola profeta per erze ir iiso hn ir ihnapso ye otola irpe.— ⁵⁸Jesús ye niyokørpe erze kuche ich kihniya uje ye latik pwele niyokør pork otsotiis ire.

Herodes shuu oshuu Juanni oshuu toy.

14 ¹Eseekite hn Herodes wichi òr bahluwaha ese hnimich Galilea. Chunt nos wir kuche uje Jesús shiyokør. ²Sërza tatim erze debiyò im: —Wichi uu Juan uje tohirm oso ich ikpo heke ukurbo de par shiyokør kuche uje ye latik pwele niyokør.—

³Antni Herodes shuu ochishew Juan hn oshiyeru kenena meyko hn ochimchaha karsel ehèt. Shiyeru Juan shi pork Herodías sitak. Wate Herodes leshibich Felipe ir irähto per Herodes ìhi wate ahir. ⁴Herodes shuu oshiyeru Juan pork Juan tatim im: —Owa aluwe ley uje èhi wate ahir par erähto.— ⁵Herodes sehe duhu Juan duhu toy per ich tola erze oso pork wir ye olotiispe uje Juan wichi profetya.

⁶Eseekite uje Herodes kumpre äyo hn shiyokør òr ahamich dich. Herodías waa je Herodes ìhi ahir ir ijita tokole shiyokør weylehe erze oso òr ikich hn Herodes ich sahmür uje wate shiyokør. ⁷Heke chibite lahwoso par uje wate sapur kuchèrk ich ishim.

⁸Ir data sakit ire heke tatim Herodes im: —Asim yok Juan uu tohirm oso ir huta. Emchaha preta waa je data ehèt hn uhu otòhwa odeya lika.—

⁹Uje Herodes chunt uje itsorz ich dosdarak per chibite lahwosoko erze oso òr ikich heke tatim ohyerptosht par tòhwa. ¹⁰Shuu ohno otir karsel ehèt par ochekshehe Juan etibich. ¹¹Ochimchaha preta ehèt hn otòhwa oshim asa pikihninta. Wate hnoy ishim data Herodías.

Jesús ishim hnakirbo òr poso uje òr sinko mil.

¹²Eseekite hn Juan ir akile otir karsel ehèt hn ohnoy ir yühurrza. Ochihitsim hn ohno otatim Jesús.

¹³Uje Jesús chunt hn tokolihichis iyäha pohorrza hn hno tìr owich yet uje isa. Uje oso ochunt uje Jesús hnooko hn otokolihì erze duwo ohno otsahn ijich odirkihì hnimich. ¹⁴Uje Jesús taachihì wahacha hn ihnimichihì pohorrza ehèt ich umo erze oso uje ich okihniya. Chuuna uje òr losuhlaabo hn chukuta erze uje òr permo.

¹⁵Uje ich yilkaship hn Jesús akile otatim ire otsii: —Ele owich uje eyok de ich isa hn ich yilkaship. Atim erze oso par uje odo otir erze duwo hn otiya labiso par otew.—

¹⁶Jesús tatim erze dakile im: —Ye nesitpe uje ohno. Asimlo òr uje otew.—

¹⁷Ir akile otatim otsii: —Shi pan sinko hn doshiyo osiyer uje de.—

¹⁸ Jesús tatim òr im: —Ohwĩlo, asimlo yok.— ¹⁹ Jesús tatim erze oso par uje shuu otsakahachis ihnemich eeych. Chishew erze pan uje sinko hn doshiyo osiyer. Teychim poòrc hn nihna Porrosht par erze poso. Sehek hn ishim erze dakile par shuu oshim erze oso. ²⁰ Nos wir oso otew nehech otsatso. Erze ir akile ochish erze oposye uje otsatsako nehech oshuu kanaste dose yeno uje deyo. ²¹ Erze uje otew erze oposo wir òr sinko mil hnakirbo per ye otiskēr timcherpe hn erze pikihnino.

Jesús dirkihi awit eeych.

²² Eseekite hn Jesús shuu wir dakile ohno oyāha pohorrza par shuu otīr wahacha lagunta pit yet per ire shi sakaha erze oso òr ahīr par shuu otseyhi. ²³ Uje tatim òr par shuu ohno hn dohīr kojach eeych shi ire nohmira par orar. Uje dihīlak wichi shi dechi shi sohmira. ²⁴ Asa pohorrza ich dukulehe ese hñimich. Otsatsirāha myent arhīch heke erze owit wokor ich shuu asa pohorrza.

²⁵ Uje ich deeych huta hn Jesús hno sahn òr ijich dirkihi awit eeych. ²⁶ Uje erze ir akile omo uje dirkihi awit eeych ich otolpa hn otibich otsii: —Likichibich de wahacha.— Ich otibich ich otsihnew pork ich otolpa.

²⁷ Ichii Jesús tatim òr im: —Yok, ye atililo hn ye as olak ibe.—

²⁸ Pedro tatim im: —Irhīche, kimiji owa ich atim yok par uje titīr owa tikirkīhi awit eeych.—

²⁹ Jesús tatim im: —Erēt.— Heke Pedro ihñimichihī asa pohorrza ehēt, dirkihi awit eeych tīr Jesús. ³⁰ Per uje eyuwo tisīr uje myent data ich tola ichii sehe yaka. Tībii Jesús im: —Irhīche, sehe tuu akashim yok.—

³¹ Ichii Jesús chīr nahmikīt hn chishew. Tatim im: —Shish otiis yok. ¿Inaāpo owa koswāha yok?—

³² Uje odohir asa pohorrza ehēt ich myent iyehe. ³³ Erze uje ode asa pohorrza ehēt otīr Jesús hn ocha dete hñimoho ikich oteeychāha ire. Otatim otsii: —Ich ūrpa uje owa uu Porrosht Ijit.—

Jesús chukuta erze genesaret oso.

³⁴ Eseekite ich otaachihī wahacha hñimich Genesaret uje de lagunta pit yet. ³⁵ Uje erze oso uje odechi okemihī uje wichi Jesús ich oshuu erze yewo ohno otīr lekītiyo par uje nos otōhwa erze uje òr permo. ³⁶ Otsapur Jesús par uje sehe olakīhir shi ir nerpta ihīr, hn nos wir uje otsakīhir ich nos shuu òr sano.

Oposo ye duhu òr iluu mihñūpe.

15 ¹ Eseekite hn erze uje òr iluuta iich otsii fariseo hn erze uje oshiyokorāha oso waa ley waa je Moisés chichewkite otīrēt otāra Jerusalén otīr Jesús. Otatim otsii: ² —¿Inaāpo heke erze akile ye oniyokōrpe uu eyok poruwo wishī òr iluu? Ye onūrhu nahmepe uje otaak itso uje eyok poruwo wishī oshiyokōrkite.—

³ Jesús tatim òr im: —¿Inaãpo heke aluwelo erze ley uje Porrosht chibitkite par uje ahakõrlo erze uje olak poruwo wishi otata? ⁴ Porrosht tata im: “Atila eych hn ata” hn tatpo im: “Yeëk uje chiyuhu lahwo so mihnuwõho ir deych o kimijì ir data ich tyenij toy.” ⁵ Per olak athilo kinãha. Athilo uje yeëk tatim ir deych o kimijì ir data im: “Ye yok pwele uje tokosim olak erze kuchepe pork tokosim Porroshtni.” Uje ire tatim ir deych hn data shuu itsorz ich ontilo ire par uje ye takashim òr heke uhulo uje wichi ye tola ir deychpe. ⁶ Par uje ahakõrlo erze uje olak poruwo wishi ochibitkite ich shi uhulo itso uje Porrosht ley ye jukur. ⁷ Olak aho yũhirsh. Erze uje profeta Isaías tata ich ùru uje eyucha olak. Tata uje Porrosht sole:

⁸ “Ich shi erze oso òr ahwo uje onarim yok per òr aho kinãho. ⁹ Uje oteeychãha yok ich ye jukur pork oshiyokorãha oso shi itso uje tãra Porrosht per shi tãra oso òr eyuwo.”—

¹⁰ Eseekite hn Jesús tibii erze oso par otĩr ire. Tatim òr im: —Èrlo ahnũwo pahwo so par uje erahalo. ¹¹ Erze uje oso ochimchaha lahwo par otew ye duhu òr iluu mihnũpe. Shi erze uje otata wir uje tãra òr ahwo hn shuu òr iluu mihnũ.—

¹² Jesús ir akile otĩr ire hn otatim otsii: —¿Je eraha erze uje òr iluuta iich otsii fariseo uje ochunt erze uje athaka ich shuu otsitak owa?—

¹³ Jesús tatim òr im: —Papa de poõrc. Kimijì wir ye oniyokorãha oso uje Papa tata ich wichi tyenij sihna òr shuu itso uje chiyuhu pohir uro. ¹⁴ Moymlo òr. Wir sehe otseebe per shi òr itso olibo. Kimijì olibik iyebe hn olibit yet iyehe nër ich nos òr kay hn omasaha jotsit eheth.—

¹⁵ Pedro tatim Jesús im: —Atim òryok erze uje eteètaka par uje oyiraha.—

¹⁶ Jesús tatim òr im: —¿Je olak ilo òr? ¿Je ye erahalope? ¹⁷ ¿Je ye imeheeychpe erze uje masaha oso òr ahwo ich tĩr òr ijita? Uje uhurc ich tokolihi òr eheth. ¹⁸ Per erze uje tokolihi oso òr ahwo ich tãra òr aho. Wir uje shuu òr iluu mihnũ. ¹⁹ Erze mihnũwo uje tãra oso òr aho shuu òr eyuwo mihnũwo, hn shuu oshuu yet oshuu otoy, hn shuu otorãhaye, hn shuu oshiyokõr nos wir kuche uje ich mihnũwo uje ye onõyhi pishye ahirpe, hn shuu otohĩr, hn shuu otata lekushĩhiye par shuu yewo otsitakye, hn shuu ochinehniemye. ²⁰ Wir tãra oso òr aho hn shuu òr eyuwo mihnũwo, per uje ye onũrhu nahme par otaak wichi ye duhu òr iluu mihnũpe.—

Canaan yãr ye lotiis Jesuspe.

²¹ Eseekite hn Jesús tokolihiichis hno tĩr ese hniemich uje duwo de Tiro hn Sidón. ²² Timcharrza dechi uje tãra hniemich Canaan. Tatim Jesús ich sihnew lahwo so im: —Irhĩche, owa uje ãra owa porokkite rey David. Sehe tuu osir yok. Demonit de pijita eheth. Wichi shish shiyokõr mihnikĩhi ire.—

²³ Jesús chunt per ye dish latik. Ir akile otír hn otatim otsii: —Uhu wate tokolihi lika. Shish iyehe eyok nēr hn tibich.—

²⁴ Jesús im: —Porrosht shuu Tikirētni shi par takashim erze israel oso pork wir shi ōr itso obeje uje pyerte.—

²⁵ Per asa timcharrza sitír ire Jesús hn icha dete hnimoho ikich. Tatim im: —Irhīche, sehe tuu osir yok.—

²⁶ Jesús tatim wate im: —Ye ompe uje yeēk chiyuhu erze pan uje de ir aabo ōr ahir hn ishīm poyto.—

²⁷ Asa timcharrza tatim im: —Irhīche, ich ūru per erze poyto otew erze pan ukulo uje kay tāra ir yinsirc nemest eeych.—

²⁸ Jesús tatim asa timcharrza im: —Ich ūrpa uje ye otiis yokpe. Tiyokōr uje atim yok.— Ichii ir ijīta owich om.

Jesús chukuta osooho lagunta Galilea wir.

²⁹ Eseekite hn Jesús tokolihiichis nehech taachīhi wahacha lagunta Galilea wir. Hnoohochis. Wisik wisik hn dohīr kojach eeych hn sakahachis. ³⁰ Ich oso okihniya uje otakisho lawichihi ahir. Otōhwa erze uje pilich worbīt yakaha ōr hn erze uje ōr olibo hn erze uje ōr irpo. Yewo ōya ōr uje ōr permo kināho kināho. Ochībite ōr Jesús ikich hn nos chukuta ōr. ³¹ Heke erze oso ich ochishlabe uje omo erze irpo uje ochiilehet hn erze uje pilich worbīt yakaha ōr ich nos ōr owich om hn odīrk hn erze uje ōr olibo ich omo lekītiyo. Erze oso ich onarim Porrosht uje tibey erze ōr ihnapsō israel oso.

Jesús ishīm oso ōr poso uje ōr kwatro mil.

³² Eseekite hn Jesús tibii dakile otír ire hn tatim ōr im: —Tukuuna uje ahnūwo oso ich ōr losuhlaabo pork ich daalo tre uje ode lika pahīr hn kuche nihyokīhi ōr ahir par otew. Ye tahmūrpe uje tuu ohno otseyhi hn shi sewīt sēhi ōr pork tyenij yeēk torīt shuuu dehet pehet.—

³³ Ir akile otatim otsii: —¿Yuhu tāra irāāpo oposo par uje otew pork ahnūwo oso ich okihnīpa uje ode lika owich uje isa?—

³⁴ Jesús tatim ōr im: —¿Pan terīhi latikpo uje de olak ahir?— Otatim otsii: —Syete hn doshiyo ijaabo de per arhaabo.—

³⁵ Jesús tatim erze oso par uje otsakahachis hnimich. ³⁶ Chishew erze pan uje syete hn doshiyo ijaabo īya. Nihna Porrosht par erze poso hn sehek. Ishīm erze dakile hn wir oshīm erze oso. ³⁷ Nos wir ōr ire otew nehech otsatso. Ir akile ochish erze oposye uje otsatsoko nehech oshuu kanaste deyo yeno syete. ³⁸ Erze oso uje otaakkite ōr kwatro mil hnakīrbo per ye otiskēr timcherpe hn erze pikīhnino.

³⁹ Jesús tatim erze oso par ohno otseyhi, hn dohīr pohorrza ehēt hno tīr wahacha hnimich uje iich otsii Magadán.

Erze ör bahluwo sehe oduhu Jesús niyokör yarta.

16 ¹Eseekite hn erze uje ör iluuta iich otsii fariseo hn erze uje ör iluuta iich otsii saduseo ohno otír Jesús. Otatim par uje sehe oduhu niyokör yarta wahacha poörc kimiji ūru uje ire Cristo. Shi ör prowa Jesús. ²Jesús tatim ör im: —Uje deeych yaka ich atimloye on: “Poörc wihirt heke deychole ich ye ibikpe.” ³Uje dihirbit ich atimloye on: “Poörc wihirt hn kututa heke ele deeych ich tyenij ibik.” Uje eychimlo poörc ich erahalo kimiji ibik o kimiji ye ibikpe, per ye erahalope erze yar uje chibite orhōta uje terihi ese ishirīt uje Cristo taächa. ⁴Ahnüwo oso ich ör iluu mihnü. Wir shi ör itso timcharrza waa je toräha dabich pork oym Porrosht. Sehe oduhu tiyokör yarta per ye tiyokörpe. Shi tiyokör yarta itso uje tokolihi profeta Jonaskite.— Heke Jesús iim orihichis hn hno.

Erze fariseo ör ahwoso shi itso pan eyhita.

⁵Eseekite hn Jesús hör dakile otaachīhi wahacha lagunta pit yet per ir akile ochikey pan, ye otōhwape. ⁶Jesús tatim ör im: —Abeylship olak par ye wir onehnyēr olak erze uje ör iluuta iich otsii fariseo hn erze uje ör iluuta iich otsii saduseo onīra olak erze uje itso pan eyhita.— ⁷Ir akile otatimye otsii: —Ye yōhulo pan petikike heke tatim eyok shuu itsorz.— ⁸Per Jesús chiraha uje otatimye hn tatim ör im: —Olak shish otiislo yok. ¿Inaāpo heke athilo uje nīhyok pan? ⁹Shish ye erahalope uje titim olak. ¿Je ekeylo erze pan uje sinko, tokosim erze hnakirboni uje ör sinko mil? ¿Je ekeylo kanaste terihi latikpo uje emchahalo aho erze po uje otsatsoni? ¹⁰¿Je ekeylo erze pan uje syete, tokosim erze hnakirboni uje ör kwatro mil hn ekeylo kanaste terihi latikpo uje emchahalo aho erze po uje otsatsoni? ¹¹¿Inaāpo heke ye erahalope uje ye peyucha erze panpe uje tikitkēr olakike? Abeylship olak par uje ye wir onehnyēr olak erze uje ör iluuta iich otsii fariseo hn erze uje ör iluuta iich otsii saduseo onīra olak erze uje itso pan eyhita.— ¹²Heke ochiraha uje ye eyucha asa pan eyhita pishtpe. Shi tatim ör par uje ye wir onehnyēr ör erze fariseo hn erze saduseo onīra erze ör ahwoso uje oshiyokorāha oso.

Pedro chiraha uje Jesús wichi Cristo.

¹³Eseekite uje Jesús taachīhichis ese hnimich uje dīt de uje iich otsii Cesarea de Filipino hn tatim dakile im: —Yok tokōra poörzni. ¿Oso onerza uje yok yeēkpo?— ¹⁴Ir akile otatim ire otsii: —Ode uje otserza uje owa uu Juan lishi uje tohirm osoni, hn ode uje otserza uje owa profeta Elías lishi, hn ode uje otserza uje owa profeta Jeremías lishi o erze profeta poruwo wishi yeēk uje ikpo.— ¹⁵Tatim dakile im: —Hap olak, ¿ērzlo uje yok yeēkpo?— ¹⁶Simón Pedro tatim im: —Owa Cristo. Owa uu Porrosht uje shish ika ir Ijīt.— ¹⁷Jesús tatim im: —Simón, owa Jonás ijīt. Ich om

par owa pork nĩhyok hnakirbich uje shuu eraha erze uje atim yok. Shi Papa uje de poõrc wichi uje shuu eraha yok. ¹⁸Titim owa uje owa Pedro. Ese ahwosht uje otsii Pedro wichi kojach ijaap. Tiyokõr pihyuchihi ese kojach dich. Porrosht aabo wir õr itso pihyuch. Nos wir oso uje tyenij otĩr urhuta bahluta eheth nehe ode Satanás hme per wichi ye pwele nontew Porrosht aabo uje ohno ochiyuhu Satanás aabo ir hme par oshuu õr Porrosht aabo. Ich shi itso uje Satanás shiyeru pwert uhurra par uje ye duhu Porrosht aabo omasaha eheth per shish omasaha. ¹⁹Pedro, tokosim owa akirbo shi itso uje tokosim owa yabe par alebe hn etsẽr pwert uhurra hn uhu oso omasaha par Porrosht aabo. Kimiji ahuru lika ĩrmo ĩra asa uje itso yabe ich Porrosht shiyeru wahacha poõrc toy hn kimiji etsẽr lika ĩrmo ĩra asa uje itso yabe ich Porrosht sitsẽr wahacha poõrc toy.— ²⁰Uje Jesús sihna uje tatim dakile shuu itsorz ich tatim õr toy par uje ye otatim oso uje ire Cristo.

Jesús tata uje oso oshuu ire oshuu toy.

²¹Eseekite ichii Jesús tatim dakile uje tyenij hno tĩr Jerusalén hn erze dit oso õr bahluwo hn erze saserdote õr bahluwo hn erze uje oshiyokoraha oso waa ley waa je Moisés chichewkite tyenij oloter ire hn oshuu oshuu toy per je daalo tre nehe hn ire tyenij ikpo. ²²Pedro chiyuhu Jesús erze oso õr eheth hn tatim im: —Ĩrhiche, sehe tuu Porrosht nontew erze mihnuwo par uje ye tĩr owa hn oduhu owa oduhu ati.— ²³Jesús somtis ire hn tatim Pedro im: —Satanás, atokolihĩ pikich. Shi sehe ontew yok. Owa ye ahmũrpe erze uje Porrosht sahmũr. Shi ahmũr erze kuche uje hnakirbo otsahmũr.— ²⁴Jesús tatim erze dakile im: —Uje sehe yeẽk masaha par pakilak ich tyenij iim erze kuche uje sahmũr hn tyenij ewenta erze kuche uje tĩr ire shi itso uje ihyõk krus hn ĩya yok. ²⁵Nos wir erze uje otsahmũr erze kuche uje de nãhu ĩrmo uje otoy ich ye õr ikirĩt chihĩ Porrosht ahĩrpe, per nos wir uje oym kuche uje de nãhu ĩrmo par oshiyokõr uje tahmũr ich õr ikirĩt de Porrosht ahĩr. ²⁶Ye jukur kimiji yeẽk nos serz ahnuwo kuche uje de ĩrmo hn uje toy ich ye ir ikirĩt chihĩ Porrosht ahĩrpe. Nĩhyok uje yeẽk pwele tiya dekiritĩhi Porrosht ahĩr. ²⁷Yok tokõra poõrznĩ. Uje tikirẽt nehe ich yok hũre shi yok itso Papa, hn yok anjele õya yok. Tyenij tokosim nos wir oso shi uje otserz kimiji om o kimiji mĩhnik. ²⁸Ich ũrpa uje titim olak. Somiramo ode olak ahĩr uje ehn yahpaa otoy ich tyenij omo yok uje tokõra poõrznĩ uje tikirẽt par tikibey oso.—

Jesús shuu ire kinaha dakile õr ikich.

17 ¹Eseekite uje ich iyuwe daalo seys hn Jesús hnoy Pedro, Santiago hn Juan. Ese Juan wichi Santiago leshap. Jesús hno iyebe dohir kojach eeych uje ich porĩt hn wir oyehe nẽr. Nĩhyok yeẽk uje de õr ahĩr,

shi òr ire. ²Jesús shuu ire kinaha dakile òr ikich. Ir ilehet hũre shi itso deeych hn ir ishuwo ich poro shi itso luu yokòrt. ³Wir omo Moisés hn Elías uje otokolíhi Jesús ahir hn omo uje okeytkēr Jesús. ⁴Heke Pedro tatim Jesús im: —Irhĩche, ich om uje òryok de lika. Kimiji ahmũr ich tiyokòr pwerto tre tĩra pohir ihyo, yet par owa hn yet par Moisés hn yet par Elías.— ⁵Uje ehn Pedro chiilehet hn ukuhurrza ihnimichihĩ òr eeych. Wate poro shi itso uje hũre. Sajuwe òr hn ahwoso tĩra ehēt tatim òr im: —Wichĩ uu yok Pijit pisht uje tahmũr, hn tahmũr uje shiyokòr. Ērlo uje wichĩ tata.— ⁶Uje erze ir akile ochunt erze ahwoso hn ocha dete hnimo nehech òr une terihĩ hnimich pork ich otolpa. ⁷Jesús hno tĩr òr. Sakahir òr hn tatim òr im: —Alehetlo. Ye atililo.— ⁸Uje otsem dehe oteychim ich shi omo Jesús. Nihyok yeēk uje de ire ahir. ⁹Uje ehn Jesús hør dakile oyhnimichihĩ kojach eeych hn tatim òr im: —Ye atimlo latik erze uje amloko. Yok tokòra poòrznĩ. Uje yok ikpo nehe hnii atimlo oso.— ¹⁰Erze ir akile shi òr eyucha Elías heke otatim Jesús otsii: —Erze uje oshiyokorāha oso waa ley waa je Moisés chichewkite ĵinaāpo heke otata uje tyenij Elías taācha wap hn owa alehe nēr?— ¹¹Jesús tatim òr im: —Ich ũru uje Elías tyenij tĩrēt wap par shuu oso ochimĩt ire. ¹²Titim olak uje Elías taāchni per wir ye odiraha irpe. Shi oshiyokorĩhi ire uje otsahmũr. Yok tokòra poòrznĩ. Tyenij oloter yok toy.— ¹³Uje ich uhurc Jesús ir akile okemihĩ uje shi eyucha Juan uu tohirm oso wichĩ itso Elías.

Jesús chiyuhu demonit pikihñint ehēt.

¹⁴Eseekite uje Jesús hør dakile otaachĩhi wahacha uje oso ode hn hnakĩrbich sitĩr ir Jesús. Icha dete hnimoho ikich hn tatim im: ¹⁵—Irhĩche, sehe tuu osir pijit. Atake chishew ire. Ich shuu permpa. Shish shuu kayihĩ jwekita ehēt hn shuu kayihĩ awit toy. ¹⁶Tokòhwaka teya akile. Ēr prowa sehe odukuta per ye òr pwelpe.— ¹⁷Jesús tatim erze oso im: —Shi otiislo yok hn ahakòrlo uje ich mihñũwo. ĵDaalo terihĩ latikpo nehe uje shish yok de olak ahir hn shish tyenij yok ewenta olak pork shish otiislo yok? Ēhwilo ese pikihñint eylo lika.— ¹⁸Jesús tatim ese demonit im: —Atokolihĩ ese pikihñint ehēt.— Ich tokole ichii ese pikihñint owich om. ¹⁹Uje oso onihyokihĩ Jesús ahir hn ir akile otĩr ire. Otatim otsii: —ĵinaāpo heke ye òryok pwelpe par oyiyuhu ese demonit?— ²⁰Jesús tatim òr im: —Ye olak pwele eyuhulope pork olak meytii koswāha yok. Titim olak ich tuu ũrpa. Kimiji ma ye otiislo yok nehech tokole shi itso asa pohorrza eyhi uje iich otsii mostasa heke olak pwele atimlo ese kojach par uje sihnok lalerc ich hno. Uje olak ye otiislo yok itsorz ich nos olak pwele ahakòrlo erze kuche. ²¹Ese demonit uje de ese pikihñint ehētiķe ich ye ilo demonyo yewope. Nos wir demonyo uje itso ese uje de pikihñint ehētiķe ye shi tokolpe uje atimlo ire. Tyenij olak orar hn moymlo olak poso par eyuhulo erze demonyo.—

Jesús tatpo uje oso oshuu ire oshuu toy.

²²Eseekite uje ehn Jesús hōr dakile odechi hñimich Galilea hn tatim ōr im: —Yok tokōra poōrznī. Tyenij yeēk ishīm yok oso ²³hn wir oshuu yok oshuu tikiti, per je daalo tre nehe hn yok ikpo.— Uje tatim ōr shuu itsorz ich shuu ōr dosdarakpa.

Jesús ishi bahat uje otsapur par templo.

²⁴Uje Jesús hōr dakile otaachīhi dit Capernaum hn erze uje ōr kobra hnote par templo otīr Pedro hn otatim otsii: —¿Je owa maestro doshi erze hnote par templo?— ²⁵Pedro tatim ōr im: —Ēhe.— Uje Pedro masaha pwert ehēt par tatim Jesús hn Jesús tatim ire wap im: —Simón, sehe tuu atim yok. Erze reye uje ode ir hñimo ¿je oduhu daabo doshi ire hnote o je oduhu yewo odoshi ire?— ²⁶Pedro tatim im: —Erze yewo.— Jesús tatim im: —Heke erze reye ōr aabo ye odoshipe. ²⁷Ye tahmūr uje tuu otsitak eyok heke bo etīr wahacha lagunta hn ēsher. Uje ahiru doshit webich osht ich eychim ir ahwo ehēt, peychporrza de. Wichi par eshi yok hn eshi owa toy.—

Jesús ir akile sehe odiraha yeēkpo ōr ehēt uje ich ma dich.

18 ¹Eseekite uje shiyehē wichi deeych hn Jesús ir akile otīr ire, otatim otsii: —¿Yeēkpo uje ma dichīhi Porrosht aabo ōr ehēt?— ²Jesús tibii pikihnint shuu iyehe ōr ehēt hn tatim ōr im: ³—Titim olak ich tuu ūrpa. Kimiji ye uhu olak eyuwo kināho hn ye otiislo yok itso pikihnino uje ye olotiis ahwospe ich ye amsahalo par olak Porrosht aabo. ⁴Yeēk uje ye narim ire hn ye lotiis Porrosht shi itso ese pikihnint uje ye lotiis ōr ahwospe wichi ich ma dich Porrosht aabo ōr ehēt.— ⁵Hn Jesús tatim ōr im: —Uje yeēk sahmūr ese pikihnint shi pork wichi sahmūr yok ich sahmūr yok toy.

⁶Per kimiji yeēk duhu erze pikihnino yeēk uje ye lotiis yok niyokōr uje mīhnik, uje ehn yahpaa duhu niyokōr uje mīhnik ich ma om par ire kimiji yeēk duhu tuuhna kojach dich hn tāra chibite onoota ehēt par uje toy. ⁷Ich yarhakpa par erze oso uje oshuu yewo oshiyokōr mīhnūwo. Shish de uje oshuu yewo oshiyokōr mīhnūwo per ich yarhakpa erze uje tyenij tīr ese hñakīrbich uje shuu yet shiyokōr uje mīhnik. ⁸Kimiji olak yeēk niyokōr uje mīhnik shi itso uje hmata shuu shiyokōr mīhnik o kimiji hñitita duhu niyokōr uje mīhnik ich tyenij iim uje shiyokōr ese mīhnik shi itso uje chekshehe namita nohmata o kimiji derrza hn tāra. Ich ma om shi itso uje pilich worbit yakaha ire par uje taachīhi ese owich nehe uje ōr ikirīt de uje yelij nihna ire, je uje hme otiyer hn hñite otiyer de hn shuu ochīmchaha ire asa jwekita ehēt waa je yelij nihna ire. ⁹Kimiji olak yeēk teychim kuche heke shiyokōr mīhnik shi itso uje ir onta shuu shiyokōr ese mīhnik, ich ma om uje iim, ye teychim

shi itso uje chiyuhu nonta hn tãra. Ich ma om uje shi onta nohmira de uje taachĩhi ese owich nehe uje òr ikirĩt de uje yelij nihna ire, je uje ile otiyer de hn shuu otãra ire ochibĩte ire asa urhuta bahluta eheth nehe.—

Oso òr itso obeje uje òr pyerte.

¹⁰Eseekite hn Jesús tatim dakile im: —Abeylship olak par uje ye olak yeẽk dibite uje erze pikihnino ijaabo yeẽk ye jukur. Titim olak erze anjele uje otibey erze pikihnino shish otĩr Papa ile ikich wahacha poõrc. ¹¹Yok uje tokõra poõrc Tikirẽtni par tokoshi oso òr hnitewihi Porrosht ahir. Wir shi òr itso uje òr pyerte. ¹²Uhu olak eyuwo tisĩr erze uje tyenij titim olak. Kimiji hnakirbich ir obeje chihĩ syen hn sohmata pyerte, wichi iim erze yerihichis uje noventa y nueve ese wirĩt eeych hn hno chukwi asa yata waa je pyerte. ¹³Titim olak uje wichi chish asa waa je pyerte ich aylpa. Ich ma aylpa par asa nohmata je erze yẽr uje noventa y nueve uje ye pyertpe. ¹⁴Olak Deych uje de poõrc itspo, ye nahmũrpe uje erze pikihnino yeẽk pyerte.—

Porrosht aabo tyenij shish òr perdonarye.

¹⁵—Titim olak. Kimiji Porrosht aabo yeẽk niyokõr mihnikĩhi olak yet ich wichi tyenij tĩr ire hn tatim uje shiyokõr mihnikĩhi ire. Shi ire hn ese yet uje okeytkẽrye. Kimiji wichi tẽr ire ich takashim ire shuu cheeshpo par shiyokõr uje Porrosht sahmũr. ¹⁶Kimiji ye nahmũr tẽr ire ich tyenij hnoy hnakirbich yet o kimiji òr osiyer par uje otĩr otẽr uje keytkẽr wichi toy. Heke erze òr osiyer o kimiji òr tre ochiraha uje wichi shiyokõr. ¹⁷Kimiji ye nahmũr tẽr òr ich tyenij otatim nos wir Porrosht aabo uje otaakisho lawichihĩ iglesya eheth. Kimiji ye nahmũr tẽr erze Porrosht aabo ich tyenij wir ochibĩte uje wichi shi itso uje ire ye Porrosht aappe per Porrosht aap. Wichi shi itso dihip kinaha uje ye diraha Porroshtpe hn shi itso wir yeẽk erze uje òr kobra hnote par gobierno.

¹⁸Titim olak ich tuu ũrpa. Uje ontĩlo wichi ele ĩrmo uhulo itsorz ich Porrosht sontewihi wahacha poõrc toy. Erze uje ye ontĩlo òr lika hnĩmich ich Porrosht ye nontewihi wahacha poõrc toy. ¹⁹Ich titim olakpo. Kimiji olak osiyer uje olak eyuwo itsye ele ĩrmo uje apurlo Papa uje de poõrc, ich shiyokõr uje apurlo ire par olak ²⁰pork kimiji òr osiyer o kimiji òr tre uje otakisho lawich shi pork ye olotiis yok ich yok dechi òr eheth.—

²¹Heke Pedro tĩr Jesús hn tatim im: —Ĩrhĩche, uje shish pishĩbich shiyokõr mihnikĩhi yok ¿je om uje yok perdonar nehech terihĩ syete bese?— ²²Jesús tatim im: —Ye titim owape uje owa perdonar ire nehech terihĩ syete bese. Ye uhurtĩkish uje tyenij owa perdonar ire.

Jesús siteẽta uje rey sepyẽr yeẽk uje ye ire perdonar yet.

²³Heke tyenij titim owa. Ese uje Porrosht shiyokõr par tibey daabo shi siteẽta uje rey nishii debiyo òr hnitew. ²⁴Uje ehn nishii erze yewo òr

hnitew hn otōhwa yet uje ir hnitewta ich datpa, miyones. ²⁵Ir ibich ich ye pwele uje doshi ir hnitewtape heke ir irhīch tatim par uje chiwāha ire par ōr yilak, ir irāhta hn ir aabo hn nos wir ir kushjāro par uje ishi ir hnitewta. ²⁶Ir ibich icha dete hnimoho ese rey ikich hn sapur ire im: “Irhīche, sehe tuu hap enta yok lishi nehech nos tokoshi yok hnitewta nehe.” ²⁷Heke ese rey chuuna uje ese ir ibich ich losuhlaap hn iim erze ir hnitew uje de ire. ²⁸Uje ese ir ibich tokolihiichis hno hn chish rey ibich yet uje ir hnitewta de ire pikaap. Chishew wichi weheta hn tatim im: “Eshi asa owa hnitewta uje de yok.” ²⁹Wichi icha dete hnimoho ire ikich hn tatim im: “Sehe tuu hap enta yok lishi nehech nos tokoshi yok hnitewta nehe.” ³⁰Per ese yet ye nahmūrpe uje neta wichi. Shuu ochimchaha karsel ehēt nehech nos ishi ir hnitewta. ³¹Uje erze rey ir ibiyo yewo omo uje wichi shiyokorīhi ese deshībich yet ich shuu ōr dosdarakpa. Wir ohno hn otatim rey uje wichi shiyokōrke. ³²Heke ese rey shuu otibii wichi. Tatim im: “Owa ich eluu mīhnū. Uje apur yokhna ich nos tokoym erze owa hnitew uje de yok. ³³¿Īnaāpo heke ye eenape uje eshibich losuhlaap shi itso uje tukuuna uje owa losuhlaaphna?” ³⁴Heke ese rey ich chesdelpa. Chowāha wichi hn ishīm ire erze uje otibey karsel ehēt par oloter ire nehech nos ishi ir hnitewta.— ³⁵Jesús tatim dakile im: —Papa uje de poōrc tyenij shiyokorīhi olak shuu itsorz itso erze uje titim olakike kimiji ye olak perdonar olak leshibo hn shi emerīhi olak aho.—

Ye ompe hnakirbich hōr nerāhta oymye.

19 ¹Eseekite uje Jesús nos tatim ōr erze kuche hn tokolihiichis hnimich Galilea. Hno tīr wahacha hnimich Judea Jordán pit yet. ²Ich oso okihniya oyehe nēr hn nos chukuta erze uje ōr permo.

³Erze uje ōr iluuta iich otsii fariseo otsitīr ire Jesús. Wir shi sehe ōr prowa Jesús heke otatim otsii: —Sehe oyiraha kimiji hnakirbich sowe ley uje iim nerāhta shi pork sehe noym wate.— ⁴Jesús tatim ōr im: —Olak erahalo uje Porrosht ahwoso tata uje shiyokōr irmōkite ich shiyokōr hnakirbich hn shiyokōr timcharrza ⁵hn Porrosht tata im: “Hnakirbich tyenij iim deych hn iim data par uje hōr nerāhta ōhyiye ahir. Wir otokole shi ōr nohmira” ⁶heke ich ye ōr osiyerpe, shi ōr sohmira. Porrosht shuu iīye heke ye ompe uje hnakirbich sehek erze uje Porrosht shuu iīye.— ⁷Otatim otsii: —Kimiji ye om otsehek ire ¿Īnaāpo heke Moisés chibite uje hnakirbich pwele shiyokōr hutita par ishīm nerāhta hn iim wate?— ⁸Jesús tatim ōr im: —Shi pork olak hu kata heke Moisés chibite par uje atsilo ebitilo hute hn asimlo olak irēhte par moymlō ōr, per uje ĩrmo tenitkite ich ye ilorzpe. ⁹Per yok titim olak kinaha. Yeēk uje iim nerāhta hn ĩhi yata ahir ich torāha nerāhta per kimiji wate torāha dabich wap ich wichi ye torāha nerāhta uje iim wate.— ¹⁰Jesús ir akile otatim otsii: —Kimiji hnakirbich ye pwele noym nerāhta ich ye ompe uje yeēk

chiileku.— ¹¹ Jesús tatim òr im: —Ye nos hnakirbo òr pwele ewentpe uje nìhyok òr irèhte. Shi erze uje Porrosht takashim òr uje ye duhu òr irèhtirsh ich wir uje òr pwele ewenta. ¹² Hnakirbo yewo ode uje oshùrha shi òr itsorz heke yelij oduhu tímcher òr hmiker. Hn hnakirbo yewo ode uje ye odiilekupe pork yewo ochiyuhu òr ite. Hn yewo ode uje ye onahmùr odiilekupe pork sehe oniyokòr Porrosht ibiyu uje ye òr pwele oniyokòr kimiji òr irèhte de. Yeèk uje pwele shiyokòr shuu itsorz ich om par ire.—

Jesús chibite nahme pikihnino òr hu eeyo.

¹³ Eseekite hn oso ohnoy pikihnino otseya òr Jesús par chibite nahme òr hu eeyo hn orar sapur par òr ire, per ir akile otatim erze oso par uje ye oduhu otòhwa erze pikihnino odeya òr Jesús. ¹⁴ Jesús tatim dakile im: —Moymlo erze pikihnino shi otirèt otìr yok. Ye ontìlo òr pork erze oso uje ye olotiis yok ich shi òr itso erze pikihnino uje ye olotiis òr ahwospe wir uje omasaha par Porrosht aabo.— ¹⁵ Jesús chibite nahme erze pikihnino òr hu eeyo. Uje yuwirke hn tokolihichis hno.

Hnakirbich uje irhìch dich keytkèr Jesús.

¹⁶ Eseekite hn hnakirbich yet sitìr ire Jesús. Tatim im: —Maestro, owa eluu om. ¿Tiyokòr latikpo uje om par pikirìt de uje yelij nihna ire?— ¹⁷ Jesús tatim wichi im: —¿Inaàpo heke atim yok uje piluu om? Shi sohmira de uje ich om. Kimiji sehe etìr ese owich uje ikirìt de uje yelij nihna ire ich ye aluwe nos wir erze ley uje Moisés chichewkite.— ¹⁸ Ese hnakirbich tatim im: —¿Leyiràha uje tyenij tiyokòr?— Jesús tatim im: —Ye tuk oso uhu otoy, hn ye oràha eràhta, hn ye ohìr, hn ye atim ekushì jwe par uhu sepyèr yet. ¹⁹ Atìla eyeh hn atìla ata. Ahmùr eshibo uhu itso uje ahmùr owa.— ²⁰ Ese hnakirbich tatim Jesús im: —Nos tiyokòr erze uje atim yokike. ¿Yehe latik chihi par tiyokòr?— ²¹ Jesús tatim im: —Kimiji sehe uhu eluu om ich bo, hn nos anuwàha owa kushjāro uje de ahìr. Asim baho erze losuhlaabo heke owa premyo kihniya de poòrc hn erèt Mēya yok.— ²² Uje ese hnakirbitit chunt erze uje Jesús tatim ireke ich tokole hno. Wichi ich dosdarakpa pork ire ich irhìch dich.

²³ Jesús tatim erze dakile im: —Titim olak ich tuu ùrpa. Ich kwestpa par erze ihìr deyo omasaha par Porrosht aabo. ²⁴ Titim olakpo. Kameylo ye pwele masaha awujita ontape ich erze ihìr deyo òr itspo ye òr pwele omasaha par Porrosht aabo.— ²⁵ Uje erze ir akile ochunt erze uje tatim òrke ich ochishlabpa. Otatimye otsii: —Kimiji ye erze ihìr deyo òr pwele otìr Porrosht ahìr ich nìhyok yeèk uje pwele tìr ire ahìr nehe.— ²⁶ Jesús teychim òr hn tatim òr im: —Oso ye òr pwele oduhu ire Porrosht aabo per Porrosht pwele nos shiyokòr kuche. Wichi pwele shuu omasaha par ir aabo.— ²⁷ Pedro tatim ire im: —Irhìche, nos oyukwim òryok kushjāroni

par oyukwīya owa. ¿Latik chíhi par òryok nehe?— ²⁸Jesús tatim òr im: —Titim olak ich tuu ūrpa. Yok tokōra poōrzni. Uje takaashpo nehe ich tuu ĩrmo ahle hn tiyakaha pibīta waa je ich ihīrpa. Olak uje shish meylo yok tyenij akahalo erze olak ibe eeyo toy uje dose pork olak jwe nehe par eychimlo erze israel oso uje òr wee dose kimiji oniyokōr uje om o kimiji oniyokōr uje mihñūwo. ²⁹Nos wir uje oym dahuwo o kimiji deshībo o kimiji nanīme o kimiji deyo o kimiji dati o kimiji onoym deyjo o kimiji òr hnimo shi par oshiyokōr uje tahmūr, wir uje Porrosht ishīm òr kushjāro ich shuu kihnipa hn ishīm òr ikirīt uje yelij nihna ire. ³⁰Ele ahle ich okihniya uje oshuu ire deyo per deeych yet nehe ich Porrosht ye duhu òr deyo. Ele ahle ich okihniya uje oso ochibite uje ye òr deyo per uje terihī uhurc nehe ich Porrosht chibite wir shuu òr deyo.—

Jesús siteēta uje hnakīrbich chish hnakīrbo par ochishew obiyo.

20 ¹Eseekite hn Jesús siteēta tatim oso im: —Uje Porrosht shiyokōr par tibey laabo ich itso hnakīrbich uje sehe duhu odukwēr jōro. Wichī tokolihi lahuch dihīrbīt pisht. Hno tīr ese owich uje hnakīrbo otsakaha par oteyāha obiyo. ²Tatim òr uu bahat par ese deeych uje chish obiyoho ĩr shakīrrza ehēt. Otsahmūr heke shuu ohno ochish obiyo. ³Uje a la nueve dihīrbīt hn hno tīr ese owichpo. Umo hnakīrbo yewo uje odechī uje oteyāha obiyo. ⁴Tatim òr im: “Bolīlo aslo obiyoho wahacha yok shakīrrza toy hn tokoshi olak uje ich om.” Heke wir ohno. ⁵Uje ich deeych pehet hn hno tīr ese owichpo hn uje a la tre yilka ich hnopo tīr ese owich hn shuu wir otīr shakīrrza ehēt itso erze yewo. ⁶Uje ich a las sinko yilka hn cheeshpo tīr ese owich hn chish hnakīrbo yewo uje shish odechī. Tatim òr im: “¿Īnaāpo heke shish akaha liklo nehech yilka hn ye aslo obiyope?” ⁷Otatim ire otsīi: “Nīhyok yeēk uje ishīm òryok ibiyo.” Tatim òr im: “Bolīlo aslo obiyoho wahacha yok shakīrrza ehēt toy.” ⁸Uje terihī yīlkashīp hn ese ĩrhīch tatim ĩr kapata im: “Ebīi erze uje ochish obiyoko. Eshī òr uje otserz. Wap eshī erze yewo uje ochish obiyoko ich yīlkashīp nehech terihī erze uje ochish obiyoho dihīrbītīke.” ⁹Uje otirēt erze uje ochish obiyoho a las sinko yilka ich nohmīr nohmīr wichī ishī òr par deeych nohmīra ĩr bahat. ¹⁰Uje ich uhurc hn nishīi erze uje ochishew obiyoho dihīrbīt pishtīki. Wir oshuu deyuwo tīšīr uje ich ma otserz kihniya per shī ishī òr uje ochish obiyo ese deeych nohmet itso erze yewo. ¹¹Uje ishī òr ich ochinehñīm ese nensīrc. ¹²Otata otsīi: “Erze uje otaāchaka ochishew obiyo shī una hora per eshīlo òr uhulo òr itso òryok uje oyish obiyo ich oyihñew ese deeych nohmet hn ich deeych duhlu.” ¹³Per ese òr ĩrhīch tatim òr yet im: “Hmeychīm sham, ye tiyokōr mīhnikīhi owape. Atīm yokīke par asew obiyo ese deeych nohmīra ĩr bahat. ¹⁴Boy uje owa erz hn bo. Sehe tokoshi ese uje iyehe uhurc itso uje tokoshi owaka. ¹⁵Ye tīkiyuwe leyepē uje tiyokōr uje tahmūr tīra yok hnote.

Owāha yok shi pork ye tarhāk pishujārope.”—¹⁶ Heke Jesús tatim ōr im: —Ich tuu imeheeych erze uje oyehe uhurc wir uje tyenij tuu oyeebe hn erze uje oyeebe wir uje tuu oyehe uhurc.—

Jesús tatim dakile uje oso oshuu ire oshuu toy.

¹⁷Eseekite uje ehn Jesús de dehet pehet uje hno tīr dīt Jerusalén hn chiyuhu erze dakile uje ōr dose oso ōr ehēt hn uje ehn ohno hn tatim ōr im: ¹⁸—Hmeychimlo, yitīrlo dīt Jerusalén. Yok tokōra poōrzni. Tyenij yeēk ishīm yok erze saserdote ōr bahlūwo hn erze uje oshiyokorāha oso waa ley waa je Moisés chichewkite. Wir tyenij ochibite par uje oshuu oshuu yok ¹⁹hn tyenij oshīm yok erze dihipo kināho par uje wir oloter yok hn otsepyēr yok hn ochowishihi yok krus eeych par oshuu tikiti per je daalo tre nehe ich yok ikpo.—

Zebedeo ir irāhta sehe duhu daabo ma ōr deyo.

²⁰Eseekite hn Zebedeo ir irāhta hōr wir laabo otsitīr ire Jesús. Wate icha dete hñimoho Jesús ikich hn sapur kuche. ²¹Jesús tatim wate im: —¿Sehe apur yok latikpo?— Hn wate tatim im: —Uje amsaha nehe par rey ich sehe tuu apur pijo uhu yet lakaha aāchta hn yet lakaha aachjārrza.— ²²Jesús tatim ōr im: —Ye erahalope uje apurlo yok. Erze kuche mihñūwo uje tyenij tīr yok wir shi itso uje tyenij tokoho otich uje chiyok de basta ehēt. ¿Je olak pwele uje ehelo toy?— Otatim otsii: —Ēhe, ōryok pwele.— ²³Jesús tatim ōr im: —Tyenij ehelo ese otich uje de yok basta ehēt per par akahalo paāchta hn paachjārrza ich ye yokpe uje tiihla erze uje otsakaha pahir. Shi Papa wichi uje chiihlani yeniipo uje otsakaha wahacha nehe.—

²⁴Uje Jesús akile yewo uje ōr dye ochunt uje erze ōr osiyer otata ich wir ochowāha erze osiyer uje ōr leshibye, ²⁵per Jesús nos tibii wir dakile hn tatim ōr im: —Erahalo uje erze dihipo kināho ōr bahlūwo ochīpa nahnapsō hn erze wirmshiro ochīpa ōr toy. ²⁶Ye ompe uje uhu olak itso ōr. Uje sehe olak yeēk duhu ire dich ich tyenij masaha par olak ibik duhu ire ²⁷hn uje sehe olak yeēk duhu ire ma dich ich tyenij shiyokōr shi itso uje olak yilak. ²⁸Yok tokōra poōrzni. Tikirētni ye par tuu oso otakashīm yok. Shi Tikirētni par takashīm ōr hn tikiti par tokoshi oso okihniya ōr hñitewihi Porrosht ahir.—

Jesús chukuta olibo.

²⁹Eseekite uje Jesús hōr dakile otokolihichis dīt Jericó ich oso okihniya oyehe ōr nēr. ³⁰Hnakirbo ōr osiyer uje ōr olibo shi otsakaha dehet wir. Ochunt uje Jesús chikāhachis heke otibii ich otsihnew lahwošo otatim otsii: —Irhiche, owa uje āra owa porokkite rey David. Sehe oyuhu osir ōryok.— ³¹Erze oso otatim ōr par uje ye otibich per shish ma otibich

otatim otsii: —Irhîche, owa uje ãra owa porokkite rey David. Sehe oyuhu osir òryok.— ³²Jesús iyehé. Tibii erze hnakirbo òr osiyer uje òr olibo. Tatim òr im: —¿Sehe uhulo tiyokòr latikihi olak?— ³³Otatim otsii: —Irhîche, sehe oyuhu ekuta òryok ile par oyumo lekitiyo.— ³⁴Jesús chuuna uje wir òr losuhlaabo hn sakahir òr ile. Ichii erze olibo omo lekitiyo hn oyehe Jesús nêr toy.

Jesús taachîhi Jerusalén itso uje rey taâcha.

21 ¹Eseekite uje ich ta par Jesús hór dakile otaachîhi Jerusalén hn sehe duhu dakile òr osiyer odo otîr ese dit ijaabit iich otsii Betfagé uje dechi wîrit wirc uje iich otsii Olivos. ²Heke tatim òr im: —Bolilo etîrlo ese dit ijaabit uje de olak ikich. Buritita hn ir ijît iya dechi ese dit ebich. Oshiyeru dehet wirc. Ehyulo hn ôhwilo. ³Kimiji yeêk tatim olak ile: “¿Inaãpo heke bolilo erze burito?” ich atimlo ire on: “Irhîch nesita. Je wisik wisik hn shuu cheeshpo.”— ⁴Uje Jesús shuu oshiyokòr shuu itsorz ich shuu Porrosht ahwoso yakaha uje profetit chichewkîte. Porrosht tatim ese profetit im:

⁵—Erze israel oso uje odebuhu Jerusalén siteêta òr itso ese dit Zion ir ijîta. Atim òr uhu itsorz im: “Hmeychimlo, olak rey tirêt tîr olak. Wichi ye narim irpe. Tirêt iyâha buritit. Ese buritit ir data iya.”— Wir uje profeta tatkîte.

⁶Jesús akile ohno oshiyokòr uje tatim òrke. ⁷Otôhwa asa buritita hn ir ijît. Ochibîte lasuwo eeych itso jerkit hn Jesús iyâha. ⁸Ich oso okihniya uje odechi. Ochitiis lasuwo ese dehet hn yewo ohyo pohir uke ochibîte dehet toy par chikâha eeych. ⁹Hn erze oso uje oyeebe hn erze uje oyehe Jesús nêr otata ich otsihnew lahwoso otsii: —Oyahmûr ese uje târa ir porokkite rey David. Ich Porrosht tyenij takashim wichi uje ire shuu tirêt. Òryok narim Porrosht uje de poòrc.— ¹⁰Uje Jesús taachîhi dit Jerusalén hn nos wir oso uje odechi ich ochishlabe. Otatimye otsii: —¿Yeêkpo ele uje taâcha?— ¹¹Yewo otata otsii: —Liki profetya Jesús. Târa dit Nazaret uje dechi hnîmich Galilea.—

Jesús chiyuhu oso uje ochiwâha kuche asa templo patikit eheth.

¹²Eseekite uje Jesús masaha Porrosht ir templo patikit eheth hn nos chiyuhu erze oso uje ochiwâha kuche hn erze uje otiya kuche. Sehnîmich erze yewo òr nemesa uje oshuu hnote kambya, hn sehnîmich wir òr îbe erze uje ochiwâha paloma. ¹³Tatim òr im: —Porrosht ahwoso tata uje ire sole: “Pihyuch wichi uje oso otata uje wichi owich par uje òr orarihi per olak uhulo itso uje echiko òr ihyuch.”—

¹⁴Uje Jesús dechi templo patikit eheth hn wir otîr ire erze uje òr olîbo hn erze uje pilich worbît yakaha òr. Ichii nos chukuta òr. ¹⁵Erze saserdote òr bahluwo hn erze uje oshiyokorâha oso waa ley waa je Moisés

chichewkite omo erze kuche uje Jesús shiyokör uje ye latik pwele niyokör hn ochunt erze pikihnino uje ode templo patikit eheth otata ich otsihnew otsii: —Oyahmür ese uje tãra ir porokkite rey David.— Uje wir ochunt uje itsorz ich ochesdelo. ¹⁶Otatim Jesús otsii: —¿Je ye entpe uje erze pikihnino otata? Ich ye ompe.— Jesús tatim ör im: —Èhe, tukunt. Olak erahalo uje Porrosht ahwoso tata im: “Erze pikihnino hn erze yewo uje yesh ör ijaabo uje yesh ochuku wir uje tuu oteychãha yok.”—

Jesús sajjir pohorrza higuera.

¹⁷Eseekite hn Jesús iim erze ör bahluwohochis. Tokolihì dit Jerusalén hn hno tîr Betania hn sakahachis uje dihlahk.

¹⁸Uje dihribit hn Jesús tokole. Uje ehn hno cheeshpo tîr Jerusalén hn iyuwo sêhi. ¹⁹Umo pohorrza waa je iich otsii higuera uje de dehet wirc. Sitîr ire hn teychim per ye eerîrsh, shi îhyo. Tatim asa pohorrza im: —Ich yelij eerîrsh nehe.— Ichii asa pohorrza kako. ²⁰Ir akile ochishlabe. Otatimye otsii: —Hmeychimlo uje asa pohorrza kako shichish.— ²¹Jesús tatim ör im: —Titim olak ich tuu ürpa. Kimiji ye otiislo yok hn ye olak koswãha yok heke olak pwele ahakörlo itso uje tiyokörîhi asa pohorrza higuera. Ye shi erzepe uje ahakörlo. Ich olak pwele atimlo ese kojach dich on: “Ãra owãha onoota bahluta eheth,” ich shiyokör uje atimlo ire. ²²Nos wir kuche uje olak orar apurlo Porrosht kimiji ye otiislo ich ishîm olak.—

Ör bahuwo sehe odiraha Jesús ukurbo tãra irãpo.

²³Eseekite hn Jesús masaha templo patikit eheth. Uje ehn shiyokörãha oso ich erze saserdote ör bahuwo hn erze dit oso ör bahuwo otsitîr ire Jesús. Otatim otsii: —¿Latik ukurbo uje de owa heke ahakör uhu itsorz? ¿Yeék dosim owa akirbo par ahakör uhu itsorz?— ²⁴Jesús tatim ör im: —Yok itspo sehe tuu atimlo yok. Kimiji atimlo yok uje titim olak ich titim olak yeékpo uje ishîm yok pukurbo par tiyokör erze kuche. ²⁵Atimlo yok ¿yeékpo uje shuu Juan tohîrm oso? ¿Je Porrosht uje shuu tohîrm oso o je hnakîrbo?— Wir okeytkêrye otsii: —Kimiji yitimlo yör: “Porrosht” ich tyenij tatim eyok im: “¿Inaãpo shi otiislo ire?” ²⁶Hn kimiji yitimlo uje hnakîrbo oshuu tohîrm oso ich yarhak par eyok pork erze oso otata uje Juan wichi profetya.— ²⁷Heke otatim Jesús otsii: —Ye oyiraha keshi yeékpo uje shuu tîrêth par tohîrm oso.— Jesús tatim ör im: —Yok itspo ye titim olakpe yeékpo uje ishîm yok pukurbo par tiyokör erze kuche.

²⁸Per sehe titeêta kuche hn uhu deeshi atimlo yok uje olak eyuwo tisîr. Hnakîrbich dekite ir aabo ör osiyer. Tatim deyjît yet im: “Pijîte, sehe tuu as obiyoho shakîrrza eheth.” ²⁹Ir ijît tatim im: “Ye takahape,” per wisik wisik hn ir eyuwo kinãho masaha uje om. Hno tîr shakîrrza eheth. ³⁰Ör deych tatim deyjît yet par uje hno tîr shakîrrza eheth. Wichi sahmür hn tatim im: “Èhe papa, takaha,” per ye dope.— ³¹Jesús tatim

erze òr bahluwo im: —¿Ese hnakirbich ir ijittikihi uje shiyokõr uje ir deych sahmûr?— Wir otatim Jesús otsii: —Ese webich osht shiyokõr uje ir deych sahmûr.— Jesús tatim òr im: —Titim olak ich tuu ùrpa. Erze uje otibey nahnapsò òr hnote uje gobierno kobra hn erze timcher uje òr yitor omasaha par Porrosht aabo per olak ye amsahalope. ³² Juan uu tohirm oso tirètni par shiyokorâha oso uje tyenij oshiyokõr uje Porrosht sahmûr per olak otiislo ire. Erze uje otibey nahnapsò òr hnote uje gobierno kobra hn erze timcher yitor wir uje ye olotiis ir ahwospe. Olak nos amlo erze uje oshiyokõr per ye uhu olak eyuwo tisirpe par uje ye otiislo ire toy.—

³³ Jesús tatim òr im: —Hap êrlo erze uje titeêta titim olak. Hnakirbich dekite uje chukwêr uva ir shakirra ehèt hn chichuwe. Chihîtsa jotsit par chiyuhu uva otich hn shiyokõr owich uje de porit par odohir oteychim ir shakirra ehèt par otibey. Shuu yewo otsahla ir shakirra. Ir bahat par uje shuu oshim ire jôro ee yêr hn tokolihichis hno tîr hnmich yet. ³⁴ Uje terihi jôro ishirît par ochekushu hn shuu debiyo yewo ohno otîr erze hnakirbo uje shuu otsahla ir shakirrani par shuu oshim ire jôro ee yêr par ir shakirra bahat. ³⁵ Per erze hnakirbo otsepyêr ir ibich yet hn oshuu yet oshuu toy hn oshuu yet ochîra kojano po. ³⁶ Ese shakirra yinsirc shuu debiyo yewo ohnopo ich ma okihniya hn erze hnakirbo uje otsahla shakirra oshiyokõr itso uje oshiyokorîhi erze yewohna. ³⁷ Uje ich uhurc hn shuu deyjit hno pork ehèt chiilehet im: “Tyenij otola ele pijit.” ³⁸ Uje erze hnakirbo omo ese shakirra yinsirc ir ijit uje tirèt hn okeytkêrye otsii: “Wichi uu shakirra yinsirc ir ijit. Uje ir deych toy nehe ich asa shakirra wate par ire. Ma om uje yuhulo yuhulo toy heke wate par eyok.” ³⁹ Ochishew ire hn ochiyuhu asa shakirra ehèt hn oshuu oshuu toy.— ⁴⁰ Jesús tatim erze òr bahluwo im: —Uje ese shakirra yinsirc tirèt nehe ¿ich niyokõr latikihi erze uje shuu otsahla ir shakirra?— ⁴¹ Erze òr bahluwo otatim Jesús otsii: —Tyenij shuu òr shuu otoy hn ye nuunape uje wir òr losuhlaabo pork òr iluu mihnû. Ich uhurc hn ishim asa ir shakirra hnakirbo yewo par otsahla uje terihi ishirît hn tyenij oshim ese hnakirbich jôro par asa shakirra bahat.—

⁴² Jesús tatim òr im: —Tikiraha uje olak ler Porrosht ahwoso hn erahalo uje tata Cristo im: “Erze uje oshiyokõr pwertit ochîra kojano oym ese kojach nohmet. Ochibite uje ich ye jukur per uje uhurc ich ma bale je erze kojano yewo. Porrosht wichi uje shuu tokole itsorz heke ich shuu yish eyok ibe.” Wir uje Porrosht ahwoso tata.

⁴³ Heke sehe tuu erahalo. Porrosht sehe duhu amsahalo par olak ir aabo per ye ahmûrlope, heke tyenij iim olak hn shuu erze yewo omasaha par ir aabo uje tyenij oshiyokõr uje ire sahmûr. ⁴⁴ Ese kojach uje titim olakike uje oso otata uje ye balpe wichi yok. Uje yeêk sahmûr ese kojach ich shi itso uje kayihi eeych hn chobirho ire per uje ese kojach kayihi yeêk eeych ich imehe ire.— ⁴⁵ Erze saserdote òr bahluwo hn erze uje òr iluuta

iich otsii fariseo uje ochunt erze kuche uje Jesús siteëta ich ochiraha uje sorzihi òr, ⁴⁶heke sehe odishew Jesús per otola erze oso pork erze oso otata uje Jesús wichi profetya.

Rey shiyokòr òr ahamich par ijít chiileku.

22 ¹Eseekite hn Jesús siteëta kuchit yet tatim òr im: ²—Uje Porrosht shiyokòr par tibey laabo ich shi itso rey uje shiyokòr òr ahamich par ir ijít chiileku. ³Shuu debiyo ohno otír erze oso uje tatim òrni par otír ese òr ahamich per wir ye onahmür otirètpe. ⁴Sehe duhu debiyo yewo odo par shuu otatim erze uje tatim òrni par otír ese òr ahamich. Tatim òr im: “Atimlo òr uje oposo nos ochimitike hn atimlo òr uje tuu oshuu wòjo hn ijaabo ìya uje sohlo par ese òr ahamich uje pijít chiileku. Atimlo òr par otirèt shichish pork ich nos ochimit oposo.” ⁵Otatim erze uje tatim òrni par otír ese òr ahamich per ye onahmür otirètpe. Yet hno tír ir shakirza eheth hn yet hno par tiya kuche hn chiwàha. ⁶Erze yewo ochishew ese rey ìbiyo hn oshiyokòr mihnikìhi òr hn oshuu òr oshuu otoy. ⁷Heke ese rey ich chesdelpa chowàha òr. Shuu ir ohyerptoso ohno par shuu oshuu erze debiyo òr yüwiro oshuu otoy hn otsèru òr dít. ⁸Ese rey tatim debiyo im: “Ich nos ochimit oposoko per ye wir otirètpe erze uje tapur òrni. Ich ye òr jukur. ⁹Bolilo etírlo erze daho uje deyo uje shish ma oso ochikàha hn nos wir oso uje eshlo orìhichis ich atimlo òr par otirèt otír ele òr ahamich uje pijít chiileku.” ¹⁰Erze ìbiyo ohno otír erze daho hn ochish erze oso. Kimìji òr iluu om o kimìji òr iluu mihnú ich nos otòhwa òr otseya òr ese òr ahamich. Heke ich okihniya uje ode ese owich uje ir ijít chiileku. ¹¹Uje ese rey masaha ese òr ahamich par teychim erze uje otirèt hn umo hnakirbich uje ir nerpta ye ilo erze yewo uje oshim òr par oyàha uje omasaha ese òr ahamich. ¹²Tatim ire im: “¿Uhu inaãpoko sham, heke amsaha ele òr ahamich pork nìhyok owa anerpta par ele ahamich uje pijít chiileku?” Per wichi ye dilehetpe. ¹³Ese rey tatim debiyo uje odirkii oposo im: “Ahírlo wichi meyko hn dile hn àrlo ebitilo ejwert uje dihlele. Oso uje odechi dihlelta oyerh hn oches labitère.” ¹⁴Porrosht shuu otatim erze oso uje okihniya par sehe duhu omasaha par ir aabo per shi nohmíramo uje omasaha. Wir uje Porrosht chiihla òr.— Wir uje Jesús siteëta tatim òr.

¿Je om oshi uje gobierno kobra?

¹⁵Eseekite hn erze uje òr iluuta iich otsii fariseo otokolìhichis Jesús ahír hn ohno okeytkèrye. Sehe oduhu Jesús tata lahwotik uje kinaha par òr denunsya ire. ¹⁶Oshuu dakile ohno otír Jesús hn oshuu erze uje otsahmür gobernador Herodes òya òr. Otatim ire otsii: —Maestro, oyíraha erze uje ata ich ùru hn oyíraha uje ahakoràha oso uhu oshiyokòr uje Porrosht sahmür hn shish ata ahwoso uhu itsye par erze losuhlaabo

hn par erze ih̄ir deyo. ¹⁷Sehe oyēr ahwotik. ¿Je oyiyuwe ley uje oyoshi hnote uje rey César kobra o je ye oyiyuwepe?— ¹⁸Jesús chiraha uje wir sehe oduhu nimeh̄i lahwoitik heke tatim ōr im: —Olak aho yuhurish. ¿Inaãpo heke sehe uhulo tiyuhu pahwoitik uje olak pwele uhulo tokole m̄ihnik? ¹⁹Owilo yok erze peychpor uje rey César kobra.— Wir otsowa peychporra. ²⁰Tatim ōr im: —¿Yeēk ichibich chihi hn yeēk iich chihi asa peychporra?— ²¹Otatim otsii: —Rey César.— Heke Jesús tatim ōr im: —Eshilo uje rey César sapur hn eshilo uje Porrosht sapur.— ²²Uje ochunt uje Jesús tata shuu itsorz ich ochishlabe. Otokole ohno.

Oso tyenij ōr ikpo nehe.

²³Eseekite uje shiyehē ese deeych hn hnakirbo yewo ot̄ir Jesús uje ōr iluuta iich otsii saduseo. Wir otsotiis uje oso tyenij ōr ikpo nehe. Oshiyokōr itso uje sehe odiraha kuchit. ²⁴Otatim Jesús otsii: —Maestro, Moisés tata uje hnakirbich uje toy hn ye aābirsh ich ir leshibich tyenij īhi asa lakaharza ahir. Uje ij̄itish ich par ese ir leshibich aap uje toni. Wir uje Moisés tatkite. ²⁵Hnakirbo ōr syete ode eyok ahirni uje ōr leshibye. Uu webich osht chiilekuni hn toy. Ye aābirsh heke ir leshibich īhi asa poluuta ahir. ²⁶Wichi toyto hn ye aābirsh heke leshibich yet īhi ahir. Nos wir ōr ire uje ōr syete ōhyi wate ahirni hn nos otoy. ²⁷Ich uhurc hn asa timcharra toy sahn ōr ij̄ich. ²⁸Uje topo ōr ikpo nehe ¿ich yeēkpo wate ir abey pork nos wir ōr ire uje ōr syete ōhyi wate ahirni?— ²⁹Jesús tatim ōr im: —Olak shi eymehilo pork ye erahalope uje Porrosht ahwoso tata hn ye erahalo Porrosht ukurbope. ³⁰Uje topo ōr ikpo nehe ich hnakirbo hn timcher ye onoyhiye ahirpe. Wir shi ōr itso Porrosht ir anjele uje ode poōrc. ³¹Sehe tuu erahalo uje topo tyenij ōr ikpo nehe. Olak erahalo uje Porrosht tatim olakni im: ³²“Yok uu Abraham lishi ir Porrosht hn Isaac lishi ir Porrosht hn Jacob lishi.” Porrosht wichi ye topo ōr Porroshtpe. Wichi oso uje ōr ika ōr Porrosht. Par Porrosht ich nos ōr ika pork ōr ichibiyo shish de.— ³³Uje erze oso ochunt erze ahwoso uje Jesús shiyokorāha ōr ich ochishlabe.

Ley de otiyer uje ma deyo.

³⁴Eseekite hn erze uje ōr iluuta iich otsii fariseo ochunt uje Jesús serz erze ōr leshibo uje ōr iluuta iich otsii saduseo pork ir ahwoso iyuwe ōr. Heke erze fariseo otakisho lawich. ³⁵Fariseo yet de uje shiyokorāha oso waa ley waa je Moisés chichewkite. Wichi shi sehe prowa Jesús heke tatim par sehe diraha kucherk ³⁶im: —Maestro, ¿leyirāha waa je ma data?— ³⁷Jesús tatim im: —Asa ley ma data tata shuu itsorz im: “Enaha owa par ahmūr uu owa Irh̄ich Porrosht hn ye uhu ehēt yuhurāsh h̄nii ye uu eyuwo kināho.” ³⁸Wate ley ma data, ³⁹hn waa ley yata tata shuu itsorz im: “Ahmūr eshibo uhu itso uje ahmūr owa.” ⁴⁰Nos wir ley yēr

takashim oso par oshiyokōr erze ley otiyer hn takashim oso par oshiyokōr erze profeta òr ahwoso uje ochichewkite.—

¿Cristo tãra yeēkpo?

⁴¹Eseekite uje yahpaa wir otokole erze uje òr iluuta iich otsii fariseo hn Jesús sehe tēr òr ahwotik heke tatim òr ⁴²im: —Uhulo olak eyuwo tis̄ir latikpo Cristo, ¿yeēkpo ir porokkite?— Erze fariseo otatim otsii: —Rey David.— ⁴³Tatim òr im: —¿Inaāpo heke Porrosht Ich̄ibich shuu David tata uje Cristo wichi ir Irh̄ich? Pork David tata im: ⁴⁴“Ese Irh̄ich Porrosht tatim yok Irh̄ich im: Akaha paächta nehech nos tuu arãha amãho òr hnimich.” ⁴⁵¿Inaāpo heke rey David tata uje Cristo wichi ir Irh̄ich? Nos otata uje Cristo tãra ire.— ⁴⁶Heke ich ye odiilehetpe pork ye odiraha lahwoitk. Ich otola otsapurpo par uje sehe odiraha kuche.

Fariseo òr iluu ich miñnũ.

23 ¹Eseekite uje Jesús sihna lahwoso tatim erze fariseo shuu itsorz hn tatim erze oso yewo hn erze ir akile im: ²—Erze uje oshiyokorãha oso waa ley waa je Moisés chichewkite hn erze fariseo oshiyokorãha olak Porrosht ahwoso itso uje Moisés shiyokorãha olak poruwo wishkite. ³Ahakōrlo uje wir otatim olak per ye ahakōrlo erze uje òr ire oshiyokōr pork wir ye oniyokōrpe erze uje oshiyokorãha olak. ⁴Uje oshuu ahakōrlo erze òr ley ich shi itso uje oshiyeru urhũwo uje ich ihne hn oshuu ahnoklo per ye olak pwelpe pork ihnpa hn ye onahmũr otakashim olakpe hni onãra nahmita ijaapta. ⁵Nos wir kuche uje oshiyokōr wir shi oshiyokōr par oso oteychim òr heke wir ich otsahmũr oshiyeru kejun ijaabo nenta hn oshiyeru nahmikit uje Porrosht ahwoso de ehēt per oshuu kejun ma deyo je erze oso yewo par oshuu oso oteychim òr ire. Ich otsahmũr uje òr ishuwo ahworote ma berzi je erze oso yewo. ⁶Uje ot̄ir òr ahamich ich otsahmũr otsakaha erze òr bahluwo òr ibe eeyo hn otsahmũr otsakaha erze òr bahluwo òr ibe uje de sinagoga ehēt. ⁷Uje odirkih̄i d̄it ehēt ich otsahmũr uje oso otseta òr oshuu ire itso uje òr bahluwo hn otsahmũr uje yewo otseta òr otsii: “Maestro.” ⁸Ich ye ompe uje oso otseta olak otata otsii: “Maestro,” pork olak maestro shi sohmira uje de. Nos wir olak lesh̄ibye pork olak Porrosht aabo. ⁹Ye eeylo yeēk olak deychih̄i pork olak deych de poōrc. Wichi shi sohmira. ¹⁰Ye ompe uje oso otseta olak otsii: “Irh̄iche,” pork olak Irh̄ich wichi shi sohmira, wichi Cristo. ¹¹Ese uje ich ma dichih̄i olak ehēt wichi uje ch̄ib̄ite ire shi itso uje olak yilak. ¹²Yeēk uje narim ire ich Porrosht ye duhu dichpe, per yeēk uje ye duhu ire dich wichi uje Porrosht narim.

¹³Titim olak. Ich yarhak par olak uje ahakorãhalo oso waa ley waa je Moisés chichewkite hn olak uje olak iluuta iich otsii fariseo. Olak aho yũh̄irsh pork ont̄ilo erze oso uje sehe omasaha par Porrosht aabo shi

itso uje aherulo uhurrza par ye omasaha ehette. Olak ye amsahalope hn ontilo erze uje sehe omasaha. ¹⁴Ich yarhak par olak uje ahakorāhalo oso waa ley waa je Moisés chichewkite hn olak uje olak iluuta iich otsii fariseo. Olak aho yūhirsh pork eyuhulo erze poluu ōr ihyuwo, hn uje olak orar ich uhulo berzak par uje uhulo oso ōr eyuwo tšīr uje ahmūrlo Porrosht. Heke Porrosht tyenij sepyēr olak nehe ich shuu dospa.

¹⁵Ich yarhak par olak uje ahakorāhalo oso waa ley waa je Moisés chichewkite hn olak uje olak iluuta iich otsii fariseo. Olak aho yūhirsh pork etīrlo onoota bahluta pit hn hnimich pit yet uje ma dukuhla par ekulo yeēk par olak akilak. Uje eshlo ich ahakorāhalo uhulo ir iluuta ma mīhnū je olak hn ma mīhnik tyenij tīr ire uje īya olak uje etīrlo urhuta bahluta ehete nehe.

¹⁶Ich yarhak par olak pork shi olak itso olībo uje sehe alebīlo hn yewo oyehe olak nēr. Shish atīmlo oso olak ahwoso on: “Kimiji yeēk eyucha templo uje chibīte orhōta uje ich ūru uje tyenij shiyokōr kuchit nehe ich ir ahwoso ye jukur, per kimiji eyucha erze oro uje de templo ehete ich tyenij shiyokōr uje tata.” ¹⁷Olak shi olak itso totihlo hn olak itso olībo. ¿Latikpo uje ma bale, je oro o je asa templo? Asa templo ich ma dich pork asa templo shuu ese oro Porrosht kuche. ¹⁸Olak athīlo toy uje kimiji yeēk eyucha ese altar uje otserūhu loshipo par oteeychāha Porrosht hn chibīte lahwoso par uje sehe niyokōr kuchit ich ye ir ahwoso jukur heke ye nesita shiyokōr. Per kimiji eyucha ese loshipit uje de altar eeych par oteeychāha Porrosht hn chibīte lahwoso par uje sehe niyokōr kuchit ich tyenij shiyokōr uje tata. ¹⁹Olak shi olak itso olībo. ¿Latikpo uje ich ma bale, je ese loshipit uje oshuu hn ochibīte altar eeych o je ese altar uje shuu ese loshipit Porrosht kuchit? ²⁰Heke uje yeēk eyucha ese altar hn chibīte lahwoso par uje sehe niyokōr kuchit ich ye shi altarpe uje ire eyucha. Nos wir kuche uje de eeych wir uje eyucha toy. ²¹Yeēk uje eyucha templo hn chibīte lahwoso par uje sehe niyokōr kuchit ich ye shi templope uje eyucha. Ich eyucha Porrosht toy uje debuhu templo ehete. ²²Yeēk uje eyucha poōrc hn chibīte lahwoso par uje sehe niyokōr kuchit ich eyucha Porrosht ir ibīta hn eyucha Porrosht toy uje sakaha debīta eeych.

²³Ich yarhak par olak nehe uje ahakorāhalo oso waa ley waa je Moisés chichewkite hn olak uje olak iluuta iich otsii fariseo. Olak aho yūhirsh pork shish asimlo Porrosht erze olak kuche uje iich otsii dyesmo nehech ehoklo olak menta hn anīs hn komino par asimlo Porrosht per aluwelo erze ley uje ich ma bale pork ye enshiilo uje yeēk shiyokōr mīhnikīhi yet, hn ye eenīlo uje yeēk losuhlaap hn akashīmlo ire, hn otiislo Porrosht. Wir uje tyenij ahakōrlo hn ye ekeylo uje asimlo Porrosht dyesmo toy. ²⁴Olak shi olak itso olībo. Sehe alebīlo hn uhulo yewo otsehe olak nēr. Ahakōrlo shi itso uje sehe ehelo awit per mojit de ehete heke eyuhulo per kimiji kameylo chīhi ehete ich ehelo ese awit shi īya pork shish ahakōrlo erze

uje yērij bale itso mojit uje eyuhulo hn moymlo erze uje ich ma bale itso kameylo uje tyenij eyuhulo per shi moymlo.

²⁵Ich yarhak par olak uje ahakorāhalo oso waa ley waa je Moisés chichewkite hn olak uje olak iluuta iich otsii fariseo. Olak aho yūhirsh pork ahakōrlo shi itso uje erhūlo basta ejwert hn prete per ir aho ich ware deyo pork olak aho shi par uje sehe ohirlo kuche hn ekutirāha olak kuche. ²⁶Olak uje olak iluuta iich otsii fariseo ich shi olak itso olibo. Enshiilo olak iluu itso uje erhūlo erze basi aho wap heke tyenij ahakōrlo uje ich om itso basi uje nīhyok ehēt ware hnii ejwert.

²⁷Ich yarhak par olak uje ahakorāhalo oso waa ley waa je Moisés chichewkite hn olak uje olak iluuta iich otsii fariseo pork olak aho yūhirsh. Shi olak itso luku uje ochūshur poro ich ihīr per topo ōr debiyo de aho hn nos wir kuche mīhnūwo de toy. ²⁸Shi olak itso luke pork olak ejwert ich om itso hnakirbo uje ōr iluu om per olak aho yūhirsh pork mīhnūwo de olak aho.

²⁹Ich yarhak par olak uje ahakorāhalo oso waa ley waa je Moisés chichewkite hn olak uje olak iluuta iich otsii fariseo. Olak aho yūhirsh pork ahakōrlo erze profeta poruwo wishī ōr duku ich uhulo ihīr hn enshiilo erze oso ōr duku uje ōr iluu om uje otoni. ³⁰Athilo on: “Kīmiji ōryok chihikite uje ōryok poruwo wishī oshuu erze profeta oshuu otoy hn ōr armīsta noshi ich ye oyakashīm ōrpe.” ³¹Heke olak ahwoso chibite orhōta uje wir uu olak poruwo wishī uje oshuu erze profeta poruwo wishkite. ³²Ichii oshiyokōr erze mīhnūwokite hn ele ahle tok olak par uje ahakorihilo yok itso uje olak poruwo wishī oshiyokorīhi ōrkite par uje uhulo olak itso olak poruwo wishī. ³³Olak iljaabo itso echeēt aabo. Etaklo yok. ¿Ahakōrlo latikpo par uje ye onimchaha olak urhuta bahluta ehēt nehe?

³⁴Heke tuu profeta otīr olak nehe hn yewo uje ōr eykdeyo hn yewo uje oshiyokorāha olak. Ode uje tukulo ōr nehe uhulo otoy hn yewo ode uje owishihilo ōr krus eeyo par uje otooho hn yewo ode uje epiyerlo orīhi sinagoga aho ich uhulo dospa, hn shish ahnīlo ōr hn oloter ōr duwo aho. ³⁵Heke deeych yet nehe shi itso uje olak uje tukulo erze oso īrmo lekītiyo uje ōr iluu om uhulo ōr armītsi noshi. Uu webich osht uje oshuukite hn ir armīsta noshi wichi Abel. Ich ir iluu om, hn uu uhurzosh wichi Zacarías uje oshuukite oshuu toy. Wichi Berequías ir ijo. Wir oshuu irehe wahacha altar wir templo ikich. Ese altar wichi uje otserūhu loshīpo par oteeychāha Porrosht. Ich shi itso uje olak tukulo ōr heke tyenij otsepyēr olak nehe. ³⁶Titim olak ich tuu ūrpa. Olak hn erze oso yewo uje yesh ode uje ehn yok de lika īrmo nos wir erze mīhnūwo tyenij tīr olak nehe.—

Jesús ich dosdarak pork Jerusalén oso ye onahmūr irpe.

³⁷—Titim olak uje ebuhulo dit Jerusalén shish tukulo erze profeta poruwo wishī uhulo otoy. Hn erze uje Porrosht shuu ohno otīr olak ich

tukulo òrni uhulo otoy ěrlo òr kojano po. Shish sehe tikibey olak itso kokota uje tibey laabo shuu otsakaha nahno uut per ye ahmũrlope. ³⁸Ĕrlo uje titim olak. Erze olak ihyuwo tyenij moymlo nehe shi yesa. ³⁹Titim olak je ich ye amlo yok nehe nehech athilo on: “Sehe oyuhu Porrosht diyuhu lahwošo omoho ese uje ir Irhĩch shuu tirĕt.”—

Tyenij otsehnimich asa templo nehe.

24 ¹Eseekite uje ehn Jesús tokolihi templo patikit ehēt par hno tĩr owich yet hn ir akile otsitĩr ire. Otsowa ire erze pwerto uje de templo patikit ehēt. ²Jesús tatim òr im: —Nos amlo erze pwerto uje oshiyokõr ochĩra kojano po. Titim olak ich tuu ũrpa. Erze kojano ich ye lakahaye eeyo nehe hnii sohmira. Nos otsehnimich.—

Yar de uje tyenij tokole nehe uje terihi uhurc.

³Eseekite uje ehn Jesús sakaha ese wĩrit eeych uje iich otsii Olivos hn ir akile otsitĩr ire. Nĩhyok oso yewo uje ode òr ahir. Otatim otsii: —¿Latik nehe hn onehnimich asa templo hn yariraha uje ich terihi ishĩrit par oyiraha uje eeshpo hn yariraha uje terihi uhurc?— ⁴Jesús tatim òr im: —Abeylship olak par uje nĩhyok yeĕk sehnĩr olak ⁵pork tyenij oso okĩhniya uje ochii ire yokĩhi nehe hn otata otsii: “Yok Cristo” hn otsehnĩr oso ich okĩhniya. ⁶Tyenij entlo nehe uje dihipo oteyehe ĩrmo lekĩtiyo, hn entlo toy uje sehe oteye per ye as olak ibe. Wĩr tyenij tokole wap per yahpaa terihi uhurzpe. ⁷Tyenij dihipo oteye hn reye hõr duhut reye òr ohyerptos oteye. Tyenij sewit ihnimich sĕhi oso owilo kihniya ĩrmo hn tyenij hnimich telerrza owilo kihniya ĩrmo toy. ⁸Nos wĩr erze kuche mĩhnũwo tyenij tokole wap hn kuche ma mĩhnũwo iyehe nĕr.

⁹Uje iyuwe erze mĩhnũwo webich oso ich oso yewo tyenij oshim olak oso par otsepyĕr olak hn oshuu olak oshuu atilo. Nos wĩr oso uje ode ĩrmo lekĩtiyo tyenij otsitak olak shi pork ye otislo yokpe. ¹⁰Ich okĩhniya tyenij oym yok nehe hn wĩr tyenij òr denunsya olak hn otsitakye. ¹¹Ich okĩhniya uje ochii ir profetaha hn otsehnĩr oso ich okĩhniya. ¹²Oso tyenij oshiyokõr kuche mĩhnũwo ich kihniya heke oshuu yĕrij onahmũrye. ¹³Per uje yeĕk ewenta hn ye niyokõr erze kuche mĩhnũwo hn ye lotiis yok nehech terihi uhurc ich ir owich de Porrosht ahir. ¹⁴Tyenij otsanimĩrãha pahwoso otatim erze dihipo kinãho uje ode ĩrmo lekĩtiyo. Otatim òr erze ahwoso omo par uje oso òr pwele omasaha par Porrosht aabo. Uje nos ochuntĩhi ĩrmo lekĩtiyo ich terihi uhurc.

¹⁵Uje yeĕk ler ese uje profeti Daniel chichewkite ich sehe tuu diraha uje tata. Uje eychimlo uje oshuu ese kuchit iyehetihĩ templo ehēt nehe hn shuu asa templo mĩhnũ itso uje ire tata ¹⁶ich erze oso uje odebuhu hnimich Judea tyenij oyuhwo otĩr kojano deyo par otsakis ire. ¹⁷Kimijj yeĕk chihĩ dahuch eeych ich ye ompe uje masaha ehēt par hnoy ir

kushjāro. Shi tyenij yuhwo. ¹⁸Hn uje yeēk chihī aach ich ye ompe uje cheeshpo par hnoy lasuwo. Shi tyenij yuhwo. ¹⁹Uje terihī erze daalo nehe ich yarhak par erze timcher uje ōr hmiker hn erze uje yesh ōr aabo ijaabo uje ochuku pork ye ōr pwele ochoshpe par oyuhwo. ²⁰Apurlo Porrosht par uje ye duhu tyempit mīhnik uje olak yuhwo hnii uje terihī deeych uje otsakir. ²¹Uje ĩrmo tenit nehech ele ahle ich mīhnūwo de per ye ilo erze uje tyenij tīr ĩrmo nehe hn erze kuche mīhnūwo ich ye deeshpo petik nehe tīr ĩrmo. ²²Kimiji ye Porrosht duhu erze daalo arhaab uje erze kuche mīhnūwo tīr ĩrmo nehe ich tyenij nos otoy, per Porrosht sontew pork sahmūr erze uje chiihla ōr par omasaha par ir aabo. ²³Heke uje yeēk tatim olak il: “Hmeychimlo, Cristo de lika,” o kimiji tatim olak il: “Cristo de wahacha,” ich otiislo ire. ²⁴Tyenij oso ode nehe uje ochii ir Cristoho hn yewo ochii ir profetaha. Tyenij oshiyokōr kuche deyo uje ye latik pwele niyokōr par sehe onehnyēr erze oso uje Porrosht chiihla ōr par ir aabo per ye ōr pwele uje onehnyēr ōrpe. ²⁵Hmeychimlo, uje ehn yahpaa wir ōr prowa onehnyēr olak ich titim olak erze uje tyenij oshiyokōr. ²⁶Heke kimiji otatim olak nehe ile: “Hmeychimlo, Cristo de wahacha hnimich uje isa,” ich ye etīrlo wahacha, o kimiji otatim olak ile: “Hmeychimlo, Cristo de lika pwert ehēt,” ich otiislo ōr. ²⁷Yok tokōra poōrznī. Uje takaashpo nehe ich omo yokihī ĩrmo lekītiyo itso uje yuwebo hūre ich omoho dukuhla deeych warīch hn uje deeych yakaha. ²⁸Uje kuchit topit de ich wupuu takasho lawichihichis.

Yar de uje tyenij tokole uje Jesús tirēt nehe.

²⁹Titim olak uje erze kuche mīhnūwo yuwir ichii deeych ye dihitpe hn shekurko itspo ye dihitpe hn porrzeebe kay tāra poōrc. Erze kuche uje ukurbosh wahacha poōrc ich telerrzpa shi itso uje yeēk chishit kuchit. ³⁰Uje yuwirke erze hn tyenij omo yarta uje tokolihī poōrc shuu imeheeych uje yok takaashpo. Nos wir oso uje ode ĩrmo lekītiyo ich otolpa pork omo yok uje tokōra poōrznī. Ich tokonāha ukuhurrza. Uje tikirēt ich pukurbo deyo de hn ich yok hūre ³¹hn tuu yeēk sobīta trompeta ich jwertpa. Tuu yok anjele otīr ĩrmo lekītiyo par otōhwa Porrosht aabo uje chiihla ōrni.

³²Uhu olak eyuwo tišīr asa pohorrza waa je iich otsii higuera. Uje eshi tokole ich erahalo uje terihī ishīrīt uje daalo duhlu. ³³Uje nos amlō erze kuche mīhnūwo uje tīr ĩrmo nehe ich erahalo uje terihī ishīrīt uje takaashpo itso uje yok de pwert ebich par sehe tomsaha ehēt. ³⁴Titim olak ich tuu ūrpa. Erze oso uje omo erze kuche mīhnūwo webich oso uje tīr ĩrmo nehe ich ehn yewo ye otopē ich tyenij nos omo erze kuche uje tīr ĩrmo. ³⁵Poōrc hn hnimich tyenij sihna ire nehe per pahwoso shish yakaha.

³⁶Ese deeych hn asa orta uje takaashpo nehe ich nīhyok yeēk uje chiraha, hnii erze anjele uje ode poōrc ye odīrehepe, hnii yok ye

tikirahape. Shi Papa wichi uje chiraha. ³⁷Uje ehn yahpaa Noé masaha pohorrza eheth ich oso oshiyokōr kuche uje otsahmūr. Yok tokōra poōrznī. Uje ta par takaashpo nehe ich oso oshiyokōr oshuu itsship uje erze oso yewo oshiyokōrkite uje Noé masaha pohorrza eheth. ³⁸Uje ehn yahpaa kresyent bahlut tirētkite ich oso shish otaak hn oho hn ōhiye ahir nehech terihī ese deeych uje Noé masaha asa pohorrza eheth. ³⁹Ye odīraha uje kresyent bahlut tyenij tirēt nehech tarāha ōr hnimich hn nos sihna ōr. Uje takaashpo nehe tokōra poōrc ich oso ye odīraha uje takaashpo itso erze oso yewo uje kresyent sajuwe ōrkite. ⁴⁰Uje takaashpo nehe hn hnakirbo ōr osiyer ode aach ich ohnoy yet shi yet sakaha. ⁴¹Uje timcher ōr otiyer oshuu molino shiyokōr oposo ich ohnoy yata shi yata sakaha. ⁴²Heke shish tyenij emitlo olak pork ye erahalo ese deeych uje olak irhīch tyenij cheeshpo nehe. ⁴³Olak erahalo. Kimiji hnakirbich diraha orta uje echikit tirēt ich tibey ire par uje ye duhu masaha dahuch ehethpe hn torha ir kushjāro. ⁴⁴Heke olak tyenij shish emitlo olak pork yok uje tokōra poōrznī tyenij takaashpo uje ich uhu olak eyuwo tisīr uje ye takaashpe.

⁴⁵¿Yeēkpo ese hnakirbich uje shiyokōr debiyo hn eykdeyo heke ir yīnsirc ishīm dahuch par shuu tibey hn shuu ishīm ōr poso uje terihī orta? ⁴⁶Ich om par ese hnakirbich uje ir yīnsirc taācha hn shish shiyokor debiyo. ⁴⁷Titīm olak ich tuu ūrpa. Heke ese yīnsirc ishīm ir ibiyo ma dich. Ich shuu nos tibey ir kushjāro. ⁴⁸Per kimiji ese hnakirbich ir iluu mīhnū hn chibīte uje ir yīnsirc yahpaa deeshpe ⁴⁹heke ichii sepyēr erze nensirc ir ibiyo hn ire taak hn ihī hn īya erze oso uje ōr yikehyō. ⁵⁰Ese deeych ich chibīte uje ye yīnsirc taāchpe hn chibītpo uje yelij ir yīnsirc taachīhī asa orta wichi uje ir yīnsirc taācha ⁵¹hn sepyēr ese debich hn chibīte ese owich uje wir ode uje ōr aho yūhirsh. Wir oyerh hn oches labitēre.—

Jesús siteēta timcher phar ōr dye.

25 ¹Eseekite hn Jesús tatīm ōr im: —Ese uje Porrosht shiyokōr par tibey daabo uje terihī ishirīt par tikirēt nehe wichi itso timcher phar uje ōr dye. Kal nohmīra shi hnoy ir nampyon ohno odalehe ese hnakirbich arhīch uje sehe diileku. ²Ōr sinko uje oshuu deyuwo tisīr kuche hn ōr sinko uje ye oduhu deyuwo tisīrpe. ³Erze ōr sinko uje ye oduhu deyuwo tisīrpe shi ohnoy ir nampyon per ye odoy aseYTE yewope. ⁴Per erze yēr uje oshuu deyuwo tisīr ohnoy ir nampyon hn ohnoy aseYTE yewo toy. ⁵Ese uje chiileku ye taācha shichishpe heke kuhīrt dale wir hn nos omo. ⁶Uje ich terihī dīhlich pehet hn ochunt yeēk uje tibich im: “Yehe tirēt ese uje sehe diileku. Erētlo atsehelo arhīch.” ⁷Nos wir erze timcher phar oyehet hn onishii ir nampyon. ⁸Erze yēr uje ye oduhu deyuwo tisīrpe otsapur aseYTE erze yēr uje oshuu deyuwo tisīr. Otatīm

õr otsii: “Õryok nampyon ich sehe toy. Sihna ire aseYTE. Asimlo õryok chepikaabo.” ⁹Erze uje õr eyuwo tisir otatim erze nanime otsii: “Kimiji oyosim olak ich ye oyiraha kimiji sehi par õryok. Ma om uje bolilo eylo aseYTE par olak.” ¹⁰Uje ehn wir ohno hn ese hnakirbich taacha uje sehe diileku. Erze yer uje õr sinko uje ochimit ire oya wichi omasaha ese õr ahamich eheth hn wichi shiyeru uhurza. ¹¹Wisik wisik hn wir ocheeshpo uje ohno par otiya ir aseYTE. Otatim otsii: “Irhiche, Irhiche, etser asa uhurza par uje oyomsaha eheth.” ¹²Per wichi tatim õr im: “Titim olak ich tuu urpa. Ye tikiraha olak otir.” — ¹³Hn Jesus tatim õr im: —Titeeta titim olak tuu itsorzike par uje shish emitlo olak pork ye erahalo ese deeych hnii orta uje takaashpo.

¹⁴Shi yok itso hnakirbich uje chimit ire par uje sehe do tir dit yet. Tibi lebiyo par uje sehe duhu otibey ir hnote. ¹⁵Ishim ese debich sinko kotsirbo hnote, hn ishim yet kotsirbo osiyer hnote, hn ishim yet kotsirbit sohmet hnote. Ma ishim ese uje chiraha chish obiyo je erze yewo. Ishim ese yet yerij kihniya hn ese uhurzosh ishim ma pikaap pork yerij diraha obiyo. Uje nos ishim õr erze hnotike hn tokolihichis hno. ¹⁶Ese uje wichi ishim hnote kotsirbo sinko hno shichish chishew obiyo hn serz kotsirbo yewo ma sinko hnote. ¹⁷Ese yet uje ishim kotsirbo osiyer hno chishew obiyo hn serz kotsirbo osiyerpo. ¹⁸Per ese yet uje ishim ire kotsirbit nohmet hnote hno chihitsa jotsit hn chimchaha erze ir irhich hnote par sakis. ¹⁹Ich osdeyo hn õr irhich cheeshpo. Sehe diraha erze hnote uje ishim orn. ²⁰Ese webich oshet uje ishimni kotsirbo sinko hnote tir ire hn tohwa kotsirbo yewo sinko. Tatim im: “Irhiche, asim yok kotsirbo sinko hnotni shuu terz hnote yer kotsirbo sinko.” ²¹Ir irhich tatim im: “Ich ompa uje ahakor. Owa pibich uje om. Shish ahakor uje titim owa. Ahakor erze pibiyo arhaaboni uje tokosim owa heke tibite owa owich uje ma dich. Uhu owa ayla itso uje yok ayla.” ²²Ir ibich yet taachih i ire ahir uje ishim kotsirbo osiyer hnotni. Tatim im: “Irhiche, asim yok kotsirbo osiyer hnotni. Shuu terz kotsirbo osiyer yewo.” ²³Ir irhich tatim im: “Ich ompa uje ahakor. Owa pibich uje om. Shish ahakor uje titim owa. Ahakor erze pibiyo arhaaboni uje tokosim owa heke tibite owa owich uje ma dich. Uhu owa ayla itso uje yok ayla.” ²⁴Ir ibich yet taacha uje ir yinsirc ishim hnote kotsirbit nohmetni. Tatim im: “Irhiche, tikiraha uje owa ich eluuta ihnpa. Ekushu erze joro ee uje ye ekwer petikni, hn boy erze uje ye eshitpe, ²⁵heke tikitila owa hn tihitsa jotsit par timchaha erze owa hnote. Ele owa hnote, asew.” ²⁶Ir yinsirc tatim im: “Owa pibik uje iljaabik hn tok. Erahaha erze uje tekushu ye tukwerpe hn tishew erze uje ye tishitpe. ²⁷Ma om kimiji moymih i yok hnote mankit par uje takaashpo nehe hn tiyuhu ich ma kihniya.” ²⁸Tatim erze uje ode ire ahir im: “Eyuhulo ese kotsirbit sohmet hn asimlo ese uje dye kotsirbo hnote de ire ahir, ²⁹pork ese uje de ire ahir ich ma oshim heke de ire ahir ich kihniya, per ese uje shi pikaap de ire ahir ich tyenij

ochiyuhu. ³⁰Ese pibich uje ye jukur ārlo ebitilo asa dihlelta eheth uje de ejwert. Oso uje ode wahacha oyerh hn oches labitēre.”—

Erze uje ōr iluu om hn erze uje ōr iluu mihnū.

³¹Eseekite hn Jesús tatim ōr im: —Yok tokōra poōrznī. Uje takaashpo nehe ich yok hūre hn anjele ōya yok. Tiyaha pibita waa je ich ihār pork yok Rey. ³²Nos wir dihipo kināho uje ode ĩrmo lekityo ohnoy ōr otseya ōr ese Rey ikich nehe. Wichī tyenij sehek ōr shi itso ese uje tibey obeje sehek obeje hn kabir. ³³Chibite naāchta erze uje ōr itso obeje per erze uje ōr itso kabir chibite ōr naachjārrza. ³⁴Ese Rey tyenij tatim erze uje ode ir waāchta im: “Papa wichī uje sosir olak. Erētlo pork uje ehn yahpaa Porrosht niyokōr ĩrmo ich nishii ese owich par olak. Etĭrlo wahacha ³⁵pork uje piyuwo sēhi yokni ich asimlo yok pobiso, hn uje piich sēhi yok ich asimlo yok par tokoho. Yok itso dihipit kinēhēt per enshiilo yok. ³⁶Uje pishuwo nīhyok ich asimlo yok, hn uje yok permo ich ekirihilo yok hn uje yok de karsel eheth ich etĭrlo yok.” ³⁷Erze uje ōr iluu om otatim otsii: “Īrhiche, ¿latikni hn oyumo uje sewit sēhi owa hn oyosim owa abiso par ew? ¿Latikni hn oyomo uje eeych sēhi owa hn oyosim owa par ehe? ³⁸¿Latikni hn oyumo uje owa itso dihipit kinēhēt hn oyinshii owa? ¿Latikni hn oyomo uje nīhyok asuwo hn oyosim owa? ³⁹¿Latikni hn oyomo uje owa permo o kimiji owa chihi karsel eheth hn oyekirihii owa?” ⁴⁰Ese Rey tatim ōr im: “Titim olak ich tuu ūrpa. Uje akashimlo ese pishibich uje ye ir ukūrbīrsh ich itso uje akashimlo yok.”

⁴¹Ese Rey tatim erze uje ode naachjārrza im: “Atokolihi liklo pahir olak uje Porrosht sajir olak ikiyo. Bolilo etĭrlo asa urhuta bahluta eheth waa je yelij nihna ire. Porrosht chimit asa par chimchaha dyablo hn ir anjele. ⁴²Tyenij etĭrlo wahacha pork uje piyuwo sēhi yok hn ye asimlo yokpe par uje taw, hn uje piich sēhi yok ich ye asimlo yokpe par tokoho. ⁴³Uje yok itso dihipit kinēhēt ich ye enshiilo yokpe. Uje nīhyok pishuwo ich ye asimlo yokpe, hn uje yok permo o kimiji yok chihi karsel eheth ich ye ekirihilo yokpe.” ⁴⁴Otatim otsii: “Īrhiche, ¿latikni hn oyumo uje iyuwo sēhi owa, o kimiji eeych nēhi owa, o kimiji owa ilo dihipit kinēhēt, o kimiji nīhyok asuwo, o kimiji owa permo, o kimiji owa chihi karsel eheth hn ye oyakashim owape?” ⁴⁵Heke ese Rey tatim ōr im: “Titim olak ich tuu ūrpa. Uje ye akashimlo yeēk uje ye ir ukūrbīrsh ich uhulo itso yok uje ye akashimlo yokpe.” ⁴⁶Erze uje oshiyokōr oshuu itsorz tyenij mīhnik tĭr orĭhi urhuta bahluta eheth nehe hn yelij nihna ire, per erze uje ōr iluu om otĭr ese owich uje ōr ikirīt de uje yelij nihna ire.— Wir uje Jesús tatim dakile.

Erze ōr bahuwo ochukwi Jesús iluu.

26 ¹Eseekite uje Jesús nos tatim dakile erze kuche hn tatim ōr im:
²—Yok tokōra poōrznī. Erahalo uje daalo osiyer hn oshiyokōr

õr ahamich uje iich otsii Pascua. Tyenij oshim yok oso hn ochowishihi yok krus eeych par tikiti.— ³Eseekite uje ehn Jesús tata shuu itsorz hn erze saserdote õr bahuwo hn erze dit oso õr bahuwo uje ode Jerusalén otakisho lawichihi Caifás ihyuch pork wichi saserdote õr bahlut pisht. ⁴Ochukwi Jesús iluu par uje sehe odishew ire uje oso nihyokîhi ire ahir par uje oshuu oshuu toy. ⁵Wir okeytkêrye otsii: —Ye ompe uje yishewlo ire yuhulo nõya ese õr ahamich nok wir oso odorza ire.—

Timcharrza sanuwāha perfume Jesús eeych.

⁶Eseekite hn Jesús de wahacha dit Betania hn sakaha Simón ihyuch. Ese Simón ir alokot otsii lepra. ⁷Timcharrza sitîr ire Jesús. Wate tõhwa perfume uje de kobit ijaabit eheth uje oshiyokõr ochîra kojach uje iich otsii alabastro. Ese perfume ich debichpa. Uje ehn Jesús sakaha nemest wirc hn asa timcharrza sanuwāha huta. ⁸Uje ir akile omo ich ochesdelo. Otata otsii: —¿Keshi inaāpo heke sanuwāha ese perfume teychpisha? ⁹Kimiji ye nanuwāha ich ma om par chiwāha shuu debichpa hn ishim baho erze losuhlaabo.— ¹⁰Uje Jesús chunt hn tatim õr im: —¿Inaāpo heke ahakoslo ana timcharrza? Ese uje shiyokorîhi yok ich om. ¹¹Erze losuhlaabo shish ode olak ahir nehe per tyenij yok nihyokîhi olak ahir. ¹²Uje asa timcharrza sanuwāha perfume yok ich shiyokõr shi par uje ochihitsim yok. ¹³Titim olak ich tuu ũrpa. Uje otsanimirāha Porrosht ahwoso îrmo lekityo otatim yok õr ich õr eyucha ese uje timcharrza shiyokorîhi yok.—

Judas chiwāha Jesús.

¹⁴Eseekite hn Judas Iscariote wichi Jesús akilak toy uje õr dose. Hno tîr erze saserdote õr bahuwo ¹⁵hn tatim õr im: —¿Asimlo yok latikpo par tokosim olak Jesús?— Wir otatim otsii: —Oyosim owa treynta peychpor uje plata.— ¹⁶Heke ichii chukwi Jesús iluu par uje sehe dosim õr.

Jesús shiyokõr Santa Cena webich osht.

¹⁷Eseekite uje terihi deeych webich osht uje oshiyokõr õr ahamich par otew pan uje ye eyhirāsh hn ir akile otsitîr ire. Otatim otsii: —¿Oniyokorîhi iraāpo erze oposo par ese õr ahamich Pascua?— ¹⁸Tatim õr im: —Boliõlo etîrlo ese hnakîrbich ihyuch uje dechi dit Jerusalén. Atimlo on: “Maestro sole: Ich yej terihi pishîrît. Tyenij yok hn pakile oyitîr ahuch par oyaakîhi ese õr ahamich Pascua.”— ¹⁹Erze ir akile oshiyokõr uje tatim õr. Otsar oposo par ese õr ahamich Pascua. ²⁰Uje ich dihak hn Jesús sakaha nemest wirc hõr wir dakile uje õr dose. ²¹Uje ehn otaak hn tatim õr im: —Titim olak ich tuu ũrpa. Olak yet de uje tyenij chiwāha yok.— ²²Heke ir akile ich õr dosdarak. Nohmir nohmîr otatim Jesús otsii: —Îrhîche, ¿je yok?— ²³Jesús tatim õr im: —Ese uje sitehe ir pan asa preta eheth uje tîtehe yok pan wichi uje tyenij chiwāha yok. ²⁴Yok

tokōra poōrznī. Tyenij oshiyokorīhi yok itso uje Porrosht ahwoso tata, per ich yarhak par ese uje tyenij chiwāha yok. Kimiji ye wichi shurhāni ich ma om par ire.— ²⁵Judas uje tyenij chiwāha Jesús tatim im: —Maestro, ¿je yok?— Jesús tatim im: —Ēhe, ich ūru uje athaka.—

²⁶Eseekite uje ehn otaak hn Jesús chishew pan, nihna Porrosht hn sehek. Ishim dakile. Tatim ōr im: —Elilo. Nāhu yok pēro.— ²⁷Chishew basta, nihna Porrosht hn ishim ōr im: —Nos ehelo ese uje de basta ehēt ²⁸pork wate asa parmista uje noshi shuu pahwoso yakaha par uje tokoshi ōr hnitew ich okihniya hn Porrosht perdonar erze kuche mihñūwo uje oshiyokōr. ²⁹Titim olak uje ye tokoho nehe ese uva otich nehech terihi ese deeych hn yoholo ese uva otich ahle uje Papa tibey daabo nehe.—

Jesús tyenij chibite orhōta uje Pedro sata ire nehe.

³⁰Eseekite uje nos oteeychi otseet imno hn otokole ohno otīr ese wīrit uje iich otsii Olivos.

³¹Jesús tatim ōr im: —Ele dihlake uje erze mihñūwo tīr yok ich tikiraha uje nos wir olak moymlō yoke pork Porrosht ahwoso tata shuu itsorz im: “Porrosht im: Tuu ese uje tibey obeje hn erze obeje chūr lekityo.” ³²Per uje yok ikpo nehe ich takaha titīr Galilea hn tyenij ahnilo pijich.— ³³Pedro tatim im: —Kimiji nos onoym owa mahn yok ye tokoym owape.— ³⁴Jesús tatim im: —Titim owa ich tuu ūrpa. Ele dihlake uje ehn yahpaa kokot yerhi ich tikiraha uje ata tre vese uje ye eraha yokpe.— ³⁵Pedro tatim im: —Kimiji tikitihi ahir pork tokōya owa per shi ye tiitape uje ye tikiraha owa otik.— Hn nos wir ir akile yewo otata oshuu itsorz toy.

Jesús orar sapur Porrosht.

³⁶Eseekite hn Jesús hōr dakile ohno otīr wahacha shakirrza waa je iich otsii Getsemaní. Tatim ōr im: —Shi akaha liklo. Takaha titīr wahacha hn yok orar.— ³⁷Hnoy Pedro hn erze Zebedeo ir aabo uje ōr osiyer. Ichii chuuna ire uje ich dosdarakpa pork kuchit dospa tyenij tīr ire ³⁸heke tatim ōr im: —Ich yok dosdarakpa. Tukuuna uje tyenij tikiti. Shi akaha liklo hn shi erihilo uje akahalo pahir.— ³⁹Jesús hno tīr wahacha pikaap. Chiyuwa dele hñimich nehech unta terihi hñimich hn orar sapur Porrosht. Tatim im: —Papa, terihi ishirīt uje tyenij tikitihi krus eeych. Wichi shi itso otich chiyok uje de basta ehēt uje tyenij tokoho. Kimiji ahmūr ich ye uhu tokoho per ma om ahakōr uje ahmūr, ye ahakōr uje yok tahmūr.— ⁴⁰Hno cheeshpo tīr uje dakile ode. Chish ōr shi omo. Tatim Pedro im: —¿Inaāpo heke ye olak ewentpe hñii una ora uje erihilo par shi akahalo pahir? ⁴¹Shish tyenij erihilo hn olak orar par uje ye ahakōrlo erze kuche mihñūwo. Olak sehe ahakōrlo uje om per ye olak ewentpe.— ⁴²Wisik wisik hn Jesús hno orarpo. Ich do vese ya uje sapur Porrosht im:

—Papa, kimijji tyenij tokoho ese otich chiyok uje de basta eheth ich tokoho par tiyokōr uje ahmūr.— ⁴³Uje cheeshpo hn chish erze dakile shi omo pork ich kuhīrt sēhi ōr. ⁴⁴Tokolihī ōr ahīr hn hno orarpo. Ich tre vese uje tata shuu itso uje tatpoko ⁴⁵hn cheeshpo tīr uje dakile ode. Tatim ōr im: —¿Je yesh amilo? ¿Je ermtsirlo? Hmeychimlo, yok tokōra poōrznī. Ich terihī orta par oshim yok erze oso uje ōr iluu mīhnū. ⁴⁶Erihilo, yukulo. Hmeychimlo, yehe tirēt ese uje chiwāha yok.—

Ochishew Jesús.

⁴⁷Eseekite uje ehn Jesús keytkēr dakile ich Judas taācha. Wichī Jesús akilak toy uje ōr dose. Ich oso okihniya ōya Judas. Otōhwa espada hn yewo otōhwa piyo. Erze saserdote ōr bahlwo hn erze dīt oso ōr bahlwo wir uje oshuu ohno par ochishew Jesús. ⁴⁸Judas uje chiwāha Jesús tatim erze osoko im: —Uje tuku ur ich erahalo wichī ese. Asilo.— ⁴⁹Judas sitīr ire Jesús tatim im: —Wen noshe maestro— hn chuku ur. ⁵⁰Jesús tatim im: —Ahakōr uje erētike par ahakōr, sham.— Erze yewo otsitīr ire Jesús hn ochishew. ⁵¹Eseekite hn yet dechī Jesús ahīr. Chiyuhu ir espada hn ihyo ese saserdote bahlut pisht yilt per shi ihyo ir ārza. ⁵²Jesús tatim im: —Ehmer ese owa espada. Emchaha pich pork nos wir erze uje oteye ochīrye espada ich tyenij otoy ochīra espada toy. ⁵³¿Je ye erahalope kirēhe tahmūr ich yok orar tapur Papa ich shuu anjele otirēt shichish ōr wee deyo dose par otakashim yok? ⁵⁴Kimijji tiyokōr tuu itsorz ich ye Porrosht ahwoso yakahape uje tata uje erze mīhnūwo tyenij tīr yok itsorz.— ⁵⁵Eseekite hn Jesús tatim erze oso uje ochishew ire im: —¿Inaāpo heke erētlo hn ohwīlo espada hn piyo par uje aslo yok uhulo yok itso echikit? Shish tiyakaha olak ahīr templo patikit eheth tiyokorāha oso hn ye asilo yokpe. ⁵⁶Nos wir erze kuche tīr yok itsorz shi par uje shuu yakaha erze Porrosht ahwoso uje profeta poruwo wishī ochichewkite.— Ichī Jesús akile oym ire. Oyuhwo.

Ohnoy Jesús otseya Junta Suprema ikich.

⁵⁷Eseekite hn erze uje ochishew Jesús ohnoy ire otseya wahacha Caifás ir ihyuch. Wichī uu saserdote ōr bahlut pisht. Erze uje oshiyokorāha oso waa ley waa je Moises chichewkite hn erze dīt oso ōr bahlwo otakisho lawichihichis. ⁵⁸Pedro shi iyehe Jesús nēr dukuhla nehech taachīhi ese saserdote ōr bahlut pisht ir ihyuch hn masaha patikit eheth. Sakaha wir ōr ahīr erze uje otibey templo. Pedro sehe teychim uje oshiyokorāhi Jesús. ⁵⁹Erze saserdote ōr bahlwo hn erze uje ōr weeta iich otsii Junta Suprema ochukwi yeēk par uje oshuu tata dekushii hn denunsya Jesús par uje wir ochibite lahwoso sehe oduhu Jesús oduhu toy. ⁶⁰Ich okihniya uje ōr denunsya Jesús per ōr ahwoso ye ilyepe. Shi otata lekushii. Ich uhurc hn yewo otaācha ōr osiyer. ⁶¹Wir otata otsii: —Ese hnakirbich

tatni sole: “Yok pwele tehničich Porrosht templo per je daalo tre nehe hn tuu iyehetpo.”— ⁶²Ese saserdote òr bahlut pisht iyehet tatim Jesús im: —¿Je ye ahwotikish par atim yok? ¿Je ùru erze òr ahwoso uje otatim yok uje òr denunsya owa?— ⁶³Per Jesús ye dilehetpe. Tatim Jesús im: —Titim owa tñra Porrosht iich uje ika. Atim òryok kimiji owa Cristo uu Porrosht Ijit o kimiji ye owape.— ⁶⁴Jesús tatim im: —Ich ùru uje atim yok hn ye shi esepe. Yok tokòra poòrznì. Titim olak uje deeych yet nehe hn eychimlo yok uje tiyaha Porrosht waächta hn amilo yok uje tikirèt tokonāha ukuhurrza.— ⁶⁵Ese saserdote òr bahlut pisht shiyās nanerpta pikaabit par yara hn tatim òr im: —Ele hnakirbich shi chiinehnm Porrosht. Ye nesit latik par òr denunsya ire. Olak ich entloko uje chiinehnm Porrosht. ⁶⁶¿Eshilo latikpo?— Wir otatim ire otsii: —Tyenij toy pork shiyokòr uje mihnik.— ⁶⁷Wir otitirāha ile hn yewo oshuu hn yewo otsepyēr ile ochñra nahme. ⁶⁸Otatim otsii: —Atim oryòkike uje owa Cristo heke èrza yeèkpo uje shuu owa.—

Pedro sata uje ye ñiraha Jesuspe.

⁶⁹Eseekite hn Pedro shi sakaha wahacha patikit eheth hn timcharrza waa je chish obiyohochis sitir ire Pedro. Tatim im: —Owa uje shish Mēya Jesús uu Galilea osht.— ⁷⁰Per Pedro sata irehe erze oso òr ile ikich hn tatim wate im: —Ye tikiraha erze uje atim yok.— ⁷¹Pedro hno tñr ese patikit uhurrza. Timcharrza yata umo Pedro hn tatim erze oso uje oyehe wahacha im: —Ese hnakirbich shish iya Jesús uu ñit Nazaret osht.— ⁷²Pedro satapo shuu itso uje ir ahwoso ich ùru im: —Ye tikiraha otik ese hnakirbich.— ⁷³Wisik wisik hn erze uje odechi otsitir ire Pedro hn otatim otsii: —Ich ùru uje owa shish Mēya ire pork ahwoso chibite orhòta uje āra Galilea toy.— ⁷⁴Tatim òr shuu lahwoso ich ùru im: —Ese hnakirbich ye tikiraha otik.— Ichii kokot yerh. ⁷⁵Pedro eyucha uje Jesús tatimke im: —Uje ehn yahpaa kokot yerhi ich ata tre vese uje ye eraha yokpe.— Heke Pedro tokolihichis ich yerhpa.

Ohnoy Jesús otseya Pilato ikich.

27 ¹Eseekite uje ñihirbit hn nos wir erze saserdote òr bahluo hn erze ñit oso òr bahluo otakisho lawichpo hn ochibite par uje oshuu Jesús oshuu toy. ²Wir oshiyeru hmeyko hn ohnoy otseya gobernador Pilato ikich.

Judas shiyeru laweheta poòrc par toy.

³Eseekite hn Judas uje chiwāha Jesús umo uje wir ochibite lahwoso par uje oshuu Jesús. Ire ich chuuna uje shiyokòr mihnik heke hnoy erze peychpor treynta uje plata par sesira ishim erze saserdote òr bahluo hn erze ñit oso òr bahluo. ⁴Tatim òr im: —Ich tiyokòr uje mihnik uje

tokosim olak ese hnakirbich uje ye niyokōr latik uje mīhnik par tukulo uhulo toy.— Otatim otsii: —Par ōryok ich ye latikish uje ahakōr uhu itsorz. Ich shi owa.— ⁵Judas sitsēr erze psychpor uje plata templo patikit ehēt hn tokole hno shiyeru leweheta poōrc hn toy. ⁶Eseekite hn erze saserdote ōr bahluwo otsamita erze psychpor uje plata hn otatimye otsii: —Uje yimchahalo erze psychpor ese owich uje yewo ochimchaha hnote par oshim Porrosht ich yiyuwe ley pork erze hnote wir ir bahat ese uje oshuu oshuu toy. Kimiji yimchahalo ese owich ich yiyuwe ley.— ⁷Heke okeytkērye hn ochibite par uje otiya hnimich ochīra erze hnote par oshiyokōr dukuta par ochihitsimihi dihipo kināho. Heke otīr ese uje chish obiyo shiyokōr kobo hn otiya ir hnimich. ⁸Heke oso ochikēra ese hnimich ir iich otsii dikirmista owich hn shish ir iich itsorz nehech ele ahle. ⁹Uje erze ōr bahluwo otiya ese hnimich ich oshuu yakaha erze Porrosht ahwoso uje profeta Jeremías tatkite im: —Ohnoy erze psychpor treynta uje plata uje erze israel oso ochibite par ir bahat ¹⁰hn otiya wichi hnimich ese uje shiyokōr kobo. Oshiyokōr shi itso uje yok ĩrhīch tatim yok.—

Pilato chukwi Jesús iluu.

¹¹Eseekite hn Jesús iyehe wahacha gobernador Pilato ikich. Tatim Jesús im: —¿Je owa uu israel oso ōr rey?— Jesús tatim im: —Ēhe, ich ūru uje atim yok.— ¹²Per uje erze saserdote ōr bahluwo hn erze dīt oso ōr bahluwo ōr denunsya Jesús ich ye diilehetpe. ¹³Pilato tatim Jesús im: —¿Je ye entpe erze uje yesh ōr denunsya owa?— ¹⁴Per Jesús ye diilehetpe hnii ahwos nohmira heke ese gobernador ich chishlabe.

Oshuu Jesús oshuu toy.

¹⁵Eseekite uje terihi ōr ahamich Pascua hn ese gobernador ir iluu par chiyuhu yetihi karsel ehēt uje oso otsapur ire. ¹⁶Hnakirbich de karsel ehēt uje iich otsii Barrabás. Nos ochiraha uje ir iluu ich mīhnū. ¹⁷Uje erze oso otakisho lawichihichis hn Pilato tatim ōr im: —¿Ahmūrlo yeēkpo par uje tiyuhu karsel ehēt? ¿Je ahmūrlo Barrabás o je ahmūrlo Jesús uje otata uje wichi Cristo?— ¹⁸Pilato sehe noym Jesús pork chiraha uje erze israel oso shi ōr denunsya Jesús pork opota. ¹⁹Ye shi esepe. Uje ehn Pilato sakaha ese owich par tēr uje ōr denunsya Jesús hn ir irāhta shuu otatim ire par uje ye niyokōr latikihi ese hnakirbich uje ir iluu om pork chikēra deerc ich yarhakpa chikēra Jesús. ²⁰Eseekite hn erze saserdote ōr bahluwo hn erze dīt oso ōr bahluwo otsakit erze oso par uje oshuu otsapur Barrabás hn par oshuu oshuu Jesús oshuu toy. ²¹Ese gobernador tatim erze osopo im: —¿Yeēkpo uje ma ahmūrlo par uje tiyuhu ire karsel ehēt?— Otatim otsii: —Barrabás.— ²²Pilato tatim ōr im: —¿Tiyokōr latikihi ele Jesús uje otsii Cristo?— Nos wir ōr ire otatim otsii: —

Owishihi krus eeych.—²³ Pilato tatim òr im: —¿Inaãpo heke sehe uhulo towishihi krus eeych? ¿Niyokòr latikpo uje mñhnik?— Per òr ire shish otsihnew lahwoso otatim otsii: —Owishihi krus eeych.—

²⁴ Uje Pilato chiraha uje ich ye pwele niyokòr latik par chiyuhu Jesús per erze oso ich shish ma otibich, heke chishew awit hn churhũ nameehe erze oso òr ikich. Tatim òr im: —Ye yokpe uje tuu tukulo ese hnakirbich. Shi olak uje sehe tukulo uhulo toy.—²⁵ Nos wir oso otatim otsii: —Puruho òryok hn nos wir òryok aabo par uje oyuhu ire oyuhu toy.—²⁶ Heke Pilato chiyuhu Barrabás karsel eheth hn shuu otsepyèr Jesús hn ishim ohyerptoso par shuu ochowishihi krus eeych.²⁷ Erze ohyerptoso uje otibey gobernador ohnoy Jesús otseya ese owich uje ohyerptoso odebuhu Pilato ihyuch ahir. Oshuu nos wir ohyerptoso yewo otakisho lawich.²⁸ Ochiyuhu Jesús ir ishuwo hn oshuu iyäha onerpta uje wihir.²⁹ Oshiyokòr ir wolt ochira wonti hn oshuu iyäha hn oshim phich oshuu chishew chira nahmita waächta. Ocha dete hnimoho ir ikich hn ochiyuhu lahwoso mihnuwòho ire otsii: —Liki uu israel oso òr rey. Uhu ikirit ma berzak.—³⁰ Otitiräha ire hn ochenshaha ese phich ahir uje oshimike hn oshuu huta ochira.³¹ Uje nos oloterke ich oym. Ochiyuhu asa nerpta waa je wihir hn oshuu iyäha lasuwo pishopo, hn ohnoy par ochowishihi krus eeych.

Ochowishihi Jesús krus eeych.

³² Eseekite uje otokolihichis hn ochishihi hnakirbich dehet pehet uje iich otsii Simón. Wichi tära hnimich Cirene. Oshuu ihyök Jesús ir krus.³³ Otaachihii ese wirit eeych uje iich otsii Gólgota. Ese Gólgota ahwosht otsii huta debiyo.³⁴ Uje otaachihii wahacha hn erze ohyerptoso oshim Jesús wint ochinsaha kuche uje ich chiyokpa shi itso ebicha. Sehe oduhu doho per Jesús shi prowa, ye dohope.³⁵ Uje erze ohyerptoso ochowishihi Jesús krus eeychike hn otsehek ir ishuwo. Oloter kuchit par uje yeék chiyey ich oshim.³⁶ Shi otsakahachis Jesús ahir par otibey.³⁷ Ochibite tabilt ir krus eeych. Ahwoso de ese tabilt tata uje inaãpo heke ochowishihi krus eeych im: —Wichi Jesús uu israel oso òr rey.—³⁸ Ochowish echiko òr osiyer òr krus eeyo toy. Ochibite yet Jesús waächta hn ochibite yet waachjarrza.³⁹ Erze oso uje ochikähachis shi ochiyuhu lahwoso mihnuwòho Jesús hn oteych dehe.⁴⁰ Wir otatim otsii: —Owa athani uje tyenij ehnimich Porrosht templo, hn uje terihi daalo tre nehe hn uhu iyehetpo heke era akirbo par ye atihii krus eeych. Kimiji owa Porrosht Ijo ich ahnimichihii krus eeych.—⁴¹ Erze saserdote òr bahluwo hn erze uje oshiyokoräha oso waa ley waa je Moisés chichewkite hn erze dit oso òr bahluwo ochiyuhu lahwoso mihnuwòho ire toy. Otata otsii:⁴² —Wichi sosir yewo per par ire ich ye pwelpe takashim ire. Wichi chibite uje ire uu israel oso òr rey. Kimiji üru ich tyenij sohnimichihii

krus eeych par ye yotiislo ire. ⁴³Wichi ye lotiis Porroshtpe. Kimiji Porrosht nahmūr ire ich dosir pork wichi tata im: “Yok Porrosht Ijo.”—⁴⁴Erze echiko uje ode ir krus eeyo toy ochiyuhu lahwoso mihnuwōho Jesús itso erze oso yewo.

Jesús toy.

⁴⁵Eseekite uje ich terihi deeych pehet hn dihlelta ihmichihi lekityo nehech a la tre yilka. ⁴⁶Shiyeha asa orta a la tre yilka hn Jesús tibich ich jwertpa im: —Elí, elí, ¿lema sabactani?— Ese ahwosht tata im: —Dii Porrosht, Dii Porrosht, ¿Inaäpo heke moym yok?— ⁴⁷Erze oso yewo uje odechi ire ahir ochunt uje Jesús tata shuu itsorz hn otata otsii: —Ele shi tibii uu profeta Elías lishi.— ⁴⁸Ichii ör nohmet hno uushi chishew ponjit hn sitehe ese wint uje chiyok chiyuwa phich hn ishím Jesús par sehe duhu doho, ⁴⁹per erze yewo otatim otsii: —Moym, yeychim kimiji Elías tirēt hn takashim ire.— ⁵⁰Jesús tibichpo ich jwertpa. Ishím Porrosht dechibich hn toy. ⁵¹Ichii ese bortisht uje sentii templo ehēt shuu aho osiyer shiyās ire poōrc nehech terihi hnimich. Hnimich telerrza hn kojano kára ⁵²hn erze luku kihniya sitsēr ire. Oso wishí okihniya uje otsahmūr Porrosht ich ör ikpo ⁵³hn otokolihí luku aho. Uje Jesús ikpo ich wir ohno otír ese dit Jerusalén. Wichi dit uje Porrosht chihlakite. Ich oso okihniya oteychim ör. ⁵⁴Eseekite uje erze ohyerptoso ör bahlut hn erze ohyerptoso uje otibey Jesús ochuuna uje hnimich telerrza hn omo erze kuche yewo uje tokole ich otolpa. Otata otsii: —Ich ūru ele hnakirbich uje Porrosht Ijo.— ⁵⁵Eseekite hn timcher ode dukuhla oteychim. Wir uje shish oyehe Jesús nēr uje tāra hnimich Galileani hn shish otakashim ire. ⁵⁶María Magdalena dechi ör ahir, hn María waa Santiago hn José ör lata dechi, hn Zebedeo ir irāhta dechi toy. Ir aabo wir Jesús akile.

Ochihitsim Jesús.

⁵⁷Eseekite uje ich yilkaship hn hnakirbich taācha. Wichi ich irhīch dich. Ir iich otsii José. Tāra dit Arimatea. Wichi Jesús ihyērak toy. ⁵⁸Hno tír Pilato par sapur Jesús yūhurrza. Pilato tatim erze ohyerptoso par shuu oshim José. ⁵⁹José hnoy Jesús yūhurrza hn chípeesa bortisht uje nimpyo. ⁶⁰Antni José shuu oshiyokōr ir dukuta kojach onta. Yahpaa odibite topitik ehēte. Yesh ahle. Wichi uje ire chibite Jesús. Shuu kojach yet chukwerlabe par sajuwe asa lukuta ebich hn tokole hno. ⁶¹María Magdalena hn María yata shi otsakaha asa dukuta ikich dukuhla.

Ohyerptoso otibey Jesús dukuta.

⁶²Eseekite ich ese deeych yaka uje oshiyokōr oposo par deychole. Uje ich dihirbit hn erze saserdote ör bahluwo hn erze fariseo ohno otír Pilato ikich. ⁶³Otatim Pilato otsii: —Irhīche, ōryok eyucha ese kushīt ir ahwoso

uje ehn ikahna hn tata im: “Uje terihi daalo tre nehe hn yok ikpo.”
 64 Heke uhu ohyerptoso odo par otibey asa dukuta nehech sowe daalo tre par uje ye ir akile otirēt odiyuhu ire hn otatim erze dīt oso uje ire ikpo tokolihi topo ōr ahir hn otsehn̄yēr erze oso ich shuu ma m̄hnik je uje waphna.— 65 Pilato tatim ōr im: —Bolilo erze ohyerptoso hn bolilo et̄rlo asa dukuta. Nos ahakōrlo uje ahmūrlo par uje abeylopa.— 66 Ohno otir asa dukuta hn ochibite yarta ese kojach uje sajuwe asa dukuta ebich hn oshuu ohyerptoso oyehe par otibey.

Jesús ikpo.

28 1 Eseekite ich iyuwe sabta wichi deeych uje otsakir. Uje ehn dihirbit pisht lekityo poro uje terihi deeych domingo hn María Magdalena hn María yata ohno oteychim asa dukuta. 2 Ichii ochuuna uje hnimich telerrza ich jwertpa pork Irh̄ich ir anjel ihmich tāra poōrc hn chiyuhu ese kojach uje otsahuwe dukuta ebich shuu chukwerlabe hn sakaha eeych. 3 Ese anjel ich hūre itso yuwebo hn ir ishūwo ich poro shi itso nyebe. 4 Erze ohyerptoso uje otibey dukuta ich otolpa hn ōr ikiyo tāra. Ōr torit shuu ōr itso uje otoy. 5 Per ese anjel tatim erze timcher im: —Ye atililo yok. Tikiraha uje yesh ekulo Jesús uje ochowishihi krus eeychhna. 6 Ye chihi likpe. Wichi ikpoko itso uje tatim olakni. Erētlo eychimlo ele owich uje ochibithna 7 hn bolilo shichish atimlo erze ir akile uje ikpoko tokolihi erze topo ōr ahir. Hmeychimlo, wichi tyenij hno t̄r Galilea hn ahn̄ilo ijich heke amlō ire wahacha. Wir uje Porrosht shuu titim olak.— 8 Erze timcher ich otokolihi asa dukuta ahir ohno shichish. Ich otola per ōr aylpa. Ohno ooshi ohnoy ese anjel ahwoso par otatim Jesús akile. 9 Uje ehn ohno hn Jesús tokolihi ōr ikich. Seta ōr. Otsit̄r ire hn ochishew Jesús hn̄ite hn oteychāha ire. 10 Jesús tatim ōr im: —Ye atililo latik. Bolilo atimlo erze pishibo par uje ot̄r Galilea heke ochish yokihi wahacha.—

Otata uje Jesús ir akile ochiyuhu ir yūhurrra.

11 Eseekite uje ehn erze timcher ohno hn ohyerptoso nohm̄iramo uje otibey asa dukuta ohno ot̄r ese dīt otatim erze saserdote ōr bahluwo nos wir kuche uje ōr ire oteychimihi wahacha dukutaka. 12 Erze saserdote ōr bahluwo hn erze dīt oso ōr bahluwo otakisho lawich hn okeytkērye. Oshim erze ohyerptoso ōr hnote ich kihniya. 13 Otatim ōr otsii: —Athilo on: “Dihlakike hn ir akile otirēt ochiyuhu hn ohnoy uje oyumo.” 14 Kimiji gobernador t̄r erze olak ahwoso ich oyuhu ire ehēt kiis par uje ye depyēr olak.— 15 Erze ohyerptoso ochishew erze hnote hn otata itso uje erze ōr bahluwo otatim ōrke. Erze ahwoso uje ohyerptoso otata chūr lekityoho erze israel oso ōr ehēt nehech ele ahle.

Jesús ishim dakile obiyo.

16 Eseekite hn Jesús akile uje ōr onse ohno ot̄r Galilea. Ot̄r ese kojach uje Jesús tatim ōrhna. 17 Uje omo Jesús hn oteychāha ire per yewo ōr

koswãha. ¹⁸Jesús sitĩr ire òr hn tatim òr im: —Porrosht nos ishim yok pukurbo par tikibey poõrc hn ele hnimich, ¹⁹heke bolilo etĩrlo nos wir dihipo uje ode ĩrmo lekitiyo par uhulo omasaha par pakile. Ohirmlo òr uje ye olotiis yok ĩrlo Porrosht iich hn ĩrlo piich hn ĩrlo Porrosht ĩchĩbich. ²⁰Nos ahakorãhalo oso par oshiyokõr erze kuche uje titim olakni. Hmeychimlo, shish yok de olak ahir nehech terihi uhurc nehe.—